

# CITAMPI CIITÂNÙ



Twinyikààyaaku mitù yètù mpindyewu bwà disambila.

<sup>2</sup> Taatù wa mu Dyulu wa ngàsà, Nzambì wa Bukolè bwónsò, Wàkabiisha Yesù Kilistò ku bafwè, nè mutùleejèYe mu matùkù à ndekeelu aa, mu Bukolè bwà Nyumà Mwîmpè, tudi nè kusàkidila bwà misangu yònsò yà ditùmwènekela dyà bukolè dyà Nzambì udi kàyì mwà kufwà eyi. Nènku mpindyewu, Taatù, tudi kumpàlà kwètù nè dikwàbò dîbà, dîbà didì difwànyine kushintulula bwà bantu bààbúngì kwàbò kwà Cyendèlèlè kùyaayàbo.

<sup>3</sup> Nè bwà kulenga edi, Mukalenge, twètù katwèna bakùmbàne nànsha. Bwalu, bìdi mu Mifùndu, nè: “Mwànà wa mùkòòkò wàkangata Mukàndà awu nè wàkakàngula Bìtampì.”

<sup>4</sup> Éyì Mwànà wa mùkòòkò wà Nzambì, seemènaaku, nyewù tulòmba. Tudi tukusòka Wèwè, Mukalenge, Mupikudi munène awu. Lwàkù ùtùleejèku ndongamu Webè wa bupikudi utu musokoka munda mwà bidimu awu, mu kulamuna kwà Cítampì Cìitànù eci dilòòlò edi, Taatù, nè mu kutùbuulwila kwà cidi mwìnshì mwà Cítampì aci; bwà twamònakù mwà kuumuka biikàle beena Kilistò bìmpè kutàmba mutùdi mpindyewu emu, bwà twamònakù mwà kwikala batàmbe kukùmbana bwà mudimu wùdi wùsanganyiibwà kumpàlà kwètù. Tudi tulòmba nùnkù mu Dînà dyà Yesù. Amen.

Sòmbaayi.

<sup>5</sup> Mwoyi wènù awu dilòòlò edi, balundà bàànyì. Ndi mbala eci bu dyèsè dinène dyà kwikala kaaba aka dilòòlò edi, dîbà dyà bwalu bunènè bùdi bwènzekà ebu. Ncyèna mumanyè mwaba nànsha wùmwe wùndiku mufwànyine kutàmba kudyùmvwa bìmpè, kupita kwikala ku mudimu wà Mfùmù to. Nènku mpindyewu tudi tulwa nangànangà bwà màleesònà aa mutùdi ànu twindila; Yèyè kàyì muCimbuulwile to, ncìvwa mwà kunùpèèshaCì to. Ncyèna nteeta bwà kukwàta mudimu nè meeji àànyì kampànda anyì nè cintu kanà cyònsò nànsha; ànu mwàCìfilàYe amu. Ncyà bushùwà. Nè ndi—ndi mutwìshìibwe nè, mèmè nciyi nkwaàta mudimu nè meeji àànyì mèmè to, nènku Cyòci cìlwalwa mu mùshindù wùdiCì cilwè awu. Nè mu nsòmbelu wanyì mujimà kacya kaCìtukù cyanji kwikala cyà mafi to. Kacyàkwikalakù cyà mafi musangu ewu nànsha.

<sup>6</sup> Mpindyewu, tudi ànu nè butùmbi bwà menemene nè biikàle nè kusàkidila kwà dikèma, kwà dikèma bwà bìdiYe mutwènzèle, cyanza cinènè cyà kaciyi cyùmvwika cyà Nzambì udi nè mwoyi! Ncintu bunène kaayi civwàci cifwànyine kwikala, mbantu kaayi bàà dyèsè batùvwàku kàbìdi bafwànyine kwikala, kutàmba

kwikala mu bwikadi bwètù nè Mfùmù wa bamfùmù, Mukalenge wa bakalenge?

<sup>7</sup> S'tuvwa pàmwápa bafwànyine kwela tushibà nè—nè kubàndisha màbèndelà, nè kwadija maatàpí panshi nè bikwàbò byònsò, bwàlu Mfùmù wa ditunga ùdi ùlwa mu cimenga. Kàdi, anjì elààyibi meeji, aci's cívwa cifwànyine kwikala ànu cìmpè, nè cívwa cifwànyine kufila buneemè kùdi cimenga eci.

<sup>8</sup> Kàdi elàayi meeji's. Mu kaatabernacle kèètù kakesè, kapwekèle aka, dilòlò edì, tudì tubiikila Mfùmù wa bamfùmù, Nzambì. Kàdi twètù katwèna... Yèyè kàtu ùjinga bwà bàmwadìjilè maatàpí panshi, nè bikwàbò to. Ùtu ùjinga bàmwadìjilè myoyi midipwekèshe, bwà Wàmòna mwà kwangata myoyi midipwekèshe ayi bwà kuyibuulwila bi—bintu bìmpè bìdiYe naabi mu cibùcilu bwà aba bwònsò bàdi baMunangè.

<sup>9</sup> Mpindyewu, tudì tulòmba . . . Nènku ndi nè bujaadiki bündi muswè ku—kufila. Mpindyewu, mèmè mutùpàkàne pa bwalu ebu; ndi mufume ku dibùmvwa, nènku mbifwànyine kwenzeka nè ngiikalè mutùpàkàne. Kàdi ngeèla meeji nè bantu abu bàdi kaaba aka, biinè bàdi bujaadiki abu bùtàngila abu.

<sup>10</sup> Nè pashìishe, kwènjì ndambù wa matùkù, pàmvwà muyè kumbèlù kwànyì mpindyewu, mu—mu Arizona, twètù kupeta di—dibiikila dyà ku tèlèfonè divwà dyàmba nè kùvwa mwànà mukèsè wa balùme uvwa nè mubidi kapyà wà ku binyòka. Nè cyòci aci ciyaaya too nè ku mwoyi. Nè yèyè awu ùvwa mu mùshindù wà . . . Tatwèndè nè mamwèndè mbalundà bàànyì bananga, bàà musinga mukolè. Ùvwa ngumwe wa ku balami bèètù . . . bèètù kaaba aka, wa mu èkèleeziyà emu, Mwanèètù Collins. Mwanèndè mukèsè wa balùme, Mikey mwànà, mulundà wa mu manàyi wa Joe, nguvwa usaama mubidi kapyà wà ku binyòka wà ku mwoyi awu. Kàdi bangàngàbukà bàvwa bamwalùje kumbèlù, bamutèèke mu bulààlù, nè bambile baledi bèndè bwà kabàmulekedì ùjuukamù to, nànsha mene bwà kwambululayè mutù, bwà kunwà màyi. Ùvwa ùnwina ku lusonà; ùvwa ùsaama bibi be. Kàdi baledi bèndè, nè lulamatu, bàtu bàlwa mu tabernacle emu, nè mbiitabùùje.

<sup>11</sup> Nènku kwènjì ndambù wa malòlò, katùyi tuteeta bwà kwindila to, twètù kumanyisha masangisha à dyondopa mu dyàlumingu. Kàdi, bu muvwàbi bikèngela bwà twètù kwandamuna ku nkonko, nànkù díbà adi byòbi kukèngela bwà twètù kushipa disangisha dyà dyondopa adi.

<sup>12</sup> Nè pashìishe mvwa nè kantu kampànda kàmvwà mulamè munda mwànyì emu, mu mwoyi wànyì.

<sup>13</sup> Kàdi mamwèndè nè tatwèndè bàvwa baswè kumanya ní bàvwa mwà kuya nè mwànà mu bìrò mwàmwa. Ke kulwàbò nè mwànà mukèsè awu mwaba awu, nènku Nyumà Mwìmpè kwambayè nè mmwondòpiibwe.

14 Nènkù ewu, baledi bèndè, biikàlè bàneemeka cyôci aci, kwalukilabò nè mwànà mukesè awu kumbèlu nè kumutùmabò mu kàlaasà, bamutùme ànu mu kàlaasà cyanààna.

15 Ke ngàngàbukà kupetayè luumù alu, pa nànkù cintu cyà mùshindù awu kacyàkatàmba kusànkisha ngàngàbukà awu to. Pa nànkù, yêyè kwambila mamwëndè nè bìvwa bikèngela bwà mwànà awu kwikalayè ànu mu bulààlù, mu bushùwà bwà bwalu. Ke mamwëndè kumulondelayè mùvwà bwalu. Kàdi ngèèla meeji nè muntu awu ùdi, mèmè muumvwè bìmpè, mmwena kwitabuuja mwena Kilistò, wa mu dīgumba kampànda. Ng'Adventiste du—du Septièmè jour, yêyè ngàngàbukà awu. Ke pa nànkù kwambayè nè: “Èè, bìvwa bikèngela bwà nwènù. . . dībà ndikùmbàne bwà mwànà awu, bwà mèmè kumwenza mateeta.” Yêyè kwamba nè: “Bìvwà bikèngelà, bwà nwènù kwenza nànkù, kumwenzejakù nànsha mateeta's.”

Awu nè: “Bìmpè be.”

16 Kulwayè nè mwànà awu, ke ngàngàbukà kumwenzayè mateeta, à mashi, mwaba wùdì mubidi kapyà wà binyòka wùsanganyiibwa. Nènkù mèmè kuumvwa nè ngàngàbukà wàkàkèma bikolè mu mùshindù wà nè wàkapanga nè cyà dyenza. Mwànà mukesè awu ùdi ànu mwèndè nè kale, musàngàle nè mubidi tumatuma, kakùyì. . . ? . . . cidìbo basangàne nànsha.

17 Mpindyewu, ba-Collins biinè bàdi kaaba aka anyi? Ndi mufwànyine kwikala mulondè bwalu abu kabùyì mu bwòbù to. Ndi muswè. . . Mmùdibi nànkù anyi, Mwanèètù wa bakàjì Collins? Èyowà. Èyo. Èyowà. Mikey Collins mwànà mwinè nyèyè wàwa, ùdi ànu nè bidimu bitwè ku bisambòmbò, anyi mwandamutekètè nànkù awu.

18 Nènkù aci ncyenzèkèlè ànu mu bìrò amu, kùkaadi malòlò bu àsàtù nànkù. Kaa, bàdi. . . Kùvwa nè cyà kwikala Kampànda mu bìrò amu wa kàyì muntu wetù ewu nànsha! Ùvwa n'Yèhowàh munènè nè wa—wa bukolè awu, ncyà bushùwà, udi ulwa bwà kutwà Dìyì Dyèndè musinga. Nènkù mèmè ndi—ndi nè kusàkidila kwàbùngi pa kuumvwa cyôci aci. Nwamònu anyi? Ndi mumanýè nè twètù bwònsò tudi nè kusàkidila. Kí ng' ànu mèmè to, kàdi mbwònsò, bwalu anjì ambàbi tǔng bu nè ùvwa—ùvwa mmwanèèbè wèwè anyi mmwanàànyì mèmè?

19 Nènkù, vùlukààyì nè mèmè, cìndi mfla mbujaadiki, biikàlè ànu nè mbùmwè cyanààna, nè ngàngata bùmwè apa nè bùmwè pàapa. Àtu ènzeka myaba yònsò, kàdi cidì ànu bwà kunùmanyisha nè—nè mudimu wànyì wà bwambi wà cyà bushùwà wùtu mpa dyondopa dyà kùdì Nzambì. Kàdi nudi. . . Ndi kaaba aka mbwà Bitampì ebi. Bwalu, pashùishe ndambù, nenùmvwè nè mbwà cinýì bìvwa bikèngela bwà mèmè kwenza cyôci eci. Nè, pa nànkù, mèmè ncyèna mulongeshi nànsha, ncyèna mwena tèlòlójì to. Mèmè—mèmè ntu ànu nsambidila

babèèdi, nè ntu munangè Mukalenge. Nènkù mpindyewu, mpindyewu mu cyôci eci, nànsha nànkù, aci. . .

<sup>20</sup> Makèlèlèlè dilòlò tuvwa bafile bujaadiki bwà mwànà mukesè wa bakàji. . . Ndi nè dìnà dyèndè. Nè Billy ùdi naadi kaaba aka mpindyewu, mu mwaba kampànda, dyà muledi wendè nè yèyè ùdi nganyì. Nè mwinè mwànà mukesè wa bakàji ewu ùkaavwa mu citùpà cyà ndekeelu cyà kànsèrè kàà mu mashi, kiiipacila ànu. . . Bibi bitàmbe ànu menemene mu mùshindù wà kabàciyiku mwà kumudiishila kàbìdi mukana emu to; bikaavwa bikèngela bwà yèyè kwikala. . . mashi èndè bàèlela mu mijilu. Wa bwalu ùvwa mwànà mukesè mulenga wa dikèma. Ùvwa mukesè bwà bidimu bìvwàye naabi, wìpacilangana nè inàbànzà mukesè udi apa ewu, ngèèla meeji. Kàdi ùvwa wìpacila bule *ebu*, mutàmbe. . . Bàvwa ànu mùdi bààbùngì bàà kutùdi emu. Uvwa mufwànyine kumanyina ku bilàmbà bìvwà mwànà awu muvwàle, nè. . . nè byà baledi nè, bàvwa bapèlè bàà dikèma, bapèlè ànu bèètù bàà menemene aba's, nè, pa nànkù, kàdi biikàle nè kaneemu kàà dikèma. Ke Nyumà Mwímpè kwambayè nè mwànà awu ùvwa mwondòpiilwe.

<sup>21</sup> Mpindyewu, anjì elàayikù ànu meeji pa bwalu abu, mwikàle nè kànsèrè kàà mu mashi, mwànà mukesè awu. Nè mashi àvwa manyangùke mu mùshindù wà kabàciyikù mwà kumudiishila kàbìdi mukana to. Bikaavwa bikèngela bwà kwangatayè, bwà kuyayè ku lùpitaadi bwà kwangatayè mashi, anyì kwikalabò bàmwelèla mashi mu mijilu, bwà kumudiishabò; ngèèla meeji nè, nsùkaadi yà mu mubidi's, anyì ní ncinyi cyònsò. Ncyèna mumanyè myàkù yà baamingàngà bwà dyòdi disaamà adi to, kàdi, nànsha nànkù, bìvwà bikèngela bwà kwikalabò bàmudiisha mùshindù awu. Kàdi kumpàlà kwà mwànà awu kuumukayè mu mwaba awu, wàkaasa mwadi ùlòmba dyàmpà dyela minyìinyi munda.

<sup>22</sup> Nènkù baledi bèndè, paanyimà pàà bamanè kuumvwa diyì dyà Nyumà Mwímpè, dyà EMU MMÙDÌ MUKALENGE WAMBA adi, nwamònu's, bwòbò. . . Nènkù, bwòbò, beenyi, kacya kabàvwakù banjì kulwa mwab'ewu kumpàla to. Kàdi bwòbò. . . Ba—babàka bàbìdi bakùlakàji bìmpè be bàdìbo bàfuma ku dipetela myaba yà disòmba kaaba aka, kwènji ndàmù wa tusunsa, Mwanèètù wa balùme nè Mwanèètù wa bakàji Kidd, mbàvwà babàleejè cyà dyenza, nè cyà ditèeleja. Nènkù mwànà awu wàkadyà cyàkudyà cyèndè mu njila wa dyalukila kwàbò kumbèlu amu.

<sup>23</sup> Matùkù àbìdi anyì àsàtù paanyimà pàà cyôci aci, wàkaya mu kàlaasà. Nè kuyayè kwà ngàngàbukà, nè ngàngàbukà wàkakèma bikolè! Yèyè kwamba nè: “Kakwèna kùsanganyiiibwa kamanyinu kàà disaamà dyà kànsèrè kàà mu mashi nànsha kàmwè mu mwànà ewu to.” Nwamònu anyì? Mpindyewu, aci mpa cibànzà, mu cyôci, Bukolè bwà Nzambi wa Bukolè bwònsò, bwà kwangata musùlù wà mashi nè kuwùkezula, buludi mùshindù awu, nè—

nè kupingajamù mukùmù wà—wà mwoyi mupyamùpyà. Bwalu, musulù wèbè—wèbè wà mashi ke mwoyi wèbè, wà cifwàkà. Nènku bwà kufùka tubùlù twà mashi tupyatùpyà, nè kusukula kuumusha twà kale! Nè—nè cidici, kakùyì mpatà to cidi. . . Ndi mufwànyine kwamba nùku ewu, ncyenzi cifùki cyà Nzambi wa Bukolè bwònsò; bwà kuumusha musulù wà—wà mashi wùdi mutàpile kishì kàà kànsèrè, mu mùshindù wà nè mwànà mukèsè awu, nè mubidi kapyà wà mèsù kàlaabi, muulàkànàngàne, nè, mu katanci kakesè cyanàànà kàà díbà, musulù wà mashi mupyamùpyà menemene!

24 Ndi ngùtabuuja. . . Ncyàkucyamba mu Dìna Dyèndè to; nèncyámbe mu. . . mu dibuulula dyà diitabuuja dyànyì, civwà cyenzèke ku Sabino Canyon ditùkù adi aci. Ndi ngùtabuuja nè cikondo cikaadi pabwìpì, cyàlujuludiibwà bidimba bìdì bipangike, nè Bukolè bwà butumbì bwà Mufùki. Ndi—ndi ngùtabuuja nè, piikalàbi nè Yèyè ùdi mwà kwenza nè nshindì àmwènèkè, udi kàyì nè. . . Muntu mulùme anyì mukàji nyèyè ewu, mwikàle ànu nè citùpà cyà mubidi cipangike. Kàdi awu's nnyama mujimà, mu yèyè. Yèyè ùdi Nzambi. Mémè ndi—ndi muMunangè.

25 Èè, mpindyewu, mmémè ewu ngaaditu mu abi byena-bwalu, nè tutungunuka ànu nè kwakulapù. Kàdi bantu mbiimàne ku bimanu, nè biimanè mu bibweledi nè mu bibambalu, nè bikwàbò, pa nàнку nèmbwelè buludì mu Dìyiisha.

26 Nènku ndi muswè kwamba nùku, nè ndi muswè kwela Ewu Udi kwònsòkwònsò awu twasàkidila. Nènku, bwalu, leelù ewu, ncìyi mumanyè kantu nànsha kàmwè pa Citampì Ciitánù aci to, nCilwè mu mùshindù wùm wèwùm wè wùdi kawùyì wùm wika awu, mu dindà emu, ànu bu díbà dìm wè kumpàlà kwà kucyàbu, pàmvwà mupàtùke mukasambìle. Nènku leelù ewu. . .

27 Ndi ànu musòmbe matùkù àtaanu anyì àsambòmbò à ndekeelu aa, ànu mu kaacibambalu kakesè cyanàànà, ncyèna mmòna muntu nànsha umwe to. Ndi ànu mpàtuka nkadyà byàkudyà byànyì pàm wè nè—pàm wè nè mulundà kampànda, nè bàm wè bàà ku balundà bàànyì kaaba aka. Nènku, mu bushùwà bwà bwalu, nudi bamanyè mulundà awu, s'mMwanèètù wa balùme nè Mwanèètù wa bakàjì Wood. Èyowà. Nènku—nènku nudi bamanyè's, nè mvwa muyè kuntwaku nè—nè mukashààlekù naabò, nè muntu nè muntu ùdi nè musàngèelu. Nè kì nkwenzèke cintu nànsha cìmwè to, ànu. . .

28 Ndi nteeta ànu bwà kushààla nè Dìyiisha dyà Bitampì ebi adi. Dìdì nè mushinga. Ndi ngùtabuuja nè edi kì—kì díbà dyà cikondo cyà dibuuludiibwa dyàBì, cyà dibuuludiibwa dyàBì.

29 Nènku mpindyewu ndi muswè bwà nwikalè batwìshìibwe mpindyewu, kumpàlà kwà díbà, kumpàlampala, panùdì ànu nè nwàpèci mùshindù, nùfundà bintu binùdì kanùyì numvwa pa—pa Bitampì Mwandamutekètè ebi, pawikalà naabì, nè nùlwe

kubitèeka pa cyambilu. Nènku pàmwápa Mwanèètù Neville anyi muntu kampànda mmufwànyinekù kutèeka kashèete kuulu eku. [Muntu kampànda ùdi wàmba nè: “Kashèete aku nkòkò aka.”—Muf.] Kaa, mònaayi—mònaayi, ndi nyimòna mpindyewu. Mbìmpè nànkù. Mbìmpè bwà nyipetè dilòòlò edì, bwà pàmwápa nyìlongèku katanci, bwà mu dyàlumingu mu dindà. Mpindyewu, kanwikadi, musangu ewu, bwà ewu musangu, kanwikadi nwálwa kucìvwija malòmba, à nwamba nè: “*Cikampànda* ke cileeeji cyà Nyumà Mwìmpè anyi?” Nwamònu anyi? Ndi—ndi muswè kumanya, pa bìndi mulongèshe, nudi numòna’s, bwà twamòna mwà kwangata cyena-bwalu cìmwèpelè eci (bu mùdì Bikondo byà Èkèleeziyà) buludì, nwamònu’s, bwalu cyòci aci’s ke citùdì tutàngila bwalu bwàci mpindyewu.

<sup>30</sup> Mpindyewu, mutùvwà nè cyà kusambidila babèèdì amu, díbà adi aci cidi pàmwápa cikèngela disambila di—dishìllàngàne. Ne paùdì nè dilaabiibwa, udi ubwela bwà cintu cishìllàngàne, nudi bamanyè’s. Ne udi ukèba Nzambì, bwà kujandula nè: “Nekwikalèku muntu kampànda muntwamu dilòòlò edì anyi, Mukalenge?”

<sup>31</sup> “Èyowà, neyìikalè muntu kampànda muvwàle nkanzu wa kàlaabi, musòmbèle mu ditumba dyà ku dyàbalùme. Nè pawàmubiikilà, mubiikilè mu dìnà *kampànda*. Nè ambà nè mmwenzè *cikampànda* nè *cikansanga*. Nè ùdi nè *cikampànda*.” Pashìishe uya mwaba awu utàngila anyi, s’ki yéyè awu. Nwamònu anyi? Ki bwalu mbwòbù abu’s, nwamònu’s. Mbishìllàngàne. Nwamònu anyi?

<sup>32</sup> Kàdi ewu mùshindù wòwò, ndi nsambila nè: “Mukalenge Yesù, dyumvwija dyà Eci dìdì bìshi? Cìmbuulwilèku.” Amen.

<sup>33</sup> Mpindyewu tùpatulààyaaku cyàkàbidì Myelè yètù—yètù yà mvità mu bimànga mpindyewu, nè, Diyì adi.

<sup>34</sup> Nènku ndi ngaanyisha dintwà dyà mpàndà dyà nyumà dyà Mwanèètù Neville, nè dinanga dyèndè dyà bwànà bwètù, paanyimà pàanyi apa, ùnsambidila. Kàbidì, nè dyènù bwònsò pèènù kunùdì aku. Nènku, mpindyewu, bu mùdìbì nè dilòòlò edì mmu diitànù dilòòlò, netùditàcìshèku, ànu bwà kucìvwija bu. . . .  
tudi. . .

<sup>35</sup> Kabyèna mwà kwenzeka nè ùlengè bintu byònsò to. Udi. . . Bwalu, udi mwà kwangata Cyòci aci, ànu cìmwè cyà ku Bitampì abi cyanàànà, nè kushàalapù, kwenda ànu—ànu naaCì dyàdyàdyà mu Mifundu mwònsò, too nè ku ndekeelu. Nwamònu anyi? N’Cìfwànyine kwangata ngondo nè ngondo nè ngondo, kàdi kùyìku ànu mufwànyine kuCìkùmbaja to, bwalu Cìtampì Cyòci ciinè aci—aci cidi cìswìkakaja Mifundu yònsò nkòong, kuumukila ànu ku Genèsè too nè ku Bwàkabuulwibwà, Cìtampì cyàBì cìmwèpelè.

<sup>36</sup> Pa nànkù cìndì nteeta kwenza, cidi, nkubènga kuseesukaKù, nèmfundè Mufundu kampànda, anyi—anyì kantu kakesè apa

mwaba kampànda, nè kubènga. . . Pàndì ànu mutùngùnùke pa cintu cimwèpelè aci apu, bidi bikèngela bwà ngiikalè ngoosha dísù paanyimà, bwalu, ndi ànu. . . Mu kwakula amu, ndi ngàakula mu—mu mùshindù. . . Ndi—ndi ntèkemena nè ke disonsodiibwa dyà cyà bushùwà. Nènku dîbà adi pàndì—pàndì mpwekesha mèsù bwà kumòna. . . Nènku ndi—ndi mbanga kwakula, ndyùmvwa ngenda ngùùmuka ku cyena-bwalu, nènku dimukè, ntangilè paanyimà mu mùshindù mukwàbò, bwà kuteetakù bwà kupeta Mufundu mukwàbò, bwà kufika ku cyôci aci, nudi numòna's, bwà kukenkeshapù ndambù ku lwôlò luseke alu, pamutù pàà kuteeta ànu kacya watùngunuka nè aci nàнку.

<sup>37</sup> Nènku ewu mpindyewu netwikalè mwà kulonga dilòòlò edi, ku ngàsà wa Nzambi, ku dyambulwisha Dyèndè, Cìtampì Ciitànù aci—aci. Nè Cyôci ke cîpi cidîku. Neile ndambù kutàmba cikwàbò aci. Babàndi bànaayi bàà pa tùbalù abu, mpindyewu, bìvwa byònsò nè mvensà yìbìdì, kàdì mu eci mùdì mvensà yisàtù mu cyôci eci. Mpindyewu, Cìtampì Ciitànù cidi cibanga, mu nshapità mwi6 wa Bwàkabuulwibwà, mvensà wa 9.

<sup>38</sup> Nènku, mpindyewu, byôbì mwà kwenzeka nè wikalè mwe—mwenyi udi kàyì mutèèlèje babàndi bànaayi bàà pa tùbalù abu, èè, wèwè. . . Nwamònu's, míngà misangu udi—udi ànu walukilakù paanyimà nè—nè mu mùshindù kampànda ulamikakù kantu kampànda, nè, paùdì wenza nàнку, udi utèkemenakù nè bantu nebàCyùmvwè. Pa nàнку kwòkò kwikàle kacintu kakesè kaùdì kùyì umvwa to, èè, mu mùshindù kampànda anjì ànu kutwàlakù ndambù. Anyì, petà mukàbà wà mèyì ùCitéèlèjè, nènku—nènku ndi mutwishìibwe nè neù—neùpetelèku dibènesha kampànda. Ndi naadi. Ndi—ndi ntèkemena nè udi—udi udìpeta.

<sup>39</sup> Mpindyewu, muntu nè muntu àdilongòlòlè, kuumukila ku mvensà wa 9 mpindyewu too nè ku wa 11, anyì wa 11 mubadilakù.

*Nènku pàakamanàye kukàngula citampì ciitànù, ngàkamòna mwìnshì mwà cyoshelu misùùkà yà aba bàakashebeyiibwà bwà dîyì dyà Nzambi, nè bwà bujaadiki búrwàbo bashààle kacya bààkwàtakù:*

*Nè bààkela lubilà lwà dîyì dikolè, bàmba nè: Ntoo nè ku dîbà kaayi, Éyì Mukalenge, wa cijila nè mulelèlè, kùdì. . . kuwàlumbulwisha nè kusombwela bwà mashi ètù kùdì aba bàdì basòmbèle pa buloba?*

*Nè mizàbì mitòòke yàkafidiibwa kùdì yònsò wa kùdìbo; nè bààkabàmbila nè, bìvwa bikèngela bwà kwanjì kwikishabò bwà ci—cikondo cîpi, too nè pàvwà basadidi naabò kàbìdì. . . bàna bààbò, bàvwà bàkèngelà kushebeyiibwabò bu bwòbò abu, búngì bwàbò kukumbanabu.*

40 Mpindiyewu, eci's ncyà kaciyi cyùmvwika's nànsha twamba. Nènku mpindiyewu bwà bwalu bwà mikàbà yà méyi, nè bwà balombodi bàà èkèleeziyà nè balongeshi bàdi basòmbe kaaba aka, mpindiyewu, pawikalà wèwè nè mmwènenu mushiilàngàne nè Eci; nànsha mémè, mvwa pàanyi nendè. Kàdi mémè ndi nCyàngacila ànu ku disonsodiibwa, didi dishintùlùle wanyi mmwènenu wònsò nkoong pa Cyôci. Nwamònu anyi?

41 Nènku pashiishe ndi mujandùle, paùdi umòna byôbi ebi bìbuuludiibwa nè, Cìdi cìlamakaja nè cìsangisha pàmwè bikondo byà èkèleeziyà abi nè Mifundu, nè cìCiswikakaja. Nwamònu anyi? Nènku ke bwà cinyi mémè ndi ngiitabuuja nè Cidi cifumina kùdi Nzambi. Mpindiyewu, tudi bamanyè aci.

42 Nènku mémè ndi ngèèla meeji nè mîngà misangu tutu tweyemena bìdi mulongeshi munène kampànda mufwànyine kwikala mwambè pa Cyôci aci. Nwamònu anyi? Nè ciinè aci cìdi—cìdi ànu cîmpè. Ncyèna mpiisha mulongeshi awu to, nànsha kakesè. Nè ncyèna mpiisha muntu nànsha umwe to. Ndi mpiisha ànu mpèkaatù, bupidyà; kí mmuntu nànsha unwe to.

43 Nènku bàmwè bantu bàtu bambè nè: “Wèwè utu upiisha malongolodi.” Bwàlà, ncitu ngenza nànkù to. Ntu mémè ntu mpiisha ndongolwelu wa bulongolodi; kí mbantu bàdimu abu to, kasùmbù kàà bantu kàdi kènza bulongolodi abu aku, nudi bamanyè's. Kàdi ndongolwelu udi ubàlombola awu, ke ùndi mème mpiisha, Kàtòlikè nè Mishòonyi, byà mwomùmwe. Ekèlekèle! Nkààdikù. . .

44 Bàmwè bàà ku balundà bàà batàmbe bwîmpè bândi—bândi—bândi mumanyè, mbeena Kàtòlikè, ànu. . .? . . .Nudi bamanyè. . .Nè yèyè muntu awu ùdi mwà kwikala musòmbe kaaba aka dilòlò edì, pàmwàpa bìdi nànkù. Mùshindù wùmwèpelè wutùdi bapetè bwà kwibakisha tabernacle ewu, mbwalu mwena Kàtòlikè kàà cyena-Loomò wàkajuuka è kwimana kuulu ku tubàdi kwàka, nè kwangatayè kaaba kàanyi, nè, balùmyàna wa yààyà, mùdi muntu nànsha umwe kàyiku mwà kwikala mwenzè to. Ncyà bushùwà's. Nè kabàvwakù mwà kucibènga nànsha. Ncyà bushùwà.

Kàdi bwòbò kwamba nè: “Mbenzè makùmi bambè nè: ‘Bantu mbapite búngi.’”

45 Kwambayè nè: “Kaa, kaciyàkwenza myaba makùmi mwandamukùlù yà pamutù mu èkèleeziyà awu, mùshindù awu to.” Yèyè kwambanè: “Èkèleeziyà awu ùdi ùsanganyiibwa mwaba wàwa.” Yèyè kwamba nè: “Mémè—mémè ntu mumanyè mpaasàtà wendè, nè byònsò mùshindù awu.” Kì yèyè kwamba nè: “Èkèleeziyà awu's ùtu mwaba awu.” Yèyè kwamba nè: “Nwènu bakwàbò aba's nudi mwà kusàkidilakù, dîbà adi bwà cinyi bwòbò kabàyi mwà kucyènza?” Mwena Kàtòlikè wa cyena-Loomò, mulundà wanyi mwîmpè. Nwamònu anyi? Èyowà's, mukalenge.



46 Nso—nsongààlùmè udi mwena—mwena Kàtòlikè, mulundà wanyi wa cyà bushùwà wa meeji matòòke, ùvwa ùyiikilangana naanyi, ùvwa nè màkàjiinyi kampàndà à bintu byà byamù, kumpàlà kwà mémè kuumuka, kwambayè nè: “Billy, ndi—ndi mumanyè nè wèwè kùtu witabuuja ndongolwelu wetù wa ntèdeleelu to.” Yèyè kwamba nè: “Kàdi ndi nkwambila mpindyewu mene,” yèyè kwamba nè: “Nzambi mmutwè mushinga bikolè masambila èbè àudì mutùsambidile! Mémè ndi ngiitabuuja nè, wèwè mupetè lutàtu mu ditunga emu,” yèyè kwamba nè, “mwena Kàtòlikè yònsò mu ditunga emu mmufwànyine kulwa kutwà ku cyèbè.” Pa nànkù, nudi numòna’s, aci’s . . .

47 Yèyè nè: “Mwena nkùrusè paanyimà yònsò,” mwàkacibiikilàye. Mémè nèncyàmbè ànu mwàkacyàmbàye yèyè amu. Mu bushùwà bwà bwalu, bwòbò bàdi bàdyàmba nè bàdi cyòci aci bwalu beena Kilistò bàà ku cibangidilu bàvwa bènda nè kùrusè myela paanyimà. Tudi bamanyè aci ku maalu-malonda. Nè bwòbò bàdi bàdyàmba mùdibo beena Kilistò bàà ku cibangidilu abu, nè ncivwàbo, kàdi ndongolwelu mmubùmùshe mu kajila, nudi numòna’s.

48 Nènku bantu abu, mwena Kàtòlikè, anyi mwena Yudà, anyi ní ncinyi cyònsò, mmuntu mufùmìne ku mucì wòwò wùwèwùmwe kutùdi twètù bafùmìne aku. Nwamònu anyi? Ncyà bushùwà. Bàdi—bàdi bantu bàdi bànanga, nè bàdya, nè bànwa, nè bàlààla, ànu mùdi ní nganyi mukwàbò kanà yònsò ewu. Nè pa nànkù katwènakù nè cyà kupiisha bantu-nkààyà nànsha, to, muntu nànsha umwe, nwamònu’s. Kàdi, katwènakù nè cyà kupiisha bantu-nkààyà nànsha.

49 Kàdi, mémè bu mwambi, bùndi naabù mbwà kutuuta nyòka awu, udi usùma bantu abu awu, nudi numòna’s. Nè ncyèna—nè ncyèna nànsha. . . Ànu mémè, nè mémè mwinè ewu, ncivwakù mufwànyine kwenza cyòci aci to bu nè kacivwa mudimu muntùma naawù wà kùdi Nzambi, wùndi mwenzèjìibwe bwà kwenza to, nwamònu’s. Nènku ndi nè cyà kwikala muwùkwàte nè lulamatu nè kushààlakù nè lulamatu lwònsò.

50 Kàdi mwena Kàtòlikè, mwena Yudà, anyi cyònsò cidìye aci, bu yèyè mwà kulwa kaaba aka, bu yèyè mwà kwikala Mùzùlùmanyi, mwela Ngelikà, anyi Orthodoxe, anyi cyònsò cidìye mufwànyine kwikala aci, bu yèyè mwà kulwa kaaba aka bwà kumusambidila, ndi mufwànyine kumusambidila nè meeji matòòke wònsò ànu mùndi mufwànyine kusambidila bàànyì mémè. Mmwòmò. Ncyà bushùwà, bwalu mmuntu. Nè mémè nkàadi musambidilèsambidile ba-Boudhistes, nè ba-Sikhs, ba-Jains, Baamùzùlùmanyi, nè—nè bàà mishindù yònsò, nudi numòna’s, mùshindù awu. Nè ncitukù mbèèla nkonko nànsha; ntu mémè mbàsambidila ànu cyanààna, bwalu mbantu, mmuntu udi muswè kuumvwa bìmpè, nè kuteeta bwà kumuvwijilakù mwoyi mutàmbe kupeepela mu njila mùyaayàye.

<sup>51</sup> Mpindyewu tudi bamanyè, nè, mu cyôci eci, nè bààbúngì bàà kunùdi kaaba aka bândi mumanyè, kùdi bamanyi bàà mabàlà bàà cyà bushùwà bwôbò bakesè mbàbìdi anyi bàsàtù basòmbe kaaba aka. Nè—nè bwôbò abu mbàà meeji matwè, nè bàkaadikù babalèbàle mu—mu malongesha à bakwàbò bantu pa cyena-bwalu eci. Nènku ndi muswè bwà bàna bèètù aba bàmanyè nè mèmè—mèmè ncyèna mpiisha bantu aba nànsha. Ndi ngamba ànu cidi Mukalenge ùndeeja. Nè ki cyònsò cìndiku mèmè naaci ncyôci aci.

<sup>52</sup> Mpindyewu, kacya katùtukù baswè kwikala kwela meeji nè, bwalu mukàjì mukesè kampànda mmusukwidyanganyi wa bilàmbà anyi—anyi nè nsongààlùmè mukesè kampànda mmuludiki wa ditempu dyà nkàsu, kî mmufwànyine kupeta dibuulula kampànda kùdi Nzambi nànsha. Bwalu, nudi numòna's, cidi. . . Nzambi, mu bushùwà bwà bwalu Yèyè ùtu ùDìbuulula mu bupwekèle. Bìdi nè, tuvwa bamòne cyôci aci mu dyàlumingu, bwà kubangilapù cyôci eci, mùdiYe ùDìbuulula mu bupwekèle Bwèndè. Ke cidi cyènza nè Yèyè ìkalè munène ncyôci aci.

<sup>53</sup> Mpindyewu ngǎnji—ngǎnji ànu. . . Ngǎnji ngàmbululèku aci nànkù bwà katanci kakesè cyanààna. Cidi cyènza nè Nzambi ìkalè munène, mbwalu Yèyè ùdi mwà kuDìvwija mupwekèle bikolè. Ke cidi ciMuvwija munène. Nzambi mmunène, kàdi Ùdi mwà kuDìvwija mu mmwèkelu mupwekèle mu mùshindù wà beena lungènyì bàà pa buloba ebu kabàyìku mwà kuMupeta nànsha. Kabèèna ànu mwà kuMupeta to, bwalu Ùtu ùDìvwija mutàmbe kupwekela bikolè. Mpindyewu tàngilàayi. Nènku eci, mu cyôci ciinè, mbwalu busokoka bwà dibuuludiibwa dyà Yesù Kilistò. Nwamònu anyi? Eci, mu cyôci ciinè, bwà. . . Kùdi. . . kakwèna mwà kwikala cintu nànsha cimwè citàmbe Nzambi nànsha. Nè wèwè kwèna mwà kuvwija cintu nànsha cimwè cipwekèle mùdiYe mwà kuDìvwija nànsha. Nwamònu's, ke cidi cyènza nè Yèyè ìkalè munène ncyôci aci. Nwamònu anyi?

<sup>54</sup> Mpindyewu, muntu munène, ùdi yèyè ànu mwà kulwa mutàmbe bunène ndambù, anyi pàmwàpa ùdi mwà kupweka ne kwamba nè: “Bishi?” mwikàle ùkwamba wèwè, nwamònu's, anyi cintu kampànda cyà mùshindù awu. Kàdi kèna mwà kudìvwija mukesè to. Kùdi ànu cintu kampànda kùdiye aku. Yèyè's mmuntu. Kèna ànu mwà kudìvwija mukesè to. Bwalu, pàdiye ùkafika ku dilwa mutàmbe bukesè, dìbà adi, katanci aka anyi, bikèngela àteelè cyàkenzà muntu kampànda mukwàbò, nènku mùshindù awu. Nè dìbà adi ùdi ùbanga kudìbàndisha cyàkàbìdi, nudi numòna's.

Kàdi, njila wa dibànda muulu ùtu ndipweka panshì, mu Nzambi. Èyo.

<sup>55</sup> Beena lungènyì bàà pa buloba bàdi bàteeta, mu lungènyì lwàbò amu, bwà kuMupeta. Bwôbò bàdi ànu bàbànda

bàMushiya, mu kwenza kwà nàнку awu aku. Nwamònu's, beena lungènyì bàà pa buloba, wèwè uteeta bwà kuumvwija cintu kampànda ku makùmi kampànda anyì ku cintu kampànda. Vùlukàayi nè, Yèyè ùkaadi mene mutèèke. . . Mu Bible, mu Bwàkabuul- . . . To, mfwilaayikù luse.

<sup>56</sup> Mu Yeshàayi 35, ngèèla meeji nè mmwômò amu, mùdìbi nè bìdi mene—bìdi bipwekèle mu mùshindù wà nè nànsha mene mu—mu—muntu mupangile bwalu mmufwànyine kuCyùmva. Nwamònu anyì? Kaa: “Nànsha mene muntu mukùtàkàne kààkupàmbukamù to.”

<sup>57</sup> Beena lungènyì bàdi bàcìpìcila ku luseke kule nè kule, ku lungènyì lwàbò alu, bàtamba kuya kule Nendè, mu kuteeta bwà kuMupetela ku lungènyì. Mpindyewu, kanùpukù aci mwoyi nànsha. Aci necìkwaciibwè pa mukàbà wà mèyi, nwamònu's. Beena lungènyì, mu lungènyì lwàbò amu, bàdi bàya kule bwà kuteeta kuMupeta ku lungènyì lwàbò, kuMupangilabo, nwamònu's. Biikalakù banène mu mùshindù mukùmbàne bwà kwikalabò bapwekèle mu mùshindù mukùmbàne, bàvwa bafwànyine kuMupeta. Wikalakù munène mu mùshindù mukùmbàne bwà kulwa mupwekèle mu mùshindù mukùmbàne's wè! Nwamònu aci anyì? Nènku, nudi bamanyè's, ncyà bushùwà nè aci—aci m'Bulelèlà.

<sup>58</sup> Nkààdikù muyè kùdi bantu, mu maabìrò àbò, nè bikwàbò, bàvwa cyà bushùwà bantu, banène, bamfùmù, nwamònu's, nè balombodi bàà makòokeshi maalàbàle, bakòokeshi, nè pa ciibidilo bwòbò abu mbantu banène. Pashiishe, ngàkabwela mu myaba mùdi muntu mwikàle ànu nè bilàmbà byà ùshintulula, pàmwàpa mwambi kampànda uvwa muswè bwà kukòkangana naanyì katanci, kàdi wèwè—wèwè mufwànyine kudyàmbidila nè buloba bujimà kí mbufwànyine kwenda yèyè kàyiku to, nwamònu's. Kàdi aci—aci's cidi ànu mutù mùle, nwamònu's. Kàdi muntu wa mushinga, muntu wa mushinga ùdi ùsòmbela panshì ùteetakù bwà kukufikisha ku didyàmbidila nè *wèwè ke* muntu wa mushinga. Nwamònu anyì? Nwamònu anyì? Yèyè ùdi mwà kudipwekesha.

<sup>59</sup> Nènku, nudi numòna's, Nzambi mmunène bikolè mu mùshindù wà nè Yèyè ùdi mwà kuDìpwekesha, too ne mwaba kampànda, mu mùshindù wà nè muntu wetù ewu kènàku mwà kupweka kufikapù to, nudi numòna's. Ke cyònsò cidiku. Nènku mu lwàbò. . .

<sup>60</sup> Kàdi bwòbò bàdi bàteeta bwà kuMupeta. Mpindyewu tàngilàayi. Bàdi bàteeta bwà kuMupeta mu kutùma kwà bàna mu tulaasà, nè kupetakù dipòlomè dyà Bu Licencié. Nè—nè bàdi bàteeta bwà kuCìpeta ku ngaakwilù wa ku tèdlòjì wa—wa—wa—wa Bible. Nè bàdi bàteeta bwà kuMupeta ku ndongamu yà bulongeshanganyi, nè ku ndongamu yà malongolodi, nè mu kuvwija kwà bintu bilwa bilenga kumòna, nè kuteeta bwà

kupeta. Yèyè kèna aku to, nànsha kakesè. Cinùdì nudi ànu nulwangana nè lupeepèlè, kwàjiki. Nudi—nudi nuseesuka nuya kule naaCi.

<sup>61</sup> Bu nè bàvwakù mwà kwikala bàà mushinga mu mùshindù mukùmbàne bwà kwikala—bwà kwikala bapwekèle mu mùshindù mukùmbàne, bàvwa mwà kuMupetela mu awu njila, mu kwikala bapwekèle. Kàdi pàcidìbi ànu nè nuyààya batàngile ku lungènyi, nuyààya kule Nendè.

<sup>62</sup> Mpindyewu ngànji ncyàmbè mu mùshindù wà kanùyì mwà kucìpìcila ku luseke nànsha. Panùcidì ànu nuteeta bwà kupetela Nzambì ku lungènyi, mwàkadìbi mu budimi bwà Èdènà, mwàkadìbi mu matùkù à Mòsà, mwàkadìbi mu matùkù à—à Noà, mwàkadìbi mu matùkù à Kilistò, mu matùkù à Yone, mu matùkù à bàpostòlò, too nè mu ditùkù edi! Panùdì nuteeta bwà kudifwànyikijilaCi, nè nuteeta bwà kupetela Nzambì ku lungènyi, nuyààya kule Nendè dìbà dyònsò. Nudi nuteeta bwà kuCyùmvwà. Kakwèna mùshindù wà kucyènza to. Cìtàbè wèwè ànu cyanàànà. Nwamònu anyi? Cìtàbùùjè wèwè ànu cyanàànà. Kùteeci bwà kuCyùmvwà nànsha.

<sup>63</sup> Ncyèna mwà kuumvwà nè mbwà cinyi, bidi ne, èè, bintu búngì cyanàànà. Bintu bìndì ngùmvwà anyi bìndì mwà kuumvwà kí mbyàbúngì to. Ncyèna mwà kuumvwà mùdì mwànà mukesè udi musòmbe apa ewu ùdya cyàkudyà ànu cyòci cimwècimwè cindi mèmè mwà kudyà aci, kàdi—kàdi, s'ki yèyè ewu, nè nsukì ku mutù kujimà, kàdi mèmè nciyi naayi to. Ncyèna ncyùmvwà to. Bàtu bàngambila nè kàlìsiyumù nkàdi kàyènza; pàányi nzàdi anyi yà ku minu ndi nkòsa cibì yàlukila ànu lukàsà, eku nciyikù nè nsukì miinè yà kukòsa to nànsha mikesè. Aci ncyèna mèmè ncyùvwakù to. Mùdì kasùmwinù kàà kale kàmba, ndi . . .

<sup>64</sup> Kabyèna ànu bwà kushintulula mwaba wà kwikadila, anyi dísù dikolesha to; ne, nCyà dísù dikolesha bushùwà, kàdi ncyèna mwanjì kufika ku Cìtampì to.

<sup>65</sup> Mùdì ngombe mufiike mwà kudyà mashindà à màyi à matàmbà, kàdi ùfla mabèlè matòòke, àdi àvwànduluka nè àndamuka màntekà à kàlaabi! Ncyà bushùwà nè ncyèna—ncyèna mufwànyìnekù kuumvwija aci to, nwamònu's. Mbwalu, nudi numòna's, cyònsò nè cyònsò ncipeta cyà ku cikwàbò. Nè mùdìbi byènzeka nànkù, ncyèna mwà kubyùmvwijakù to.

<sup>66</sup> Ncyèna mwà kuumvwija mùdì bilòngò bibìdì byà mbata bijuuka, anyi bilòngò bibìdì, byà dimiinu dya mwomùmwè, kàdi cimwè cikúnze, nè cikwàbò cyà kàlaabi, nè cimwè cifìkùlùke, nè cimwè cyà bùlè. Ncyèna ncyùvwà to. Dìbà ànu dyòdì òmòwèdimwè adi pa byòbì. Diikala adi dìdì difùmina penyì? Nwamònu anyi? Mèmè—mèmè ncyèna mwà kucyùmvwijakù to, kàdi pààbì's bikèngela bwà ùcìtàbè.

67 Ndi ànu njinga bwà mwena tèòlòjì munène kampànda àngumvwijèku mùdi buloba ebu bwimàne mu mpoko udi mabùlùngà ànyùngulukila. Ndi njinga bwà ùnkùpìlèku ndundu muulu mu lupeepèlè, mwikàle ùnyùngulukila, kàdi dyènzèku didìnyùngulukila diibìdi, mu kaaba kàmwèkàmwè aku. Kwènàku mufwànyine kucyènza to. Kàdi pààci eci's ncitèèkìibwe ànu menemene pa dībà jaajaaja mu mùshindù wà nè bàdi mwà kudyànjlila kwamba lundimbà lwà dībà dyà muulu pa kasunsa mene, mu bidimu makùmi àbìdi kuumukila ku mpindyewu. Kabeenàku ne dībà dyà ku dibòko anyi dyà ku cimanu, anyi ndongolwelu kampànda wa màshinyi, udi nè bupwàngànè bwà mùshindù awu nànsha. Kàdi pààbù's mbwimàne mwaba awu. Nè, pashishe, mbwinàmine cyànyimà. Kàdi bu nè bùvwa mwà kubàndulukakù ànu kakesè ndambù? Èyowà's. Wèwè's udi udìvwija ànu wèwè mwinè mukùtākàne, mu kuteeta amu, wamònu's.

68 Pa nànkù, udi umòna's, kùteeci bwà kupeta lungènyi, bwà kuumvwa to. Itàbùùjā ànu cyanàànà cidiYe wàmba aci. Nè paùdi mwà kutàmba kulwa mupwekèle apu, dībà adi ki bwalu mbwòbù abu, nèuCìpetè. Mpindyewu, mèmè ndi nè kusàkidila kwàbùngi bwà cyòci aci, nè kusàkidila kwà nè Yèyè ùdi, mmuDìvwijè mupwekèle. Mpindyewu, tudi tupeta, nshapità mwi6 ku mvensà wa 9. Ngānji mbangè mpindyewu.

*Nè pààkamanàye kukàngula cìtampì ciitànù,  
ngàkamòna mwinshì mwà cyoshelu misùukà  
yàkashebeyiibwà bwà dīyì dyà Nzambì, nè bwà  
bujaadiki . . . bùvwàbu bashàale kacya bàkwàtakù;*

69 Mònaayi nè, kakwèna ditèèla dyà cikwàbò Cifùkìibwà, anyi Cifùkìibwà cidi nè mwoyi—cidi nè mwoyi nànsha cìmwè to, ku dimanyisha dyà Cìtampì Ciitànù eci. Mpindyewu vùlukàayi nè, cìvwakù, pa Cìtampì Ciināyi. Cìvwakù, ku Cìtampì cyà Kumpàla, Ciibìdi, Ciisàtù, nè Ciināyi aci, kàdi nànsha cìmwè apa nùnkù. Nwamònu anyi?

70 Mpindyewu, bu nwènu mwà kumòna, twānjāayi kubalulula, cìmwè cyà ku Bìtampì abi. Twānjāayi kwalukila ku Cìtampì Ciināyi, nwamònu's. Nè nku mvensà wa 7.

*Nè pààkamanàye kukàngula cìtampì ciināyi,  
ngàkumvwa dīyì dyà cìfùkìibwà ciināyi dyàmba  
nè: Lwà . . . ùmonè.*

*. . . pààkamanàye . . . kukàngula cìtampì ciisàtù,  
ngàkumvwa dīyì dyà—dyà cìfùkìibwà ciisàtù aci  
cyàmba nè: Lwà ùmonè.*

*. . . dyà cìfùkìibwà ciibìdi . . . Lwà . . . ùmonè.*

*. . . nè cìfùkìibwà cyà kumpàla cyàmba nè: Lwà  
ùmonè.*

71 Kàdi pashiishe patùdi tufika ku Cítampì Ciitânù, kakwèna Cifùkìibwà nànsha cimwè to. Mpindyewu mònaayi ànu cyanààna.

*Nè pààkamanàye kukàngula cítampì ciitânù,  
ngákamòna mwìnshì mwà cyoshelu . . .*

72 Nè lùkàsà lwònsò's! Nwamònu's, kakwèna—kakwèna Nyama nànsha umwe mwaba awu to. Nè Nyama ùdi ùleeja bukolè kampànda. Tudi bamanyè nànkù, nwamònu's. Kakwèna Cifùkìibwà cidì nè mwoyi nànsha cimwè to.

73 Mpindyewu, cimwè cyà ku Bifùkìibwà abi, tudi tujandula, mu kulonga kwà di—di—dibuulula mu èkèleeziyà ayi nè, cimwè cyà ku byôbì cívwa nè . . .cívwa nyama wa ntambwe; nè cìkwàbò—cìkwàbò cívwa ngombe; nè cìkwàbò cívwa muntu; nè cìkwàbò cívwa nyuunyi wa mukànkù. Tudi tujandula, mu Bikondo byà Èkèleeziyà nè Nyama yinaayi ayi, idi miikàle yùmvwija makolè ànaayi, yívwa misangisha mu nyùngulukilu wa Byenzedi byà Bàpostòlò, ànu mùshindù wùvwà ntentà wa—wa kusambakeena mu cipèèla amu. Nè nwènù nudi nucyùmvwa, bwalu ncyàkwangata díbà bwà kubwelamù nànsha. Mutùvwa bacizòle kaaba aka, nè bacìleejè ànu menemene's! Yívwa yílama Cyôci eci, Mwànà wa mùkòòkò nè Dìyì, bwà kwenza Dìyì ànu menemene mwàkenzàbò mushèètè wà—wà cipungidi mu Mwaba wà Cijila mu cipèèla amu, nè bikwàbò.

74 Mpindyewu, tuvwa mene baleejè bilondèshìle myaba, ku meekala à bisàmbà byà Izàlèèlà, nè ku . . .Mbanganyi bàvwà batèèlèje bikondo mwandamutekètè byà—byà èkèleeziyà? Ngèèla meeji nè mbààbùngì bàà kunùdi, cyàbibìdi cimwè, byàbisàtù bibìdi byà kunùdi. Mònaayi nè, nànsha mene ngiikàdìlù wa Nyama awu ùvwa menemene ànu dibèndelà dyà cisàmbà, mùshindù ùvwà yinaayi ayi . . .bisàmbà dikùmi nè bibìdi abi bitèèkìibwe, bìnaayi ku luseke lwònsò, anyì—anyì bisàmbà bisàtù ku luseke lwònsò. Nènku Nyama yinaayi ayi yívwa misòmbe miikàle yílama, bisàmbà ebi, kuumukila ku njila yònsò yinaayi.

75 Nènku, díbà adi, twàyi è kwangata Èvànjeeliyò ayi, nè kuleeja ànu menemene. Paùdi ubwela mu mutàngila ku mushèètè, yòyi ayi nyívwa yílama mushèètè, cipungidi. Nè pashiishe tudi tujandula nè cipungidi cyà Èkèleeziyà mupyamùpyà awu, cìfwànyikijilu Cyèndè pa buloba, cívwa n'Nyumà Mwímpè. Mashi àvwa maalùje, kutùdi, Nyumà Mwímpè. Nè Nyama yinaayi ayi yívwa yìleeja, nè bu bi—bisàmbà dikùmi nè bibìdi byà Izàlèèlà, pàvwayi yílama apu. Nè kusangana ngiikàdi yàbì, nè kwangata ngiikàdìlù umwèumwè awu nè kulwa nendè ku yònsò wa ku Èvànjeeliyò yinaayi ayi, menemene, bìvwa menemene byà mwomùmwè. Umwe ùvwa wàkula nè nyama wa ntambwe, mukwàbò wàkula nè ngombe, nè

mukwàbò. . . Èvànjeeliyò yìnaayi ayi! Ki cyòci aci's. Èvànjeeliyò yìnaayi ayi ndikùbiibwa dyà kùdi Nyumà Mwîmpè. Amen.

<sup>76</sup> Ntu misangu yònsò ànu ndikonka. . . Citu ànu cishààle cindamàte. Mpindyewu, bidimu bitwè ku bisambòmbò mbyòbì ebi, ngèèla meeji, kacya ngúmwa muntu munène kampànda wàmba nè aci cìvwa. . . “Byenzedi byà Bàpostòlò bìvwa ànu mwaba wà kwimanyinapù bwà kwibaka.” Nkàadi mucyũmwè bacyámbe misangu nè misangu. Kàdi kuumvwa muntu wa cipimu cyèndè aci, bu muyiishi nè bu mulongeshi, utu mufunde yimwè yà ku mikànda yitù myèndè luumù yìkaadi bantu babalèbàle myaba yònsò, kàdi kwamba nè Byenzedi byà Bàpostòlò mu bushùwà bwà bwalu kabivwa bikumbànyine kwikala bwà dilongesha dyà Èkèleeziyà to!

<sup>77</sup> Pààbì, Byenzedi byà Bàpostòlò's ke cishìmikidi ciinè Cyèndè; kî mmwaba wà kwimanyinapù bwà kwibaka nànsha. Ncishìmikidi! Bwalu, Bible ùdi wàmba nè ci—ci—ci—cishìmikidi cyà Nzambì “nciibakila pa Dilongesha dyà bàpostòlò,” cyà bushùwà, “Kilistò, Mutù, Dibwe dyà mu ditumba.”

<sup>78</sup> Kàdi pàakajuukà muntu ewu mwaba awu ne kwamba diyì adi, mvwa—mvwa—mvwa—mvwa ànu. . . Mwoyi wànyì wàkamba kwimana. Ki mèmè kudyàmbidila nè: “Kabyènakù bikèmesha nànsha.” Èè, ndi mmòna mpindyewu, mu Bitampì. Kacivwa ànu cyanji kubuulula nànsha. Ki cyònsò cidiku. Nwamònu anyi?

<sup>79</sup> Pa nàнку, aci, ki bwòbò abu bàvwà mwaba awu, biimàne mwaba awu, kàdi kùvwa ànu cintu kampànda cyàmba cyòci aci. Mpindyewu, mònaayi, bwòbò bàdi bàlama.

<sup>80</sup> Mpindyewu, patwàkangatà Maatàayi 28.19, nè twètù kwendesha cintu aci mu Maatàayi mujimà amu, cìvwa cìleeja nyama wa ntambwe. Nènku mu dilwa, mwómò amu, tudi basangàne menemene bwà cinyì bàdi bàbàtiiza mu Dìnà dyà Yesù Kilistò. Nènku ki Yèyè awu mwimàne mwaba awu nè wòwò Mufundu mene awu, bwà kulama cibùcilu cinsantu cyà dibàtiiza dyà Dìnà dyà Yesù Kilistò. Èyo. Èè, ki mèmè ukàadi upàmbuka nya mu Bikondo byà Èkèleeziyà mpindyewu ewu's.

<sup>81</sup> Mònaayi's. Kàdi, apa, patùdi tufika ku Cítampì Ciitànù eci mpindyewu, kakwèna—kakwèna—kakwèna kùpàtuka mubàndi wa pa kàbalù nànsha umwe to, nè kakwèna Nyama nànsha umwe bwà kuCimanyisha to. Yonè ùvwa ànu. . . Mwànà wa mùkòòkò wàkaCikàngula, ke Yone kuCimònayè. Kakùvwa muntu nànsha umwe mwaba awu bwà kwamba nè: “Mpindyewu lwàkù, ùmonè. Lwàkù, ùmonè” to. Mònaayi nè, kakùyì bukolè nànsha bùmwe bwà Cifùkiibwà cidi nè mwoyi nànsha. Anyi kakùyì. . .

<sup>82</sup> Nènku pa Cítampì Ciisambòmbò, kakwèna Nyama nànsha umwe bwà kuCimanyisha to. Nè pa Cítampì cyà Mwandamutekètè, kakwèna Nyama nànsha umwe bwà kuCimanyisha to. Kakwèna makolè bwà kuCimanyisha to.

Nwamònu's, muntu nànsha umwe kèna ùcyènza to. Pa... Tàngilàayi. Pa... Paanyimà pàa Cìtampì Ciiñayi, kakwèna dimanyisha nànsha dimwè dyà bukolè bwà Nyama kampàndà to, kuumukila ku Cìtampì Ciiñànù, Ciisambòmbò, anyi cyà Mwamamutekètè, nànsha kakesè.

<sup>83</sup> Mpindyewu mònaayi. Mémè ntu munangè aci. Ànu mùvwàbi mu bikondo byà mubàndi wa pa túbalù tùnaayi atu, mubàndi (ku bùmwè) wa pa túbalù tushilàngàne tùnaayi atu awu, kùvwa Nyama uvwa umanyisha bukolè abu. Musangu wònsò wùvwà mubàndi awu ùbànda cibelu eku cibelu eku pa kakwàbò kàbalù nè ùpàtuka bwà yéyè kwendelapu, Nyama wa mùshindu mukwàbò nguwwa upàtuka nè ùcimanyisha nè: "Aci mbwalu busokoka kampànda bunène." Nwamònu anyi? "Aci mbwalu busokoka bwinè." Bwa cinyi? Ùmanyisha bwalu busokoka abu.

<sup>84</sup> Kakwèna nànsha umwe pa Cìtampì Ciiñànù apa, bwà ku Cìmanyisha bwà cinyi? Ncyòci eci, bilondèshile dibuulula didi Mukalenge Yesù mumpèeshe leelù ewu, nwamònu's, anyi mu dindà emu, pa bwebwebwe. Mbwenà kwamba nè, aci, bwalu busokoka bwà bikondo byà èkèleeziyà bikaadi mbimanè kujika, pa dîbà edi. Bwalu busokoka bwà mufwilakanyi nè Kilistò mbubuulùdiibwe, pa dîbà edi. Mufwilakanyi nè Kilistò wàbàndi pa kàbalù kèndè kàà ndekeelu, nè twàmusinganyi pa kàbalù kàà cisengàsengà aka, kasambakaja nè meekala èndè àbùngi, nè wèndela pa kàbalù ùkabwela too nè mu dibùtuka.

<sup>85</sup> Tudi tucyàngata pa Mpungi, nè bikwàbò, patwàlongeshà cyòci aci. Ndi mufwànyine kuyakù mpindyewu, kàdi netùpatukè cyàkàbìdi mu cyena-bwalu. Nènku tudi—tudi tuya... ùdi wèndela pa kàbalù... .

<sup>86</sup> Ke bwà cinyi kakwèna muntu nànsha umwe mwaba awu to. Mpindyewu, katwèna nè kiipàcìlà kampànda kafùnda to, tubingilà kampànda bwà bwalu kampànda. Mpindyewu, vùlukàayi nè, kumpàla, ku cibangidilu, mvwa ngamba nè kakwèna mwà kwikala cintu nànsha cimwe kakùyì kabingilà nànsha. Nudi bavùlùke kaadimata kakesè kàà màyi à mufùndu aku anyi? Nwamònu anyi? Mpindyewu bikèngela ùpetè kabingilà. Èè, kùvwa kabingilà kampànda kàvwà kènzè nè kabivwa bikèngela bwà kabìikadi nè Nyama kampànda, anyi bukolè kampànda to, bwà kumanyisha Cìtampì cidi cìlamunyiibwà eci. Nènku ànu Nzambi ngudi mwà kubuulula nè mbwà cinyi, ki cyònsò cidiku ncyòci aci, bwalu cyònsò—cyònsò Cidi cìsanganyiibwa munda Mwèndè.

<sup>87</sup> Kàdi kabingilà kàdi Ye ùcibuulwila, bu mémè mwà kuumvwa bîmpè, mbwalu bwalu busokoka bwà Mukànda wà Bupikudi, bwà bìdi bitàngila mufwilakanyi nè Kilistò mubuuludiibwa; nè dîbà dimwèdimwè adi, Èkèleeziyà mmuyè, nè bintu ebi kabyèna byènzeka mene munda mwà cikondo cyà èkèleeziyà to, nànsha kakesè. Ncyà bushùwà. Bidi—bidi kule nè cikondo cyà



èkèleeziyà. Kakùyi mpatà to Èkèleeziyà ùkaadi mwambwibwe pa díbà edi. Èkèleeziyà ùdi ùbànda, mu nshapità mwi4 wa Bwàkabuulwibwà, nè kèna wàlukila to too nè pàalukilaYè pàmwè nè Mfùmù Wendè, mu nshapità wa 19. Kàdi Bitampì ebi kaaba aka bìdi bibuulula bìvwàku, bìdiku, nè bìikalàku. Nwamònu anyi? Nènku, mpindyewu, bwà bìvwà nè cyà kwikala bwà cikondo cyà èkèleeziyà, bìvwà bibuulùdiibwe kùdi Bitampì ebi. Nènku mpindyewu tàngilàayi cìdi cìCyàngatà.

<sup>88</sup> Bitùpà binaayi byà mubàndi wa pa kàbalù byàbuulùdiibù. Bitùpà binaayi byà mufwilakanyi nè Kilistò, wèndela pa kàbalù, mbibuulùdiibwe pa díbà edi, ki bwà cinyi kabyèna bikèngela bwà kwikalabò kàbìdi naabi to.

<sup>89</sup> Nè kùvwa Bifùkiibwà bìdi nè mwoyi binaayi byà Nzambì, bwà kumanyisha mubàndi wa pa túbalù pàvwàbo bèndelapù apu. Nyama yinaayi mmakolè ànaayi. Mpindyewu, tudi bamanyè nè *Nyama*, ku dymvwija dyà ngaakwilù wa bimfwanyi byà Bible, mbwena kwamba nè “bukolè.” Mpindyewu, twàngatàayi aci nè ntèmà. Yinaayi ayi n’Nyama, mu Bible, cìdi cìleeja bukolè kampànda munkaci mwà bantu.

<sup>90</sup> Mpindyewu, bu twètù mwà kujandula, bu mùdi mu Danyèlè, pàakamònyè ditunga kampànda dijjuuka, cìvwa cìfwànyine pàmwàpa kwikala nyama wa ours mukwàte lubadi mu luseke lwèndè, mu cimfwanyi. Pashiishe kumònyè bukolè bukwàbò bùjuuka, mbùji. Cìvwa cìleeja cintu kampànda. Pashiishe kumònyè bukolè bukwàbò bùjuuka, nè—nè cìvwa nyama wa nkàshààmà mwikàle nè mitù bùngi kampànda. Cìvwa cìleeja bukalenge kampànda. Pashiishe kumònyè bukwàbò ùjuuka, nyama munène wa ntambwe mwikàle nè ménù, nè—nè wàkadyatakaja bìvwà bishààle. Aci cìvwa cìleeja bukwàbò bukolè bushiilàngàne, mu byònsò. Bùmwè bùvwà mbu—mbukalenge bwà Nebùkàndànèèsà; nè bukwàbò, mùshindù wà—wà cilòòtà. Danyèlè wàkamòna cikèèna—kumòna; Nebùkàndànèèsà wàkalòòtà cilòòtà. Kàdi Danyèlè wàkumvwija cilòòtà cyèndè aci, nè cìvwa cìpetangana ànu menemene nè cikèèna—kumòna aci.

<sup>91</sup> Amen! Yoyòyò! Kaa! Bu nwènù ànu bamanyè cyàkenzekà’s! Cyàkenzekà kumpàlà kwà twètù kuumuka kaaba aka ncinyi? Nudi bumvwè anyi? Mòna’s, bilòòtà bisambòmbò bilondàngàne abi byàkalwà biikàle bikumbànàngàne ànu menemene nè cikèèna—kumòna aci. Amen. Nwamònu anyi? Cilòòtà, cyòci cyumvwija, ncikèèna—kumòna. Bwalu muntu yèyè kàyì pàmwàpa mulela nè kandòndò kàà mwoyi bwà kushààla, kwikala mutàbàle pàdiye ùcimòna apu, díbà adi Nzambì ùdi ùya mu kandòndò kàà mwoyi aku nè wàkula nendè. Byòbi biinè, Yèyè mmulayè aci, mu bilòòtà, mu matùkù à ndekeelu nè, Ùvwa mwà kumwènekela bantu, kàbìdi nè mu bikèèna—kumòna. Nwamònu anyi?

<sup>92</sup> Mpindyewu, cikèèná-kumòna mpaùdi mutàbàle nè mèsù matonona, mwimàne ànu nùnkú ewu, nè bintu kampànda biikàle bibuuludiibwa. Nènku udi mwimàne, ubàmbilaci buludì; umòna cìdì cyenzèke, nè cìikalà mwà kwenzeka, nè bikwàbò.

<sup>93</sup> Kàdi, mpindyewu, cilòòtà mpaùdi mulààle tulù, nè byumvwilu byèbè bitaanu abi kabìyì mu mudimu to, nè wèwè—wèwè mwikàle mu kandòndò kèèbè kàà mwoyi. Udi usanganyiibwa mwaba kampànda, bwalu, paùdi walukila, udi uvùluka mwaba wùvwà usanganyiibwa awu, ucìvùluka matùkù èbè wònsò à mwoyi. Nwamònu anyi? Pa nànkú, nkandòndò kèèbè kàà mwoyi. Dìbà adi bwà, nwamònu's. . .

<sup>94</sup> Mùvwà Congressiste Upshaw nè ciibidilu cyà kwamba nè: “Kwèna mwà kwikala cintu kampànda cyùdi kùyì to.” Nènku aci's cìdì ànu cyàmba kwikala cyà bushùwà, nwamònu's.

<sup>95</sup> Nènku dìbà adi, wèwè mulela mwena lùmùnò, mpindyewu, udi umòna's, bwà kwenza nànkú, bìdì bikèngela bwà twondò twà mwoyi twònsò tùbìdì atu kwikalatù pàmwè menemene; kí nkàmwè kiikàle *apa* nè byumvwilu bitaanu, mu mudimu, kakwàbò *apa* nùnkú paùdi mulààle tulù nè byumvwilu bitaanu ebi kabìyì mu mudimu to. Kàdi, nudi numòna's, pàdì twònsò tùbìdì atu, udi mulela, twikàle pàmwè menemene, kwena muyè mu tulù to. Wèwè udi ànu umuka ku aka uya ku kakwàbò, mùshindù—mùshindù awu. Kwèna uya mu tulù to. Kakwèna mwaba mukùmbàne bwà wèwè kuya mu tulù to. Nè kwèna mwà kudìvwija wèwè mwìnè mùshindù awu to.

<sup>96</sup> Pa nànkú: “Mapà nè mabiikila mmadyànjila kulongolola kùdi Nzambi.” Wòwò—wòwò mmapà nè mabiikila à Nzambi, mene “kâyi à bànyingaleela to,” mùdi Bible mwambè. Nwamònu anyi? Àkaavwa malongolola kumpàlà kwà difùkà dyà dyulu nè buloba. Nwamònu anyi?

<sup>97</sup> Mpindyewu, mpindyewu, tudi tujandula nè nyama, wa mu Danyèlè awu, ùvwa ùmvwija nè ùvwa mbukolè kampànda bùvwà bùjuukà munkaci mwà cisàmbà. Èyo. Nè—nè bikèèná-kumòná byà Yone kaaba aka, byòbì pààbì, bìvwà bìleeja nè àvwà mmakolè, matùnga miikàle àjuuka. Cìleejilu, États-Unis ùdi ùmwènèka mu Bwàkabuulwibwà 13, bu mwànà wa mùkòòkò. Nè dìbà adi nwènù baswè kumanya, bintu bishìilèshìilàngàne. . .

Wèwè udi wamba nè: “Èè, aci, aci's cìdì cyàkula bwà bukolè bwà ditùnga.”

<sup>98</sup> S'cìtu kàbìdì cìleeja bukolè bwà cijila, kàbìdì, nyama. Uvwakù wèwè mumanyè nànkú anyi?

<sup>99</sup> Mònaayi Leebèkà; pàvwà—pàvwà mu—musadidi wa Abraham awu, Eliyèzà. . . Pààkalwàye bwà kwangata Leebèkà, yèyè. . . Wàkamubàndisha pa kaameelù, kaameelù kiinè kààkanwishàye màyi aku. Nè wàkendela pa kaameelù aka, bwà katwilanganayè nè mubàki wendè uvwa kàyì ùmwènèka awu.

Cintu ciinè cyàkanwishàye mâyi aci, ke cintu cyàkamufikishà ku cisòmbedi cyèndè cicivwà cilwa nè kùdì bàyèndè.

<sup>100</sup> Nènku ncintu ànu cyôci cimwècimwè aci leelù ewu, nwamònu's. Cintu ciinè cidì Èkèleeziyà munkaci mwà kunwisha mâyi aci, n'Dimiinu, Dimiinu dyà Dìyi. N'Dìyi diinè didì dılwa nè mwoyi nè dıt̀wàmbula dıya neetù kùdì Mubàki wetù udi kàyì ùmwènèka awu. Nwamònu anyi? Nwamònu anyi?

<sup>101</sup> Nè tàngilàayi mùdìbi bipwàngàne menemene. Izàkà ùvwa muumùke kumbèlu, nè ùvwa ùsanganyiibwa mu madimi, kule nè kumbèlu, pàakamumònà Leebèkà.

<sup>102</sup> Nè Èkèleeziyà ùdi ùkatwilangana nè Kilistò mu mpeepèle, nè pashiishe Ùdi ùMwaluja mu Nzùbu, Nzùbu wa Taatù, mùdì nzùbu myalàbàle milongolola. Izàkà wàkangata Leebèkà mùshindù wùmwèwùmwè awu.

<sup>103</sup> Nènku, mònaayi nè, cıvwa ndinanga ànu ku cimwènenyi cyà kumpàla. Kaa, ekèlekèle! Wàkaasa lubilu bwà kuya katwilangana nendè.

<sup>104</sup> Nènku mùshindù awu ke wàyà Èkèleeziyà bwà katwilangana nè Kilistò, mu mpeepèle, nè kwikala Nendè bwà kashidi.

<sup>105</sup> Mpindyewu, mu ngaakwilù wa Bible, Nyama eyi mmakolè. Mònaayi's. Ndi muswè, mpindyewu, ndi muswè bwà nùmonè.

<sup>106</sup> Dyabùlù ùvwa nè nyama yèndè yinaayi, yà yishintuluka, yà meekala, yà kupàtuka mubàndepù. Ùvwa nè nyama yèndè yinaayi. Cıvwa nyònsò yisàtù ayi, myela mu diikala dyà umwèpelè, nè mivwijè umwèpelè awu kàbalù kàà—kàà cisengàsengà; kàbalù katòòke, kàbalù kakùnze, kàbalù kafiike. Nè tudi bamòne nè, kwònsò kàà ku twòtò atu kàvwa nçitùpà cyà mudimu wèndè wà bwambì, citùpà cyà èkèleeziyà wa ku cibangidilu uvwa mudyènzè dıngumba awu, ku Nicée. Èkèleeziyà wa Mpenta wa ku cibangidilu awu, mwinè wàkiicikijilabò Nyumà Mwimpè awu, mu kwenda kulwa amu, wàkangata nyumà mufwilakanyi nè Kilistò, kwenzayè bulongolodi, kulelayè ndambù wa bàna bàà bakàji bàà mu malongolodi. Wàkashintulula bukolè bwèndè, misangu yisàtù, nè kubùtèekayè mwaba wùmwè, nè kwenzayè kàbalù kàà cisengàsengà. Nè pashiishe kupèèshiibwayè dınà dyà Lufù, nè kwendayè mubàndèepù too nè ku dibwela dyà mu Cyèndèlèlè. Aci's nçitòòke nè mwàci mwònsò! Mpindyewu, mpindyewu mònaayaaku, mmupèèshiibwe kàbalù aka—aka, nè ùdi wèndelapù.

Nzambì, Nzambì ùtu nè, kàbìdì, mùtùbi misangu yònsò. . .

<sup>107</sup> Mpindyewu tàngilàayi. Pàakamwènèkà mufwilakanyi nè Kilistò, dyàmbedi, wàkamwènèkela mu cinyi? Kàbalù katòòke. Nwamònu's, mòna's, kàyì nè bubi bwenza to nè mwèndè mwònsò, ànu dilongesha cyanàànà mu èkèleeziyà. Bàvwa bàkèba

bwobùmwè. Bwobùmwè bwènù mbwà nè Kilistò. Kàdi bôbò bàvwa bàkèba bwobùmwè kampànda. Kabàvwa ànu mwà kucitwàla nànsha, bàvwa baswè kupeta . . .

108 Èè, nudi bamanyè's, cileeji lu tuumàngumba tukesè tùdi mwà kujuka mu èkèleeziyà. Nwènù, nudi bacimanyè, nwènù bampaasàtá. Nwamònu anyi? Bwôbò, ànu mùtùbo bàmba nè: "Nyuunyi yà masala mafwànàngàne." Kàdi twètù balediibwe cyàkàbìdì, bânà bèètù, alu lwidì kì ndwà kwangata nànsha, nwamònu's. To. Mpindyewu, twètù—twètù—twètù . . .

109 Twètù bamòne cintu kampànda cyà cibi mu bânà bèètù, túsambilàayi ànu cyanàànà nè tucilamaayi kumpàla kwà Nzambì, nè tùnangàayi muntu awu too nè patwàmubwejà mu Bwikadi bwà Nzambì mene. Nwamònu anyi? Ke mùshindù ngwòwò awu, mùshindù wà cyà bushùwà wà dicyènza.

110 Nudi bamanyè, mwàkambà Yesù's. "Nekwikalè bisoosa bibì mwómò amu," bwalu Yesù ngwàkamba nè bìvwa mwà kwikalàmù awu, "kàdi kanùbìjuudi to; nenùjuudilèku nè blé." Nwamònu's: "Bilekèlaayi ànu pàtupù." Yèyè ngwènza . . . Mulekèlaayi Yèyè ènzè disunguluja adi pààlwàYe. Nwamònu anyi? Nùbilekèlaayi bìkolelè pàmwè.

111 Mònaayi, pàvwà nyama awu ùpàtuka, mufwilakanyi nè Kilistò ùvwa ùpàtuka mubànde pa nyama kampànda, bwèndè bukolè's.

112 Kaa, ndi munangè cyôci eci's! Ndi ànu mbanga kuumvwa bwena Nzambì bumbwela mpindyewu mene, nwamònu's, pàmwàpa ndisaluka's. Mònaayi, pàvwà mufwilakanyi nè Kilistò . . . Kaa, awu—awu mabuulula, mu Bwikadi bwà cijengù cyà Kapyà aci cilembeleja mwaba awu mu cibambalu kampànda! Mu mùshindù wà nè . . . Kaa, mwanèètù! Nànsha mùnkaadi muCimònèmòne amu, kacya ku bwànà, musangu wònsò wùtùCi ànu ciseemena pabwìpì naanyi, Cìtu cìnkwàcisha bwòwà. Yèyè ùtu wàmba kunshiya mu ngiikàdilù wa lungènyi lùnjimina. Kwènàku mwà kwibidilangana naaCì to; kanwèna mwà kucyenza to. Ncyà citàmbe kwikala cinsantu.

113 Mònaayi, pàvwà mufwilakanyi nè Kilistò ùpàtuka mubànde pa nyama yèndè (yinaayi) yà mudimu wà bwambi apu, mwaba awu, Nzambì ùvwa ùtùma Nyama bwà kucilwisha. Nwamònu anyi? Mpindyewu tângilàayaaku. Dìbà adi, musangu wònsò wùvwa (nyama ùbànda) pa kàbalù kèndè aku, pàvwà mufwilakanyi nè Kilistò ùbànda pa kàbalù kèndè aku, pa nyama wèndè awu apu, bwà kumanyisha mudimu wèndè wà bwambi; Nzambì pèndè, ùvwa ùtùma Wèndè Nyama, nè ùvwa mubàndePù, bwà kumanyisha mvità Yèndè bwà kucilwisha.

114 Mpindyewu, Mufùndù wùdi wàmba nè: "Pàdi mwena lukunà ùlwa bu dipaasalala dyà màyi, Nyumà wa Nzambì ùdi ùjuula dibèndelà bwà kumulwisha."

115 Nànku awu pàakayà mwena lukunà bu mufwilakanyi nè Kilistò, Nzambi wàkatùma bukolè bwà mùshindù kampànda bwà kutwilangana nendè. Nè pashiishe pàvwàbo . . .

116 Kupàtukayè cyàkàbìdì, bu mubàndi wa pa kàbalù kakünze, dikwàbò diikala, bukwàbò bukolè, mukwàbò mudimu wà bwambi; Nzambi wàkatùma mukwàbò paanyimà pèndè, bwà kumulwisha, bwà kutwà Èkèleeziyà Wendè nyama ku mikòlò.

117 Kutùmayè mwisàtù awu; cyàkàbìdì, Nzambi kutùma Wendè, Nyama mwisàtù kulwa è kucimanyishayè.

118 Kutùmayè mwinâyì awu; Nzambi kutùma Wendè mwinâyì awu. Nè pashiishe kwà mufwilakanyi nè Kilistò kumba kùjika, nè bikondo byà èkèleeziyà pààbì, kujikabi, pa dìbà adi. Tàngilàayi. Mpindyewu, kaa, eci's ncimpè bushùwà!

119 Mpindyewu, tudi tumòna nè dyabùlù ùdi munkaci mwà kushintuluka, nyama yinaayi—yinaayi, ùleeja nè mbukolè kaayi bùvwàbo babuulwile . . . anyì mbukolè kaayi bùvwàye mubuulwile bàà pa buloba, nè mwàkajikilàbo ku kàbalù kàà cisengàsengà aka, kabalù kàà “lufù” aku.

120 Mpindyewu twànjàayaaku kutàngila makolè à Nzambi, à Nyama eyì, yìvwà nè cyà kubàlwisha.

121 Nyama wa kumpàla wa Nzambi, wàkapàtuka bwà kutwilangana nè mufwilakanyi nè Kilistò, nyumà mufwilakanyi nè Kilistò pàcidiye ànu mu dilongesha dyèndè adi apu. Mpindyewu vùlukàayi nè, pààkabànda mufwilakanyi nè Kilistò pa kàbalù bwà musangu wà kumpàla, ùvwa mu mudimu wà bwambi wà dilongesha. Mufwilakanyi nè Kilistò wàkabànda pa kàbalù, bwà musangu wà kumpàla, mu mudimu wà bwambi wà dilongesha. Mpindyewu tànglàayi ewu wàkaya bwà kutwilangana nendè: nyama wa ntambwe, Ntambwe wa cisàmbà cyà Yudà, udi Dìyì awu. Pààkapàtukà dilongesha dyèndè dyà mashimi adi, Dìyì dilelèlè ndyàkayà katwilangana nendè.

122 Ke bwà cinyì twàkapeta Irénée kampànda, nè Polycarpe kampànda, nè—nè—nè—nè bantu abu, Martin Munsantu kampànda.

123 Pàvwà mufwilakanyi nè Kilistò awu wèndela pa kàbalù nè dilongesha dyèndè dyà mashimi apu, Nzambi wàkatùma Dyèndè Dilongesha, Dìyì, Ntambwe wa cisàmbà cyà Yudà, udi Dìyì dimwènèshìbwe mu Nyumà Mwímpè. Nè Nyumà Mwímpè, mwaba awu, bwà kuDimwènesha, udi Dìyì awu!

124 Ke bwà cinyì Èkèleeziyà wa ku cibangidilu ùvwa nè mapà à dyondopa, bishimà, bikèèna—kumòna, nè bukolè, mbwalu cìvwa n'Dìyì didì nè mwoyi, mu mmwènekèlu wa Ntambwe wa cisàmbà cyà Yudà, mubànde pa kàbalù bwà kalwishangana nè cyòci aci. Amen! Mpindyewu nwacyùmvù anyi? Ùdi ùtùma bukolè bwèndè, mufwilakanyi nè Kilistò awu; Nzambi ùtùma

Bwèndè, Dìyì. Mufwilakanyi nè Kilistò, dilongesha dyà mashimi; Dilongesha dilelèlè dyàkaya pàmwè naadi, bwà kudilwisha! Mpindyewu, awu nguvwa wa kumpàla awu. Mpindyewu, ewu ùvwa ng'Èkéleeziyà wa kumpàla awu, wa bàpostòlò, wákaya bwà kutwilangana nendè awu.

<sup>125</sup> Mpindyewu, nyama mwibìdì wàkatùma mufwilakanyi nè Kilistò awu, ùvwa nnyama mukúnze, uvwa nè cyà . . . uvwayè mubàndepù, uvwa nè cyà kuumusha ditalala (nè) pa buloba, nè— nè mvità.

<sup>126</sup> Mpindyewu, mwibìdì wákaya bwà kumulwisha, ùvwa n'Nyama wa ngombe. Ngombe ùdi ùmvwija mudimu mukolè, Nyama wa majitu.

<sup>127</sup> Nènkù mpindyewu bu twètù mwà kwimanakù kakesè cyanààna. Ngǎnji, èyowà, ngǎnji, ànu bwà nwikalèku batwishübwe nè nudi bamòne cyòci eci mpindyewu. Mpindyewu, ke cyà mùshindù wùdì mufwànyine kwikala wùpandangana mutù kunùdì ncyòci aci. Kàdi twǎnjǎayi kwangata Twatilà kaaba aka. Tàngilǎayi nùmonè ní kí—kí—kí ng'Èkéleeziyà mukwaci wa mudimu mukolè, nudi numòna's.

*Nè fùndilà mwanjèlo wa èkéleeziyà wa Twatilà nè: Bintu ebi mbidìbo bàmba kùdì Mwàna wa Nzambi, udi nè mèsù menzè bu ndimì yà kapyà nè makàsà menzè bu cyamù cyà mìtakù pa cyòci;*

*Ndi mumanyè byenzi byèbè, . . .*

<sup>128</sup> Nwamònu's, mulwè ànu byenzi mpindyewu, nwamònu's, bwalu yèyè awu ke uvwa wendela nendè pa kabalù.

*. . . nè luse lwèbè, nè mudimu wèbè, (nwamònu's, bìdì byònsò ànu . . .) nè diitabuuja dyèbè, nè . . . lutùlù lwèbè, nè byenzi byèbè (cyàkàbìdì, misangu yìbìdì, "byenzi byèbè"), nè byà ndekeelu byàbùngì bitàmbè byà kumpàla.*

<sup>129</sup> Nwamònu's, aci cidi cileeja nè, Cikondo cyà Twatilà aci, paanyimà pàa mufwilakanyi nè Kilistò mumanè kudijaalamija nè mubwelè mu Cikondo cyà Twatilà, Èkéleeziyà mukèsè awu kàyiku mwà kwenza cintu nànsha címwè to ànu—ànu mudimu mukolè.

<sup>130</sup> Nè cikwòbò cintu cidi ngombe mwikàle, kàbìdì, n'Nyama wa mulàmbù. Nwamònu anyi? Bàakafila myoyi yàbò nè budiswìlè bwònsò mùvwàbo mwà kuyìfila amu, mu bikondo byà mìdimà amu, bidimu cinunu bìvwà cyena-Kàtòlikè nè bukòntononyi bwà buloba bujimà aci. Nè bàvwa bàbwelamù ànu nànkù, nànsha biitàbe nànsha babènge. Kufwà bwàbò bwòbò kakùvwa nè bwalu to. Byòbì nè lufù ndubimànyine, bìvwà ànu bimpè. Bàvwa bàya nè bàfwa, nànsha byà munyi. Bwà cinyi? Nyumà mene wa cikondo aci's!

131 Ke bwà cinyi bwôbò, ke bwà cinyi Irénée, ke bwà cinyi Polycarpe, Yone, Pòlò, bantu banène nè bàà bukolè abu kuntwaku, bàvwa bàlwisha cintu aci!

132 Pòlò wàkacimòna. Kwambayè nè: “Ndi mumanyè nè, paanyimà pàà diya dyànyì, mbwà yà diitu neyìikalè mwà kubwela munkaci mwènù, bàna bèètù, bàlongesha bintu bikònyàngàlè, nè byôbì abi nebìnùpàmbùlè.” Tàngilàayi mùpostòlò mukesè, wa disù dyumisha, wa kale awu mwimàne mwaba awu, mwongo wèndè mutuuta mfimbù nè mûle tètè nè mibùndàbùndà, mèsù èndè àmata binsònji. Kàdi ùvwa mwà kumòna kule kutàmba nè twàbò. . . tulòndò twà dimwèna mu ntàntà mule twàtwa, tũdibo mwà kumòna naatù mu ntàntà wa bidimu byà bukênkè miliyò lukàmà nè makùmi àbìdì mu cibwàshibwàshì atu. Yèyè’s ùvwa mwà kumòna too nè mu Cyendèlèlè. Ki yèyè uvwa mwaba awu awu. Nè wàkadyànjila kucyàmba nè wàkamba nè cyôci aci ncìvwà mwà kwenzeka. Nè kàbìdì, wàkamba, kutùngunuka too nè ku cikwàbò cikondo cìcìvwà cilwa. Mpindyewu, mònaayi nè, s’ki yèyè uvwa mwaba awu awu.

133 Pashiishe, paanyimà pèndè yèyè awu, Yone Munsantu ngwàkatàmba kulààla pànu bidimu byàbùngi. Nè Yone Munsantu, mulaaba kùdì Nyumà Mwimpè, pàakateetâyè kwangata Mikàndà minsantu yònsò mifùndilangana ayi, bwà kuyisangisha pàmwè nè kwenza Bible, bukalenge bwàlábàlè bwà Loomò bwàkamukwàta nè kumutèeka mu Cisanga cyà Paatèmò. Ùvwa usanganyibwa mu Cisanga cyà Paatèmò amu bwà bwalu bwà Dìyì dyà Nzambi. Polycarpe nguvwa umwambulwisha bwà kuDìkùdimuna.

134 Mwà mubalè, ditùkù adi, mukàndà wùvwà Màriyà yèyè mwinè mufùndile Polycarpe. Mwikàle ùmudyula. . . kàvwa ùmudyula to. Kàdi ùmwela kàalumbandi bwà mùvwàye muntu wa bukitù uvwa mwà kulongesha nè kwitaba dilongesha dyà Yesù Kilistò, Uvwa mulela kùdìye, mufùme kùdì Nzambi awu. Kabèjì sungasunga kàà Màriyà kàakafùndilàye Polycarpe.

135 Polycarpe bàakamwelela nyama yà ntambwe, nudi bamanyè’s. To, bàakamwosha. Dìbà—dìbà dikaavwa ditàmbe kupìta bwà kulekelelabò nyama wa ntambwe mu cipalu cyà manàyi amu, nànkù ke kuupulabò nzùbu wa cyowedi, nzùbu mukùlákàjì wa cyowedi kuntwaku, nè kumwelabò mu—mu—mu cipalu cyà manàyi amu nè—nè kumwoshabò.

136 Nè mu njila, wènda ùpweka nè njila, ùvwa wènda wènda nè mutù mwinamija panshi. Kààmàndà kàà mäsàlaayi lukàmà kàà beena Loomò kwambayè nè: “Wèwè ewu’s udi mukùlákàjì, wa bàneemeka bikolè. Bwà cinyi kubènga kulekela cintu aci?”

137 Kutùngunukayè nè kwikala mutàngile mu Dyulu. Ke Dìyì kwakuladì dyùmukila mu mwaba kampànda. Bwôbò kabàvwa mwà kuumvwa nè mpenyi apu to. Dyàmba nè: “Polycarpe,

kùcìinyi nànsha. Mémè ndi neebè.” Uh-huh. Bwà cinyi? Ûvwa mushààle mulamàte ku Dìyì adi.

<sup>138</sup> Nè pààkabangàbo kumuungwijila mushiki wà mabaya pambidi, bwà kumwoshabò, kwàkapweka mùjiki wà ku Dyulu. Nè—nè miyengà yà kùdi Banjèlò mu mwaba kampànda kwimbayi musambu awu. Yéyè kààkatuutakù mupòdi musangu nànsha wùmwè to kumpàlà kwà mumupwekeshi wa milongo awu.

<sup>139</sup> Bantu bàà bukitù ke bwòbò abu's. Ke bantu bàdi mwà kukàndamana mbwòbò abu. Bafwile diitabuujà bàà munda mwà bikondo abu, kuntwaku, bààkakènga byà byènza nè bwòwà. Kàdi bàvwa cinyi? Bàvwa mwinshì mwà disonsodiibwa, Nyumà wa Nzambi, bukolè. Mémè. . .

<sup>140</sup> Kanùpukù eci nùнку mwoyi nànsha, nwènù èkèleeziyà. Nè nwènù bânà bèètù, bàdi pa mikàbà yà mèyi, ndi muswè bwà nwènù kukenketa cyòci eci. Mmunyi mùdiku bantu bafwànyine kwenza cintu kampànda cikwàbò kanà cyònsò kaciyi ànu bukolè bwà Nzambi bùdi bubàlekeleela? Nèngiikalè mwà kutèeka kashètè aka mwaba ewu, bwà kuleeja cyòci aci. Piikalàbi nè Nzambi mmutùme Nyumà kampànda munkaci mwàbò, aci's ke cintu cimwèpelè cìdibo mwà kukwàcilakù mudimu, Nyumà udi ukwàta mudimu munkaci mwàbò awu. Mpindyewu netùnùjaadikilè, ku maalu-malonda à Èkèleeziyà, nè ku di—dikàngula dyà Bitampì, nè makolè àdi àlekelela; nè tàngilàayi, ànu menemene, Èkèleeziyà wàkandamuna bwà—bwà dilaabiibwa, kàdi bwòbò kabààkapetakù mwà kwenza cikwàbò cintu nànsha cimwè to.

<sup>141</sup> Mpindyewu, cyà kumpàlà cìvwa nnyama wa ntambwe wàkakungula awu, Dìyì dikezùke, kadiyi disambakaja adi.

<sup>142</sup> Ciibìdi, mu Twatilà, cìvwa nngombe. Nè Cìvwa ncyà—ncyà bàmbwisha majitu. . . Nyama wa majitu. Nùmfwilaayikù luse. Nè Cìvwa kàbidi Nyama wa mulàmbù. Nènku aci kacìvwa ànu menemene Èkèleeziyà mukwàte nè byà luse, mukesè awu anyi? Loomò ùkaavwa mudìjaalamije mwómò amu, too nè ku bidimu cinunu byà bikondo byà mìdimà abi, nè ewu yònsò uvwa kàyì ùjìkula nè ngwa mu èkèleeziyà wa cyena-Loomò awu ùvwa ùshebeyiibwa dyàkàmwè. Nènku bùvwàbo naabù nkukwàta mudimu mukolè, kuumuka pa mwaba kuya ku mukwàbò.

<sup>143</sup> Nwènù ba-Francis-maçons, ndi muswè kukòka ntèmà yènù. Nudi bavùlùke cimanyinu cyà nkùrusè anyi? Bwà apa kaayi nwà—nwàmanyi cìndi ngàmba aci.

<sup>144</sup> Mpindyewu mònayì. Mpindyewu, bu nwènù—bu nwènù baswè kumòna, cìvwa nkwennda bambùle nè kulaminyina Bible awu. Nwamònu anyi? Nènku byàkakèngela bwà kukwàtabò mudimu mukolè munkaci mwàbò muntu nè mukwèndè. Ki bwalu mbwòbù abu's, ngombe awu. Nè pàvwa díbà dikùmbana. . . Twacibadi makèlèlèlè dilòòlò awu. Nwamònu's,



pàvwà ànu cintu aci cipàtuka, nè bwalu bwà didifila bùlwa, bàvwa ànu nè cyà kuya's.

Yèyè wàkamba nè: “Kwènzedi mvinyò nè Maanyi bibi to.”

<sup>145</sup> Bàvwa bènza bishi? Bàvwa bàyaku tàmakàtàmàkà nè budiswilè bwònsò too nè mwaba awu bàkafwà. Kabàvwa bàmòna bu kùdi bwalu to, bwalu Nyumà wa Èkèleeziyà mu dyòdi ditùkù adi ùvwa ndidifila, mudimu mukolè. Nènku bwòbò bàvwa bàya tàmakàtàmàkà too nè mwaba awu biikàle ànu badilekèlèle nè mwàbò mwònsò mùvwàbo mwà kwenda amu, balaaba kùdi Nyumà mulelèlè wa Nzambi wa cyòci cikondo aci, nè bàfwa bu bilòbò, mulàmbù; binunu kuvudija ku binunu, bwòbò abu mìlìyò makùmi àsambòmbò nè mwandamukùlù mu mukàndà wà milubù.

<sup>146</sup> Ngombe, mulàmbù! Kaa, ekèlekèle! Nudi nucyùm vwa anyi? [Disangisha didi dyàmbe nè: “Amen.”—Muf.] Eyo. Mbimpè. Mpindyewu, mulàmbù, ùvwa ànu mwà kukwàta mudimu mukolè mu cyòci cikondo aci, bwà kulwisha dikàndameena dinène bwà bidimu cinunu abi.

<sup>147</sup> Mpindyewu, nyama mwisàtù wàkapàtukila kùdi dyabùlù, ùvwa nkàbalù kafiike aka. Nwamònu anyi?

<sup>148</sup> Mpindyewu, Nyama mwisàtù wàkapàtuka, bukolè kampàndà bwà kùdi Nzambi, bwà kumulwisha, bwà kulwisha makolè à kàbalù kafiike aku, ùvwa mmuntu, mudimùke, wa meeji matwè, mwikàle nè lungènyi lwà Nzambi. Nwènù's nutu bamanyè nè, muntu ùtu wa meeji matwè, kutàmbe yònsò wa ku nyama. Nwamònu anyi? Yèyè ngwa meeji matwè matàmbe, bwalu ùdi mwà kumutàmbe ku meeji, nangàngà. Mmudimùke, mwena meeji. Nwamònu anyi? Nè yèyè. . .

<sup>149</sup> Ci—cikondo, kuumukila ku cikondo cyà mîdimà, mpindyewu tupàtuka mu cikondo cyà mîdimà; mpindyewu, luseke lukwàbò elu, pàvwà kàbalù kafiike aka kènda kaya, pàvwàbò bàfucisha bwà milàmbù yàbò—yàbò—yàbò—yàbò ayi nè bikwàbò byònsò bìvwàbò benzè abi. Nè mfrangà yivwa ànu. . . Kaa, nwènù's nudi bamanyè mùvwàbi amu.

<sup>150</sup> Mpindyewu cintu cyàkalondà cyàkapàtukà, bwà kulwisha cyòci aci, civwa n'Nyama uvwa nè mpàla wa muntu; wa meeji matwè, mulongè kàlaasà, mwena meeji, mulenga, mulaaba nè Nyumà wa ditùkù adi. Nudi bacimòne anyi? Mpindyewu, wàkaya bwà kumulwisha, nè budimù bwà lungènyi lwà Nzambi lùvwàye naalù. Aci civwa ncikondo cyà dilongolola, Martin Luther, John Wesley, nè bakwàbò. Nwamònu's, civwa ndilongolola. Zwingli, nè, kaa, bakwàbò bwònsò abu, Knox, Calvin, nè bakwàbò bwònsò abu, nwamònu's, bààkapàtuka. Bùvwa mbudimù. Nènku mpindyewu, nùtàngilàayi, ànu menemene kuumukila ku cikondo cyà mîdimà, kuumukila ku dilongolola, lwà kùneeku, tàngilàayi, civwa mmeeji à muntu.

151 Bu nwênù mwà kupwekeshakù màdidiishì ènù awu ndambù! Ngèèla meeji nè bantu bàkaadi bu bàdì buumvwa luuyà ndambù, èyowà, pàmwăpa, munda amu. Bu nwênù ànu mwà kupwekeshakù màdidiishì ànu kakesè ndambù! Bwalu, ndi mumanyè nè, pìikalàbi nè mèmè udi mwimàne apa nyiisha, ndi ngumvwa luuyà lukolè, ndi mumanyè nè nwênù nudi nè cyà kulùumvwa, kunùdi aku.

152 Èè, mōnaayi nè, àvwa mmeeji à muntu. Mpindyewu, nuumvù anyi?

153 Nyama mwisâtù awu uvwa Sâtaanà mutùme, wàkalwa wa meeji, yèyè pèndè. Tàngilàayi nè: “Cipiminu cyà blé bwà dyeyà. Bipiminu bisâtù byà orge bwà dyeyà.” Nwamònu anyi? Kaa, ekelekè! Nwamònu anyi? Màyelè à kupeta naawù mfrangà, meeji, bwà kupeta ngôlò wa pa buloba, nè bubanji, bibwejiibwamù. Aci’s mbwà kuulaci ànu menemene. Aci’s ke cyàkabangà kufikisha ku difucishangana bwà masambila. Nè bwà . . . Kwenzayè mwaba wà wùbùkidiibwa nè mpùrgàtoriyo, biikàlè bàsambidila bankambwà bààbò bwà kupàtukabò. Nènku, kaa, bìvwa bikèngela bwà wèwè kulaya bwa kubàshìila mikàndà yèbè yà bwena-cintu nè bikwàbò byònsò, bubanji bwèbè bwònsò. Èkèleeziyà, nè cìvwa mbùlāmàtadi, bìvwa cintu cìmwè, nè èkèleeziyà ùvwa wàngata bubanji bwèbè bwònsò.

154 Kàdi kanwènaayiku bamòne nè, bàmwè bàà ku batangadiki, leelù ewu, bàdi nè dilaabiibwa òmwèòmwè adi pambidi pààbò anyi? Bènzeja bantu bakùlākàji bwà kubàlekelelabò mfrangà yàbò yà pààsiyò, nè bàtwa byàlā pa mukàndà bwà kubàlekelelabò nžùbù yàbò ku bintu kampànda. Mōna’s, mwanèètù, ncyèna—ncyèna muswè kuya ku abi nàнку to, nwamònu’s. Kàdi mpindyewu nènshaalè ànu nè eci nùнку; ndi ntàngila paanyimà bwà kumòna kùnyaaya. Mpindyewu mōnaayi nè, bantu abu, aci ncibàtàngile ànu bwòbò. Aci ncibàtàngile ànu bwòbò. Aci—aci—aci kaciyèna cìtàngila mèmè mu kantu nànsha kàmwè to. Ndi mèmè mwambùle bujitu ànu bwà Eci nùнку.

155 Mpindyewu mōnaayi nè, Nyama wàkalwa bwà kucilwisha awu—awu, mpindyewu, ùvwa muntu. Nè twètù bwònsò tudi bamanyè nè Nyama ewu, wa muntu, bukolè bwà muntu ebu, mu byeledi byèndè byà meeji amu, wàkajingulula nè kaadyàmpà kàà kosher kàvwà naakù Martin Luther mu cianza aku, pàvwàye wènda ùbànda bibàndilu abi apu. . .

156 Bwòbò bàvwa bàmba nè: “ *Eci* cidi Mashi à Yesù Kilistò. *Eci* cidi mubidi wà Yesù Kilistò.”

157 Ki Luther kukiimansha panshi, è kwambayè nè: “Ndyàmpà nè mvinyò. Kí mmubidi wà Kilistò nànsha; bwalu, wòwò wàkabàndishiibwa, nè mmusòmbe ku dyàbalùmè dyà Nzambi, munkaci mwà kwakwilangana.” Nwamònu’s, lungènyi; nwamònu’s, muntu.

158 Nènku pàakalwà John Wesley, paanyimà pàà Zwingli mumanè kulwa, nè Calvin . . .

159 Ke kufikishabò èkèleeziyà pa mwaba kampànda, pa dikùbiibwa, mu mùshindù wà kabàciyì kabìdi baswè matàbuluja nànsha. “Cyònsò ciikalàku mwà kulwa aci necilwe.” Ke cyònsò cìvwàku ncyòci aci. Kàdi bàvwa ànu nè nsòmbelu wa mùshindù kanà wònsò. Èkèleeziyà wa ba-Luthériens mmukònyàngàle bikolè, nè èkèleeziyà wa ba-Anglicans! Kaa, ekèlekèle! Ditùnga dijimà dyàkalwa dinyàngùke nsòmbelu, ànu menemene mùdidi mpindyewu emu. Èkèleeziyà yàkalwa mikònyàngàle. Mfùmù Henry wa—wa VIII, pàakalwàye mu Angleterre, nè paanyimà pàà Marie la Sanglante, nè byònsò byàkenzekà ebi. Ke, pashiishe, èkèleeziyà wàkalwa mùle nè cikisu nè dinyanguka dyà nsòmbelu. Bààbùngì bàmba mùdibo beena Kilistò, cibi basòmbè nè bakàjì bànaayi anyì bàtaanu, anyì bènza cyònsò cìvwàbo baswè kwenza aci, nè batùngùnùke, nè dikooyika.

160 John Wesley, mu kulonga kwà Mifùndu, mu kuYikenketa, byàkamubuuludiibwa nè Mashi à Yesù Kilistò ngàdi àjidilà mwena kwitabuuja. Nè wèwè udi . . . kabìvwa bilèngela bwà . . . Wàkenza cinyì dībà adi? Wàkapàtuka nè kubwela mu dikwàbò dilongolola. Wàkasungila bàà pa buloba mu ditùkù dyèndè adi, mwàkenzà Luther amu. Nwamònu anyì? Cìvwa ncinyì? Muntu awu, bukolè bwà Nyama, bwikàle bupàtuka.

161 Mupèeshe muntu lungènyì, lwà kuumvwa nè, cintu aci ncyà mashimi. “Aci kī m’Mashi à Yesù Kilistò nànsha. Aci kī mmu—mubidi wà Yesù Kilistò nànsha. Aci cidi cileeja mubidi awu.” Nwamònu anyì?

162 Aci cìcidi ànu bwalu bwà dikòkangana pankaci pàà Kàtòlikè nè Mishòonyì patùdi twakulangana apa. Ke cintu cìmwèpelè cinùdi kanùyikù mwà kupetanganapù mpindyewu mene ncyòci aci. Bwà bikwàbò byònsò kaayi, bàdi mwà kupetanganapù, kàdi bwà aci nànkù; ebi nùnku mu nsangilu yàbò yidìbo munkaci mwà kwenza ayi. Mònaayaaku mpindyewu. Kàdi, eci nùnku, kàdi kī—kī mbafwànyìnekù kupetangana pa aci nànsha. Nwamònu anyì?

163 Ewu nè: “Cidi m’Mashi, nè,” wàmba nè, “m’Mashi ànu ètù à cyà bushùwà aa; nè nsaserdòsè ùdi nè bukòokeshi bwà kwandamuna dyàmpà edi kulwadi ànu mubidi wà Kilistò wètù wà cyà bushùwà ewu.” Ke bwà cinyì kaatabernacle kakesè aku kàdimù, mu—mu—mu èkèleeziyà amu, nudi bamanyè’s. Ke bwà cinyì bàtu bàfùnda bimanyinu nè bàfila milàmbù yà cimpàngaanù yà mishindù kanà yònsò pàdìbo bàpicilapù, nudi bamanyè’s, nè bìinama, nè bàtùùla bifulu byàbò, nè bikwàbò. Aci kī mbwà nzùbu wa mvidi-mukùlù awu to; mbwà kaadyàmpà kàà kosher kàdi mu kaatabernacle aku—aku. Kàdi mònaayi mùdi Sàtaanà mwenzè diyèlè adi nè budimù!

164 Kàdi, nwamònu's, pa díbà adi, pa buumùntù bwà muntu awu, nwamònu's, Nzambi wàkatèeka Nyumà wa lungènyi pa muntu, bwà kuumvwayè nè cìvwa cyà mashimi. Mpindyewu, aci cìvwa mbwà kulwisha nyama mwisàtù awu, uvwa mufikishe èkèleeziyà ku dinyanguka dyà nsòmbelu, uvwayè mubànde awu, bilwè nè bibi be. Balongolodi abu, cyàkenzàbo ncinyi, bwòbò mu cikondo cyà balongolodi aci? Bààkuumusha Èkèleeziyà, ku dyaenza dyà mishingà yèndè yà cimpàngaanù yà dikuukwila dyà bakishi ayi, kumwaluja cyàkàbìdì kùdì Nzambi. Nwamònu anyi? Ke cyàkapàtukilà Nyama awu ncyôci aci, budimù bwà muntu abu, mubàndi wa pa kàbalù awu, bwà kucyènzayè.

165 Mpindyewu, kàdi, balàayi mpindyewu mvensà mwi3 nè. . . anyi, Bwàkabuulwibwà 3.2, katanci kakesè cyanàànà. Mpindyewu, ndi mumufunde kaaba aka bwà kiipàcilà kampànda. Mpindyewu eci cidi, cidi cilwamù mpindyewu, cikondo cyà Luther, mu cikondo cyà balongolodi, mu Bwàkabuulwibwà 3.2.

166 Cyàkenzàbo bòbò, bàakadyènta bulongolodi. Luther mmwenzè ànu ùbanga èkèleeziyà nùnkù, bwòbò kumuvwija bulongolodi. Èyo, cintu ànu cimwècimwè cyàkenzà Wesley. Cintu ànu cimwècimwè cyàkenzà Mpenta, ànu cyôci aci menemene, bamuvwijè bulongolodi. Nè cidibo bènza ncinyi? Bàdì bàtùngunuka ànu nè ndongolwelu umweumwe ùvwàbo bapàtùkilemù awu. Nwamònu anyi?

167 Mpindyewu tàngilayi eci, Bwàkabuulwibwà, wàkula bwà èkèleeziyà wa Saadi ewu. "Kùdì mwanjèlò wa èkèleeziyà," ke mvensà wa kumpàla awu, mu bushùwà bwà bwalu. Nwamònu anyi? Èyo.

*Ikàlà mutàbàle, nè kolàkàjà bintu bìdì bishààle,*

168 Mbwenà kwamba nè: "Dìyi dyùdì mulongèshìibwe adi," nwamònu's, "bintu bìdì bishààle."

*. . . bìdì pabwìpì nè kufwà abi, . . .*

169 Ùkaadi pabwìpì menemene bwà kubangulula mu bulongolodi ànu menemene mùdì èkèleeziyà wa Kàtòlikè mùvwàye mupàtùke amu. Nwamònu anyi?

*. . . bwalu ncyèna musangàne byenzi byèbè  
bipwàngàne kumpàlà kwà Nzambi nànsha.*

170 Ke wèwè uyààya awu's. Ke . . . Ke yèyè uyààya awu, wàlukila cyàkàbìdì. Kanwènaayikù numòna bwà cinyi ndongolwelu yà malongolodi mmibì anyi? Wàkayìjuula nganyi? Ùvwa n'Nzambi anyi? Bàvwa mbàpostlò anyi? Èkèleeziyà wa Kàtòlikè wa cyena-Loomò ngwàkayìjuula. Mpindyewu mulongi wa maalumalonda àmbèku bishìllàngàne túng. Kacyènakù to. Bwòbò bàdì, mbàdì bàmba mùdìbo èkèleeziyà-maamù, nènku's ncidibo. Kàdi bwòbò mbàdì bàvwijà cintu aci bulongolodi, nè bàtèeka ndongolwelu, mwikàle nè muntu kumutù kwèndè. Kàdi twètù

katwèna bangàte muntu umwèpelè to, mwàkenzàbo bwòbò amu; tudi twétù bangàte nsangilu mujimà wa bantu, babàsangè pàmwè, nè díbà adi nwènú nudi bapeté cibwejàkàjì ànu cyètù cyà bushùwà eci. Aci ncyà bushùwà. Mmuniyì mùdiku nsangilu mwà kwenza bwalu's, twamb'eku twamb'eku?

171 Bidi ànu mùdìbi nè, tudi twela meeji nè mungàlààtà mmwìmpè. Ndi ngèèla meeji nè bidi nàнку, mèmè pàanyi, kàdi kawàdyàkwenzakù bwànsongo mùdìbi bikèngela to. Nànsha bishi. Biikàle nè musùmbà wà Rickys mibànyùngùlùke mwaba ewu bwà kubilombola, nànsha twamba mwinè mmuniyì munwikalà mwà kucyàkaja's? Kanwèna mwà kucyàkajakù to. Mònaayi nè, cintu menemene mmfùmù wa difwàna dyà Nzambì.

172 Mònaayi nè Nyama awu, Nyama mwisàtù awu, mpindyewu, cìvwa mbudimù bwà muntu. Nè ùvwa ùleeja balongolodi bààkapàtukà abu.

173 Kuumuka ku lupìngù alu, ku dicyàngata, bàmba nè: “Eci ndyàmpà.” “Eci mmvinyò.” Nwamònu's, mufwilakanyi nè Kilistò ùcidi yèyè ànu nè cintu kampàndà cìdì cìleejà bwena Kilistò mu cimfwànyi. Bikèngela énzè nàнку, bwalu yèyè “mmubèngàngàne,” nudi numòna's. Nènku díbà adi, pàdìbi bikèngela bwà kwikalayè mubèngàngàne nè cintu kampànda . . .

174 Mpindyewu, bu nè ùvwa mulwè kwìnè kwònsò aku, mwàmbè nè: “Mèmè ndi mwena Bouddha.” Èè, aci kacýèna nè cìdìci cyèna to. Bwònsò bàtu bàmba nàнку. Awu's ùdi ànu mumpàngaanù, kacya kwònsò aku.

175 Kàdi mufwilakanyi nè Kilistò mmudimùke. Ùdi nè bintu byà mishindù yònsò bìdì bìleejà bwena Kilistò mwaba awu. Bìdì ànu nè, mmubùsàke kule ku lukwàbò luseke, cintu kampàndà cyà cibèngàngana nè Dilongesha dyàCì. Nwamònu's, cyòci aci ke cìdì cìmwenza mufwilakanyi nè Kilistò. Nwamònu anyi?

176 Pa nàнку, balongolodi abu, pààkapàtukà Nyama awu mu mmwènekèlu wa—wà muntu, bwà kulwisha cyòci aci!

177 Mpindyewu, kanùpu eci mwoyi to, nwènú kàlaasà! Kanùcìpu mwoyi nànsha! Nwamònu anyi? ÙCìvùlùkè, matùkù èbè wònsò à mwoyi! Nwamònu anyi? Eyi Nyama yìdì mmìjaalàme. Cidi EMU MMUDÌ MUKALENGE WÀMBA. Nwamònu anyi?

Mònaayi nè, dikuukwila dyà bakishi ndyàkatwàlà . . .

178 Nyama-muntu awu wàkapàtuka nè bukolè bwà Nzambì, ku lungènyi lùvwà Nzambì mumupèèshe, nè wàkuumusha Èkèleeziyà ku dikuukwila dyà mpìngù, kumwaluja kùdì Nzambì. Kàdi mu . . .

179 Tudi tusàngana, mu cikondo cìmwècìmwè cyà èkèleeziyà aci nè, pààkabangàbo dìngumba, bwà kwenzabò cintu cìmwècìmwè cyàkenzàbo ku cibàngidilu aci, cyàkenza Loomò aci, mpindyewu kubangayè kulelela èkèleeziyà awu bàna bàà bakàjì. Kàdi cìdiye wàmba ncinyi?

180 Mbâmbè nè: “Mpindyewu údi...Ncyêna mukusangâne mupwàngâne to. Nènku búdi naabù mbwà kukolakaja dikàndà dikesè dyúdi mushààle naadi adi.” Mpindyewu tèlèjàyì mùdiYe ùbàdimwija, mu Bwàkabuulwibwà cyàkàbìdi, 3.3. Twàngatàayi. . . Èè, ngèèla meeji nè mvwa mumupetè, ànu mu tusunsa tukesè emu.

*Vùlukà kúdi mùdi mupetè nè muumvwè, nè kwàta bikolè, nè nyingàlàlà.*

181 Ànu, mu ngaakwilù mukwàbò nè: “Vùlukà nè wêwè udi mupàtùke mu dinyanguka dyà nsòmbelu wa mùshindù awu adi.” Nwamònu anyi? Kàdi tàngilàayi apa nùнку.

*. . .Ki bwà cinyi wêwè kùyì mutàngile bimpè to, nêmfikè kúdi bu mwìvi, (uh-huh), nènku neumanyè. . . nè wêwè kwàkumanya to díbà dîngàálwà kukubùcikila.*

182 Ànu nàнку, Yéyè neikalè mwà kuumusha citèekedi cyà mwèndù, nwamònu’s. Pa nàнку, ke cyôci aci. Ncinyi aci? Bukênkè bwà Èkèleeziyà.

183 Nè yéyè wàkabwela buludi mu ndongolwelu wumwèwumwè wa malongolodi wa mîdimà yà cimpàngaanù mùvwàye mupàtùke amu awu, nè mwômò amu mmùdiye mushààle leelù ewu, mwikàle nè bantu bàà mwoyi wà meeji matòoke biikàle bàdyàmbidila nè cyôci aci ke Bulelèlà, ànu cyôci cìmwècìmwè cìdi beena Kàtòlikè aci. Kàdi beena Mishòonyi bàdi bàseka beena Kàtòlikè; kàdi pààbì, bìdi ànu maanyì mu nkùnde, nkùnde mu maanyì, menemene, bilondèshile Dìyi. Lungènyi lwà muntu’s!

184 Mpindyewu mònaayi’s. Kaa, mùshindù mwinè wúndi munangè Cyôci eci’s wè! Tèlèjàayaaku mpindyewu mùdiYe ùbàdimwija. Mpindyewu, mpindyewu tudi. . .Nudi nwitaba mùdìbi menemene amu anyì, yònsò wa kunùdi? Mpindyewu, wêwè kùyì witaba to, ùmfùndilè lukonko. Aci, Nyama ayi mmimanyishilbwe ànu menemene mu cikondo nè cikondo cyònsò, mùdi Bible muyimanyishe kaaba aka. Ke cyôci aci menemene cidìyi myenzè. Maalu-malonda àdi àleeja cidìyi myenzè. Twètù tudi tutàngila apa nùнку tumòna cidìyi myenzè.

185 Nènku apa nùнку, Nyama ayi, ncì—ncì—ncìvwakù mumanyè cyôci aci kumpàla nànsha. Mvwa musòmbe ànu mwaba awu cyanàànà. Mvwa ànu mmòna cyôci aci cyùmuka mwaba awu, byà mwomùmzwè ànu nè munùdi nwènu bantàngile amu. Nwamònu anyi? Kàdi cidì nè cyà kwikala cyà bushùwà, bwalu ncikùmbànàngàne nè Bible kaaba aka. Pa nàнку mmunyi muwikalà kùyì mwà kwamba ncyà bushùwà? Mònaayi.

186 Mpindyewu, Nyama mwinàyi, aci cìvwa citùmìbwe bwà kulwisha mufwilakanyi nè Kilistò, mu Nyama wa ndekeelu ewu. Nudikù anyi? Nyama wa ndekeelu uvwa mutùmìbwe awu, anyì bukolè bwà ndekeelu bwà kulwisha mufwilakanyi nè Kilistò uvwa ubèngangana nè Dilongesha dyà Nzambì abu,

mufwilakanyi nè Kilistò, ùvwa nyuunyi wa mukankù. Nwamònu anyi? Nyama mwinàyi udi nè mwoyi ùvwa nyuunyi wa mukankù. Mpindyewu, longàayi ànu bikondo abi cyanààna, longàayi Mifundu. Nnyuunyi wa mukankù! Nè mu Bible, cikondo cyà ndekeelu aci cìvwa ncikondo cyà mukankù. Nè Nzambi ùtu ùfwànyikija mikankù nè bapròfeta Bèndè. Nwamònu anyi? Cidi. . . Mpindyewu tàngilàayi. Cikondo cyà ndekeelu, cikondo cyà mukankù, mu—mubuuludi wa Díyi dilelèlè. Nwamònu anyi?

<sup>187</sup> Kumpàlà kwà Nzambi kwenzayè cyenzedi, mwàkenzàYe mu matùkù Noà, Wàkatùma mukankù. PààkapàtulàYe Izalèlèlè, nè cilwilu cyà Pàlò cìvwa pabwipi bwà kuya, Wàkatùma mukankù. Musangu wònsò, Ùdi ùtùma mukankù ku ndekeelu, ku ndekeelu kwàci.

<sup>188</sup> Nè apa Ùdi ùtùma mukankù, cyàkàbìdi. Aci ncikùmbànàngàne ànu menemene nè Díyi. Pa nàнку mmunyi mùdikù mwà kucìvwija cìngà cintu? Ùtùma mukankù, (bwà cinyi?) mubuuludi wa Bulelèlèlè bùvwà bumatèmàte munda mwà cikondo cyònsò aci.

<sup>189</sup> Pa nàнку nànsha twanba mwinè mmunyi mùvwàku ngo—ngombe, anyi mu—anyi muntu, anyi Nyama kanà yònsò uvwa wenda awu, mmunyi mùvwàyekù mwà kubuuludiibwa kumpàlà kwà mukankù kulwawù? Yìvwa nè myaba yàyi; yìvwa Nyama yà cijila, mitùma, ànu mùshindù wùmwèwùmwè wùvwà muntu mukwàbò kanà yònsò mutùmìibwe awu.

<sup>190</sup> Ntambwe, awu ke uvwa wa ku cibangidilu. Kwòkù aku nkwàkajuukilà mufwilakanyi nè—nè mvità.

<sup>191</sup> Pashìishe kjuulayè bukolè bukwàbò; kutùmaYe bukolè bwà kutwilanganayè naabù.

<sup>192</sup> Pashìishe kjuulayè bukolè bukwàbò; kutùmaYe bukolè bukwàbò bwà kutwilanganayè naabù.

<sup>193</sup> Ke pashìishe ku bukolè bwà ndekeelu, Ùdi ùtùlula mukankù awu: “Bwà kwalujulula cyàkàbìdi bânà ku Diitabuuja dyà ku cibangidilu, dyà baataatù bààbò.” Cikondo cyà mukankù’s! Dìbà adi, nudi numòna’s, kakùcyèna kàbìdi Nyama nànsha. Ki yònsò yìvwàku nyòyi ayi. Ki ndekeelu nyèyè awu. Mpindyewu, bu nwènù mwà kwangata mpindyewu Bwàkubuulwibwà 10.1, 7. Ndi muleedilèlèedilekù. Vùlukaayi nè, mu cikondo cyà mùsànjeelà wa ndekeelu, nwamònu’s, ncinyi cìvwa nè cyà kwenzeka? “Maalu masokoka wònsò à Nzambi àvwa mwà kubuuludiibwa.” Mukankù’s! Amen!

<sup>194</sup> Mpindyewu nudi numòna nyama yìnaayi yìvwà yènda ayi. Aci cìvwa ànu menemene cyà bushùwà. Nudi nwtabuuja nàнку anyi? Nènku mpindyewu’s ke cikondo nè cikondo cyònsò eci, anyi bukolè nè bukolè bwònsò bùvwà bwèndelà pa kàbalù paanyimà pààci. Nènku mpindyewu’s ke Mufundu ngwòwò awu wùdi wùleejà cyàkenzà mubàndi wa pa kàbalù wa mwena lukunà. Aci’s ncibuuludiibwe mu Bitampì ebi. Kàbìdi ncibuuludiibwe

mpindyewu nè Nyama yònsò awu, bukolè bùdi Nzambì mutùme abu, bwà kucilwisha, mbulengè menemene ànu kiipàcilà, too nè ku cikondo cyà mukankù. Mpindyewu, piikalàbi nè eci ncikondo cyà ndekeelu, nekùlwe mukankù kampànda, cyà bushùwà, nè bwà bwalu abu. Mpindyewu, vùlukàayi.

<sup>195</sup> Mpindyewu, mu matùkù àkalwà ntambwe, Dìyì dyà ku cibangidilu adi, pàmwè nè cyà pa lukàmà cimwè cyà bantu ncyàkatèelejè ntambwe awu.

<sup>196</sup> Mu matùkù àkalwà ngo—ngombe, ànu kaadimata kakesè kàà bantu nkààkatèelejè mukenji wà ngombe awu.

<sup>197</sup> Mu matùkù àkalwà mu—muntu, wàkakwàta mudimu munkaci mwà bantu, nudi numòna's, pa nàнку Yèyè ùvwa nè meeji. Wàkapàtula kasùmbù kakesè.

<sup>198</sup> Kàdi cyàkenzàbo ncinyi? Sàtaanà kumònayè aci, ki yèyè kubààluja buludi cyànyimà nè kubàsèleshayè mu cyòci aci.

<sup>199</sup> Kàdi vùlukàayi nè, ndekeelu wa byònsò pààlwà mukankù, neciikalè cyà pa lukàmà cimwè cyà cimwè cyà pa lukàmà cyàmufèelejè. Ncikondo cyà mukankù. Vùlukàayi nè, mbabàndi bakwàbò bwònsò bàà pa tùbalù aba...Nè díbà nànsha mene Yesù wàkadyànjlila kwamba nè: “Yèyè kàyi mwenzèje bwà Dilwa Dyèndè kulwadì lukàsà, kakùvwa mwà kwikala musunya, nànsha wùmwe, mufwànyineku kusungidiibwa bwà Dyambwibwa to.” Aci ke Mufundu mwìnè anyi? Díbà adi s'nudi numòna mwaba wutùkaadi, s'mmwòmò, mwanèètù wa balùme nè wa bakàji? Nudi numòna mwaba wutùkaadi anyi?

<sup>200</sup> Nzambì, ndi nè disànka be, ncyèna—ncyèna—ncyèna mumanyè cyà dyanza to! Kàdi ndi...Ncyèna mwimàne kaaba aka ànu bwà—bwà kwamba cyòci eci nànsha. Mémè, ndi pàanyi mwòmò emu. Mémè, ndi munkaci mwènù. Nwamònu's, mémè, Cìdi mmémè. Ndi nè díkù. Nènku ndi nè bàna bèètù bàà balùme nè bàà bakàji bándi munangè. Nè Nzambì wa mu Dyulu, nè musàngèelu mukùmbàne bwà kupweka nè—nè kubuulula cintu aci, ku Wèndè Sungasunga...ku bikèèna—kumòna bìdi bijaadikiibwe munda mwà bidimu makùmi àsàtù nè, m'Bulelèlà. Tukààdikù. Tudi...Twàfiki. Kwàjiki. Bukèbikebi bwà maalu à mamanya mbuCiijaadike. Dishìndika dyà Dìyì dyàkaCijaadika. Nè tukaàdikù! Nè edi Dibuuulula ndifùme kùdi Nzambì, nè Didi Bulelèlà!

<sup>201</sup> Nwakwàcikù cintu kampànda anyi? [Disangisha didi dyàmba nè: “Amen.”—Muf.] Mémè's mvwa ànu ndikonka ní nuvwa bakwàte kantu. Nwamònu anyi? Èyowà's, mukalenge. Mbifwànyine díbà adi kwikala kabiyi bikèngela bwà mémè kunwàmbila's, mu dyàlumingu. Mònaayi's. Mònaayi's. Bilenga be! Mpindyewu, mpindyewu, mònaayi mpindyewu.

<sup>202</sup> Nènku díbà adi bilondèshile dí—díbà divwà Nzambì nè cyà kusungila bantu bàà kumpàlà kwà mvulà yà Noà, Yèyè wàkatùma mukankù.



Nè dībà adi bilondèshile dībà òwàYe nè cyà kusùmghila Izalèlèlà, Yèyè wàkatùma mukankù.

203 Nudikù nwtabuujà nè dībà, nànsha dyà Yonè adi, mu Cisanga cyà Paatèmò nè, Mukenji ewu wùvwa mupwàngàne menemene mu mùshindù wà nè Yèyè kàvwakù mwà kuWùpèèsha Mwanjèlò anyi? Nudi bamanyè's, mwanjèlò's mmùsànjeelà. Kàdi nudi bamanyèku nè mùsànjeelà ùvwa mupròfetà anyi? Nudi nwtabuujà aci anyi? Twánjààyaaku kucijaadika. Bwàkàbuulwibwà 22, twánjààyi bì kumòna ní cìvwa mmukankù. Èyowà's. Nwamònu's, yèyè awu's ùvwa... Bushùwà, yèyè ùvwa mwanjèlò, mmùsànjeelà awu, kàdi ùvwa mmupròfetà wàkamubuulwila Mukàndà wà Bwàkàbuulwibwà ewu mu kaabujimà.

204 Bwàkàbuulwibwà, nshapità wa 22 ku mvensà wa 19, ndi ngèèla meeji nè mmwómò pìikalàbi nè ndi mumufunde kaaba aka . . . 22.19, pàmwàpa ndi mutùpàkàne. To. [Muntu kampàndà ùdi wàmba nè: "M'22.9, pàmwàpa."—Muf.] 22.9, ki cyòci. Mvwa mutàngile pa 22.9. Ncyà bushùwà. Kaa, èyowà, ng'apa nùku.

*Pashiishe yèyè kungambila nè: Ikala mutwishiibwà nè kùcyènjì to, bwalu mèmè ndi wa ku basadidi neebè, nè wa ku bânà bèènu bapròfetà, . . .*

205 Tàngilàayi cyàkamònà Yone kaaba aka.

*. . . mèmè Yonè ngwàkamòna bintu ebi, nè wàkabyumvwa.*

206 Mpindyewu ùkaadi wòya. Ewu nshapità wa ndekeelu.

*. . . Nè pàngààkumvwà . . . pàngààkamònà, mèmè kudyùpwila pànshì bwà kukuukwila ku makàsà kwà mwanjèlò uvwa undeeja bintu ebi, uvwa undeeja bintu ebi awu.*

207 Nènku, "yèyè," pashiishe, "manjèlò awu," nwamònu's.

*Dībà adi yèyè kungambila nè: Mòna kùcyènjì to, . . .*

208 Mupròfetà mulelèlà nànsha umwe anyi mùsànjeelà wa mùshindù kaayi kì mmufwànyìnekù kwitaba bwà bàmukuukwilè nànsha, nwamònu's. Aci mbwà Nzambi nkààyendè.

*Pashiishe yèyè kungambila nè: Ikala mutwishiibwà nè kùcyènjì to, bwalu mèmè ndi wa ku basadidi neebè, nè wa ku bânà bèènu bapròfetà, nè bàà ku aba bàdi bàlamà mèyi à mu mukàndà ewu: kuukwila Nzambi.*

209 Nwamònu anyi? Mpindyewu, Mukàndà awu wùvwa nè musinga wàbùngì, mu mùshindù wà nè, Wùdi Dìyi dyà Nzambi. Mpindyewu tàngilàayi. Nènku pàdi Dìyi dyà Nzambi ditwadiibwa, bidi bìkèngela bwà kutwadiibwa Dì kùdi mupròfetà, bwalu kùdiye yèyè nkùdi Dìyi dyà Nzambi dilwa.

210 Mvwa mutèkèmène nè nêmpetè lukonko pa cyôci aci, mu—mu kashèètè emu kaaba aka. Mvwa ndyàmbedila nè, mvwakù ànu mwà kubàdyànjidilapù kakesè ndambù, nudi bamanyè's. Ndi ànu ndyùmvwà nè lùdikù mwômò amu lwà mùshindù awu, ki cyônsò cidiku. Mvwa—mvwa ànu mwele meeji nè nênkafikèku, nudi numòna's. Nwamònu anyi?

211 Dìyì dyà Nzambi dyônsò dïtu ditwàdìibwe. Bible kàtu ùshintulula ndongolwelu to, nànsha kakesè, nwamònu's. Cidi ànu cintu cìmwècìmwè aci. Didi nè cyà kulwa ànu kùdi mwena lùmònò utùdi tutèkemena nè neàfikè awu, mpindyewu mònaayi, Bwàkabuulwibwà 10.1, 7.

212 Mpindyewu túbalululààyaaku mvnsà wa—wa 9 awu. Mpindyewu tudi twangata . . . tudi . . . Mpindyewu, kumpàlà kwà twètù kuya ku yèyè mvnsà awu, ndi muswè nnùkonkèku cintu kampànda.

213 Nudikù numòna, mu mùshindù mupwàngàne, kumpàlà kwà twètù kuumuka ku Bitampì ebi anyi? Mpindyewu vùlukàayi nè, kakùcyena kàbidi makolè àpàtuka paanyimà pàà mukankù to, nwamònu's, kaàcyènakù to. Musangu wònsò wùvwà mufwilakanyi nè Kilistò ùtùma cintu kampànda, Nzambi ùvwa ùtùma bukolè kampànda. Mufwilakanyi nè Kilistò ùvwa ùtùma bukwàbò bukolè; Nzambi ùvwa ùtùma cintu kampànda bwà kubùlwisha. Pashìishe kutùmayè bukwàbò bukolè; Nzambi kutùma cingà cintu bwà kubùlwisha. Nwamònu anyi? Nènkù pashìishe pàakafikàYe ku mukankù, ciwva n'Dìyì Dyèndè, dyalùkile mùvwàDi ku cibangidilu amu.

214 Mpindyewu tàngilàayi. Mupròfètà utùdi bindile awu, kí mmuntu kampànda mullaaba nè—nè Nyumà mufwànàngàne nè wa Eliyà anyi? Kààkwikala Eliyà to, mu bushùwà bwà bwalu. Kàdi neciikalè muntu, mùshindù awu, wàlwa. Nè mudimu wèndè wà bwambi mene bùdiwu naabù mbwà kutùma, kwalujulula, kùdi bantu bàdi badishinde mu bintu bikònyàngàle byà cyena-màngumba abi, kubààluja ku Diitabuuja dyà ku cibangidilu dyà baataatù. Mpindyewu, aci cyôci kaciyi ciswikakaja Bible pàmwè to, ncyèna—ncyèna mèmè mumanyè nè ncinyi cidi cicyenza to. Ncyèna—ncyèna—ncyèna mwà kwamba cikhàbò cintu pa bwalu abu to, bwalu aci ke cyôci. Nwáfiki ànu kufika's. Aci's ke cidi Bulelèlà. Wèwè muumushekù cintu kanà cyônsò, udi ucikònyangaja. Nwamònu anyi? Pa nànkù, cidi—bikèngela ciikalè ànu mùshindù awu.

215 Mpindyewu mònaayi, mpindyewu, mu mvnsà wa 9 amu: “Misùukà yidì mwinshì mwà cyoshelu.” Mpindyewu, ke mwaba ngwòwò ewu wùngiikalà mwà kupetela mapangananganana ànu ètù à cyà bushùwà aa. Kàdi anjàayi kutàngila ànu katanci kakesè cyanàana. Nè ànu . . . Nwamònu anyi? Nànshà mèmè, ki mùmvwà ngèèla meeji, kàdi kí ncilwè mùshindù awu to. Tudi nè . . . Mvwa misangu yònsò ànu ngèèla meeji nè misùukà yìvwà mwinshì

mwà cyoshelu ayi yìwwa mbàakafwila dii—dii—diitabuuja bàà Èkèleeziyà wa ku cibangidilu. Nènku ndi mutwishiiibwe nè, èè, Docteur Uriah Smith, nè yònsò wa kùdìbo, bàdi bàmba nè mmudìbi. Nwamònu anyi? Kàdi, nànsha mémè mwinè ewu, ki mùmvwà ndyàmbidila. Kàdi pàalu Nyumà Mwìmpè kundeeja cìkèèna—kumòna cyà cyòci aci, kabìvwà nànkù to; kí mmisùùkà ayi to.

Mpindyewu, mpindyewu wèwè udi wamba nè: “Èè, mpindyewu, mémè ncyèna mumanyè abi to.”

<sup>216</sup> Èè, mpindyewu, anji indilà kakesè, netùjandulè. Tàngilàayi. Eyi kí mmisùùkà yà—yà Èkèleeziyà Mukàji—musèla to, nànsha kakesè. Tuvwa twela meeji nè ng’Èkèleeziyà Mukàji—musèla udi mwindile mwaba awu, misùùkà yidi mwinshi mwà cyoshelu, nudi numòna’s, yàkeelà lubilà nè: “Ntoo nè ku dîbà kaayi, Mukalenge, ntoo nè ku dîbà kaayi?” Ngǎnjibi ncibalùlùlè mpindyewu, bwà tucyuumvwè mu mùshindù mujaalàme.

*Nè pàakamanàye kukàngula cìtampì ciitànù, ngákamòna mwinshì mwà cyoshelu misùùkà yà aba bàakashebeyiibwà bwà dîyi dyà Nzambi, nè bwà bujaadiki bùvwàbo bashààle kacya bààkwàtakù;*

<sup>217</sup> Nwamònu’s: “Dîyi dyà Nzambi, nè bujaadiki bùvwàbo bashààle kacya bààkwàtakù abu.” Mpindyewu, kùumuku—kùumuku kaaba aku to. Anji indilà kakesè, wamònu’s.

*Nè bààkela lubilà... Ntoo nè ku dîbà kaayi,... Mukalenge, ntoo nè ku dîbà kaayi? ... (nwamònu anyi?)... wa cijila nè mulelèlè, ùdì ujànguluka... kulumbulwisha nè kusombwela bwà mashi ètù kùdì aba bàdi basòmbèle pa buloba?*

*Nè mizàbì mitòòke yàkafidiibwa kùdì yònsò wa kùdìbo; nè bààkabàmbila nè, bìvwà bikèngela bwà kwanji kwikishabò bwà cikondo cìpì, too nè pàvwà basadidi naabò kàbìdì nè—nè... bânà bààbò, bàvwà nè cyà kushebeyiibwabò bu bwòbò abu, nè cyà kukùmbanabù.*

<sup>218</sup> Mpindyewu, bwalu bwòbò, pa dîbà edi, bu nwènù mwà kumòna, Cìtampì Ciitànù eci cìkàngudiibwe, nwamònu’s, Èkèleeziyà mmuyè. Kacyèna ànu mwà kwikala aci to, misùùkà mwinshi mwà Èkèleeziyà wa—wa ku cibangidilu.

<sup>219</sup> Mpindyewu, mpindyewu, bu nwènù mwà kuswà, ní nukààdikù batèye ntèmà ku cyòci eci mpindyewu, bu mùdìbi nè eci mbwalu bunènè bwà dikòkangan—...dikòkangana, pa nànkù ndi muswè bwà nùteelejè nè ntèmà yònsò mpindyewu. Nè nudi nè mabèji ènù, nè bikwàbò byà kufùnda naabi. Mpindyewu, ndi muswè bwà nùteelejè.

<sup>220</sup> Mpindyewu, eyi kayèèna mwà kwikala misùùkà ayi to. Bwalu, misùùkà yà—yà baakàne, bàakashebeyàbo bwà

diitabuuja abu, nè bantu baakàne, Èkèleeziyà, Mukàji-musèla, bàkaadi bamanè kwambwibwa, pa nàнку kí mbafwànyine kwikala mwinshì mwà cyoshelu nànsha. Bwòbò mbafwànyine kwikala mu Butùmbi, pàmwè nè Mukàji-musèla. Mpindyewu tàngilàayi. Bwalu, bwòbò bàkaadi bayè mu Dyambwibwa, mu nshapità mwi4 wa Bwàkabuulwibwà. Bàakambwibwa.

<sup>221</sup> Mpindyewu, misùukà eyi mbanganyì, díbà adi's? Ke cintu cidì cìlonà ncyòci aci. Mbanganyì, díbà adi, piikalàbi nè kabèèna Èkèleeziyà wa ku cibangidilu awu to? Ewu ny'Izàlèèlè wíkala nè cyà kusùngidiibwa bu ditùnga, bwònsò bàdì badyànjila kulongolola abu. Awu ny'Izàlèèlè. Awu ny'Izàlèèlè, yèyè mwinè.

<sup>222</sup> Wèwè udi wamba nè: "Kaa, anji indilà kakesè." Udi wamba nè: "Kabèèna mwà kusùngidiibwa to." Kaa, èyowà's, s'bidi bikèngela bàsungidiibwè.

<sup>223</sup> Mònaayi's, twànjibi kukòsa bwalu abu, katanci kakesè cyaanàna. Ndi nè Mifùndù yinaayi anyì yitaanu. Nèngàngatè wánwèpelè. Twànjibi kwangata Loomò, bwà katanci kakesè, bwà kujandula ní ki cìdibo. Twànjibi kwangata Mukàndà wà Loomò, nè tuye ku nshapità wa—wa 11 wa Loomò, nènku netùjandule. Anu. . . Twànjibi ànu kucibala, nè pashiiishe netùcijandule twètù biinè. Loomò, nshapità wa 11, mvensà wa 25 nè wa 26. Mpindyewu tèelejàayaaku Pòlò kaaba aka.

<sup>224</sup> Nènku Pòlò mmwambè nè: "Muntu mukwàbò kampàndà nànsha mwikàle nganyì, nànsha mene Mwanjèlò, yèyè muyiishe èvànjeeliyò mukwàbò nànsha wa bishi," (cinyi?) "bìvwa bikèngela kwediibwayè mulawu." Tàngilàayi.

*Bwalu ncyèna muswè to, bàna bèètù; bwà nwènù kwikala bapangè bwalu busokoka (uh!), bwà kanwikadi nwàlwa kwikala beena meeji ku maditambishi ènù nwènù biinè (kadi's ke bwalu abu); bufofo ndambù mbwenzèkèlè Izàlèèlè, too nè ku dyula, díbwela dyà kaabujimà kàà bàà Bisàmbà byà bendè.*

<sup>225</sup> Mukàji-musèla wa ndekeelu wa bàà Bisàmbà byà bendè àbwejiibwè, bwà Mukàji-musèla, bufofo mbukwàte Izàlèèlè mu kwòkò kiipàcìlà aku.

*Nàнку awu Izàlèèlè yònsò neàsungidiibwè, bilondèshìle mùdìbi bifùnda nè: Nekùpatukilè Musùngidi mu Sìonà, nè neipatè dipeetula dyà maalu à Nzambi bwà Yakòbò:*

<sup>226</sup> Cyà bushùwà! Mpindyewu, bwòbò abu ny'Izàlèèlè, bàdì mwinshì mwà cyoshelu eci abu. Tàngilàayi. Izàlèèlè wàkafofomijiibwa mu kiipàcìlà mene kàà nè twètù túsungidiibwè. Nudi nwitabuuja aci anyì? Mpindyewu, nganyì wàkabàfofomija? Nzambi. Nzambi ngwàkafofomija bàna Bèndè Sungasunga.

227 Kabyèna bikèmesha to, Yesù, ùsanganyibwa pa nkùrusè pààpa, nè beena Yudà abu bèèla mikunda bàlòm̄ba Mashi Èndè! S'bàvwa bàna Bèndè Sungasunga. Nè Yèyè mwikàle Mifundu. Ke civwàYe, Yèyè mwinè, Díyì. Nènku mwab'ewu, bu mùvwàYe mumanyè nè bantu abu bàvwa mwà kuMwakidila nè disànka! Nènku ke bwà cinyì Wàkabàfomija, bwà kabìikadi bààlwa kuMujingulula to. Wàkalwa mu mùshindù mupwekèle menemene, nè kubàfomija bwà kabàcimònu to, bwà kabàcyàkididì to. Nwamònu anyi? Mifundu yivwa myambè nè ncìvwàbo mwà kwenza. Ke kubàfomijaYè. Bàvwa bafomija's! Yesù wàkabùmvwila luse, bikolè menemene, pàakambàYe nè: "Taatù, bàfwilè luse. Kì mbamanyè cidìbo bènza aci to." Nwamònu anyi? Bàvwa mpofo. Pòlò mmwàmbè nè bàvwa bafomija mu kiipàcilà, bwètù twètù.

228 Mònaayi's. Mpindyewu ndi muswè bwà nutangilè cyôci eci nè ntèmà yònsò. "Bààkabàpèèsha mizàbì." Kabàvwa naayi to. Bààkabàpèèsha mizàbì, mizàbì mitòòke, yònsò wa kùdìbo. Mpindyewu, bansantu mpindyewu bàdi nè, bàkaadi naawù; bàdi bàwùpetela pànwapa. Kàdi, mwàmwa: "Bààkabàpèèsha mizàbì." Kàdi bansantu bwòbò bàkaavwa nè yàbò, nè bayè. Nwamònu anyi? Nwamònu anyi? Bwòbò kabàvwa—kabàvwa naayi. . .

229 Bwòbò, nwamònu's, kabààkapeta mpùngà to, bwalu bàvwa bafomija kùdi Nzambì, Taatù wabò sungasunga awu; bwà ngàsà wa Nzambì wàmòna mwà kuula, bwà Mukàji-musèla wàmòna mwà kupàtudiibwa mu bàà Bisàmbà byà bendè. Mmwòmò anyi?

230 Ngǎnji—ngǎnji nnùpèèshèku cifwànyikijilu cilenga kaaba aka mu Yòzefù; Yòzefù, muntu wa Nyumà awu, mukankù awu. Wàkalediibwa munkaci mwà bàna bààbò, ànu mùdi Èkéleziyà mulelèlè mulediibwe munkaci mwà mukwàbò emu. Nè yèyè ùvwa mwà kuumvwija bilòòtà nè kumòna bikèèna-kumòna. Kàdi bakwàbò abu bààkamukina. Tatwèndè ùvwa mumunangè.

231 Mònaayi nè, pashìishe, wàkeediibwa pambèlu, wàkiipaciibwa kùdi bàna bààbò, kí nkùdi tatwèndè to. Pambèlu, kùdi bàna bààbò, nè wàkapàanyishiibwa bwà bìnjàànjà byà mfranga bitwè ku makùmi àsàtù. Kwediibwa mu ciinà, nè kucinkabò nè mmufwè.

232 Wàkangaciibwa, nè kumusòmbesha ku dyàbalùmè dyà Pàlò. Nènku bwalu wàkeediibwa pambèlu kùdi bàna bààbò, nwamònu's, bààkamupèèsha mukàji-musèla wa bàà Bisàmbà byà bendè, kàyì wa ku bàà kwàbò sungasunga to. Ku cyôci aci, kulelayè Efàlàyimà nè Maanàsè, bààkasàkidiibwà mu Izàlèlèlè abu.

233 PààkabènesHà Izàlèlèlè, mu kucyàmakaja kwà byanza byèndè, kuumuka ku wa mùkalà kuya ku mwanààbutè, bwà kucyàmakaja mabènesha kuumuka ku beena Yudà, kwaluja. . .

anyi kuumusha kùdi beena Yudà kutùma kùdi bàà Bisàmbà byà bendè. Nwamònu anyi? Kucyàmakajayè byanza byèndè, kutùma kù mwànà wa balùme wa mùkalà, udi Èkèleeziyà wa mùkalà udi mubwelè. “Èkèleeziyà maa—maamù ùvwa mwimàne mu dībà; kulelayè mwànà ewu.” Kàdi mōnaayi nè, bwà kumupeta, Izàlèèlà wàkacyàmakaja byanza, mu cifwànyikijilu. Nè Yòzefù. . .

Bànà bàmwèbàmwè abu, bàvwa bàà kùdi maamù wa bàà Bisàmbà byà bendè.

<sup>234</sup> Mukàji-musèla wa beena Izàlèèlà, kuntwaku, wàkalwa mucyàmàkàne, kuumuka ku ba-Orthodoxe bàà kale, kuya ku mùshindù wà bwena Kilistò, ku Nyumà Mwìmpè wàkacyàmakaja byanza byà Izàlèèlà. Wàkamba nè: “Nzambì ngudi mucyàmàkàje byanza byànyì awu.” Yèyè kàvwa nè cyà dýenzamu nànsha cimwè to.

<sup>235</sup> Mōnaayi’s. Dībà adi, Yòzefù, mubèngiibwe kùdi bàna bààbò, bàà kwàbò sungasunga, wàkangata mukàji-musèla wa bàà Bisàmbà byà bendè. Anu menemene cyàkenzà Yesù; mubèngiibwe kùdi beena Yudà, wàkangata Mukàji-musèla wa bàà Bisàmbà byà bendè.

<sup>236</sup> Mpindyewu tùbalààyaaku cintu kampànda kaaba aka. Ndi mufunde Mufundu kampànda, Byenzedi 15. Nènku, kaa, eci cìdi menemene ànu mu mùshindù kampànda citùdi nè cyà kulongesha’s, twamb’eku twamb’eku. Mpindyewu, ngèèla meeji nè ndi mwangàte eci mu cyòci, bwà kubala Byenzedi 15.14. Èyo. Ndi ntèkemena nè eci cìdi mu cyòci mpindyewu. Èyo. “Simèòna wàlondù mùvwà Nzambì. . .” To, túbangilàayi ku mvensà wa 13.

*Nè paanyimà pàà bwòbò bamanè kupùwa, Yakòbò wàkandamuna, . . .*

<sup>237</sup> Mpindyewu, nudi numòna’s, cyàkenzekà cìvwa nè, bwòbò bàvwa bayè ku bàà Bisàmbà byà bendè. Nwamònu anyi? Nè dikòkangana divwa munkaci mwà kwenzeka, bwalu bwòbò bàvwa beena Yudà. Nwamònu anyi?

*Nè paanyimà pàà bwòbò bamanè kupùwa, Yakòbò wàkandamuna, wamba nè: Balùmyànà nè bàna bakwèètù wayààyà, ntèlèlèjaayi:*

*Simèòna (N’Simonà Peetèlò awu) wàm̀bì patòòke mùvwà Nzambì ku ntwàdijilu mudyànjile kumwènekela bàà Bisàmbà byà bendè, bwà kwangatayè munkaci mwabò cisàmbà kampànda bwà dìnà dyèndè.*

<sup>238</sup> Huh! Nwamònu’s, dìnà dyà mukàjàanyi divwa m’Broy. Pàngàakamusèlè, kulwayè Branham. Nwamònu anyi?

<sup>239</sup> Yesù ùdi ùsungula Èkèleeziyà Wendè, anyi Mukàji-musèla Wendè, mu bàà Bisàmbà byà bendè. M’Mufundu awu, mwamba mu cifwànyikijilu, ànu mùvwà Yòzefù amu.

<sup>240</sup> Mpindyewu mōnaayi eci, mpindyewu, misuùkà yìdi mwinshì mwà cyoshelu eyi. Èè, eyi. . . eci nùnkù: “Misuùkà eyi,” tuumvwa

mpindyewu nè, “yìdi mwinshì mwà cyoshelu,” bwà cinyi bàakashebeyiibwa bwà diitabuuja kùdi bantu babì bu mùdi Eichmann. Nwamònu anyì? Mbatùngùnùke ànu nè kwindila, miliyò mijimà yà bantu, nwamònu’s, kàdi mbashààle ànu beena Yudà’s.

<sup>241</sup> Mpindyewu, vùlukàyi’s. Cìvwa ncinyi aci? “Bàakashebeyiibwa bwà bwalu bwà Dìyi dyà Nzambi,” kabìvwa bwà bujaadiki bwà Kilistò nànsha. Nuvwakù bumvwè nàнку anyì?

<sup>242</sup> Kàdi, vùlukàayi nè, Èkèleeziyà pèndè, wàkopicilakù, bafwile diitabuuja bàà Èkèleeziyà abu, cìvwa mbwà Dìyi dyà Nzambi nè bwà bujaadiki bwà Yesù Kilistò. Mbanganyi bàtù bamanyè aci nàнку, kaaba aka mu...? [Disangisha didi dyàmba nè: “Amen.”—Muf.] Èyowà. Èyo.

<sup>243</sup> Mpindyewu, kàdi aba nùнку bwòbò kabàvwa nè bujaadiki bwà Yesù Kilistò nànsha.

*... bwà Dìyi dyà Nzambi, nè bwà bujaadiki bùvwàbo bashààle kacya bààkwàtakù abu:*

<sup>244</sup> Beena Yudà! Nè Hitler wàkabàkìna, nè Eichmann pèndè, nè Staline pèndè, nè bakwàbò bwònsò bàà pa buloba. Nwamònu anyì? Kàdi bwòbò bààkashààla ànu nè lulamatu ku cìvwàbo biitàbùùje. Nè bààkabàshebeya nè bwalu bàvwa beena Yudà.

<sup>245</sup> Nuvwakù bamanyè nè Martin Luther pèndè, mu mùshindù kampànda, ùvwa nè mmwènenu wumwèwumwè awu anyì? Mbulelèlà. Wàkamba nè: “Beena Yudà bwònsò bìvwa bikèngela kwipaciibwabò. Bwòbò ke mufwilakanyi nè Kilistò.” Nwamònu anyì? Kàdi yèyè ùvwa ànu wa mu cipungu cìkwàbò, nè kàvwa mucimòne to, kàvwa mumòne Dìyi to.

<sup>246</sup> Mpindyewu Dìyi, Bulelèlà, bùdi bùseemena. Mmunyi muwikalàku mwà kufofomija Izalèlèlà bwà kashidi? Kwèna mwà kucyènzakù to. To.

<sup>247</sup> Kaa, mmunyi mùvwàku mupròfetà awu mufwànyine kwimana kwàka, ditùkù adi, kwamba nè: “Udi mufwànàngàne nè kàbalù kàà lusèngù lùmwe, wèwè Izalèlèlà?” Piinè apu mpàvwàbo bàteeta bwà kumuleeja bilèmà byèndè byà bitàmbe bubì’s! Kwambayè nè: “Mòna’s,” yèyè nè, “ewu yònsò udi ukubènèsha wèwè neàbeneshiibwe, nè ewu yònsò udi ukwela mulawu neèdiibwè mulawu.” Ncyà bushùwà. Kaa, balùmyànà wa yààyà! Mmunyi muwàcyènzà’s?

<sup>248</sup> Musangu kampànda bààkeela meeji nè Nzambi ùvwa mwà kupwà mwoyi, pààkamònà mupròfetà cintu cifiike aci cìlwila beena Yudà. Muntu awu mwimàne mwaba awu, nè Dìyi dyà Nzambi òmwicikidila. Kwambayè nè: “Èyi Mukalenge, Wèwè newikalè mwà kupwà cisàmbà Cyèbè mwoyi anyì?”

Yèyè kwamba nè: “Cìdi ku luseke lwèbè aku ncinyi?”

Awu nè: “Mucì wà kupima naawù.”

249 Yèyè kwamba nè: “Dyulu didi butùmbùke kaayi? Pimàbi tǔng.” Uh-huh. “Mbù ùdi nè bwondòke kaayi?”

Awu nè: “Ncyèna mwà kubìpima to.”

250 Yèyè kwamba nè: “Nànsha Mémè, nànsha Mémè ncyèna mwà kupwàku Izalèlèlà mwoyi nànsha.” To, mukalenge. Yèyè kààkumupwàku mwoyi nànsha.

251 Byàkakèngela bwà kufofomija Yè mwan’Èndè Sungasunga’s. Mpindyewu, anjì elààyibi meeji ku cyòci aci. Ufomomija mwan’Èndè Sungasunga, bwà kutùpèèsha twètù mpùngà, kàdi twètù tuCidyombola. Mpindyewu, aci kaciyèna cyènzakù bwà ùdyùmwè mukesè menemene mu mùshindù wà mufwànyine kwenda kukalabila mwinshì mwà dibwe dyà nshàamendà mwàsè cifulu cyà bujitu bwà kilò makùmi ànaayi ku mutù, kàdi kùyikù ucilenga anyi? Aci’s ncikèsè menemene, nudi bamanyè’s. Kaa, ekèlekèlè! Èyowà’s.

252 “Bàvwa bashààle kacya bààkwàta ku Dìyì dyà Nzambì.” Bàvwa mbeena Yudà. Bàvwa nè mikenji yàbò; bàvwa nè lulamatu ku yôyi. Mpindyewu, nudi bavùlùke makèlèlè dilòlò anyi? Nwamònu anyi? Bàvwa nè lulamatu ku yôyi. Nè bàvwa mbeena Yudà, nè bàvwa nè mikenji. Nè mikenji ayi yivwa Dìyì dyà Nzambì, nè bàvwa bashààle ànu balamàtekù. Ncyà bushùwà. “Nè bwà bujaadiki bùvwàbo bashààle kacya bààkwàtakù abu, bààkashebeyiibwa bwà diitabuuja.” Nènkù’s ke misùùkà eyi yivwa mwinshì mwà cyoshelu, paanyimà pàà Èkèleeziyà mumanè kuya.

253 Mpindyewu tàngilàayi. Bwòbò, mu bufofo bwàbò abu, bààkashebeya Maasiyà wabò, nènkù mpindyewu bàkaavwa bàyooba bwà cyòci aci. Bààkacimanya. Bààkacijingulula, paanyimà pàà cimanè kupìta. BààkaMumòna díbà adi, pààkafikàbò kumpàlà kwà cyoshelu cyà Nzambì. Kàdi mpindyewu ngàsà wa Nzambì ùdikù bwàbò bwòbò.

254 Tàngilàayi. Mpindyewu, bwòbò, kì mbafwànyinekù kwikala bansantu to, nànsha byà munyi, bwalu nùnkù mbamanè kuvwàla mìzàbì yàbò. Kàdi’s kì bwòbò aba mpindyewu, biikàle ànu “misùùkà yìdi mwinshì mwà cyoshelu, bwà Dìyì dyà Nzambì, nè bwà bujaadiki bùvwàbo bashààle kacya bààkwàta,” mùvwàbo cisàmbà cyà Nzambì, beena Yudà abu’s.

255 Kàdi mpindyewu, tàngilàayi, ngàsà wa Nzambì nyèwù ùlwa kùdìbo. Nè Yesù ùdi ùbàpèèsha, muntu nè muntu, mùzàbì mutòòke, (kaa, ekèlekèlè, tàngilàayi; dyàmwàmwa, paanyimà pàà Èkèleeziyà mumanè kuya), mbwalu bàvwa nè lulamatu ku kiipàcilà kààbò. Kàdi bàvwa bafofomija, kàdi kabàyi bacimanyè to. Kabàvwa bacimanyè to. Bàvwa bàkwàta mudimu menemene wùvwà Nzambì mubàlongòlwèle bwà kwenzabò. Nènkù apa, apa, Yone ùdi ùtàngila ùmòna misùùkà mwinshì mwà cyoshelu. Mpindyewu tàngilàayi, ùdi ùmòna misùùkà ayi. Tàngilàayi nùmonè mùdiye uyibiikila.



Yìdi yèla lubilà nè: “Mukalenge, ntoo nè díbà kaayi?”

Tàngilàayi: “Ànu katancì kakesè kàbìdì.” Nwamònu anyi?

256 Twàngatàayi aci, patùdì twenda tupweka, tukenketa Mifùndu mpindyewu apa. Bààmanyì nè bàvwa bashipè Maasiyà wabò nè cikisu. Nwamònu anyi? Kàdì kabàvwa bacimanyè to, kàdì pashìishe kumanyabò. Bwòbò pààbò—bwòbò pààbò kushipiibwabò nè cikisu, cibálùkìdìlè’s, bwà kuyoobabò bwà cyòcì aci: dyaenza dyàbò dyà bibi adi. Kàdì tàngilàayi nùmonè nè ncintu kaayi cìvwà cikèngelà bwà kwenzabò! Nwamònu’s, bàvwa bapìile bwà dishipa nè cikisu, pa nàнку kushipiibwabò nè cikisu. Nwamònu anyi? Kwelabò lubilà nè: “Mashi Èndè ìkalè pambidi pèètù!” Nwamònu anyi? Ncyà bushùwà. Kàdì bàvwa bafofomija.

257 Mpindyewu, bu nè kabàvwa bafofòmìjìibwe to; Nzambì wàkamba nè: “Bàlekèlaayi. Kí mbakùmbànyìne to.” Kàdì bu mùdìbì nè bàvwa bafofòmìjìibwe kùdì Nzambì, ngàsà Wendè wàkapweka too nè kùdìbò. Amen! Nwènu bàdì bààkula bwà ngàsà udi ukèmesha’s wè! Kàdì kupèèsha yònsò wa kùdìbò mùzàbì, bwalu Izalèèlè mujimà neàsungidiibwè, muntu nè muntu udi nè dìnà dyèndè difunda. Ncyà bushùwà. Yesù wàkabàpèèsha mìzàbì.

258 Ànu mwàkenzelà Yòzefù bânà bààbò; cifwànyikijilu’s. Tàngilàayi, Yòzefù pààkiimanàye mwaba awu, nè ndekeelu wa byònsò pàvwàye. . . Yèyè kudimanyisha mwaba awu pabwìpì nè cyoshelu, cyoshelu cyèndè sungasunga, mu nzùbu wèndè wa bukalenge, nkwasà wèndè wa butùmbi. Kwambayè nè: “Bantu bònsò nshìilaayi mwaba.” Mukàjèndè ùvwa mu nzùbu wa bukalenge; ke mwìkalà Mukàjì-musèla mwà kusanganyiibwa.

259 Ke kubàmbilayè, kwamba nè: “Kanwèna bammanyè anyi?” È, s’nyèyè ewu wàkula cyena Ebèlù mpindyewu. “Ndi mwanèènu, Yòzefù.” Kaa, ekèlekèlè!

Bwòbò ne: “Mpindyewu, kaa, wèwè’s watùpetèdì pabwìpì’s.”

260 Yèyè kwamba nè: “Indìlaayi kakesè. Indìlaayi kakesè. Nzambì nguvwa mwenzè cyòcì aci mu kiipàcìlè kampàndà. Ùvwa munwènzèje bwà nùngiimànshè, bwà kusùngìla mwoyi.” Butùmbi’s wè! Ki bwalu mbwòbù abu’s, menemene. Yèyè kwamba nè: “Kanùdìfìkìdì, kanùdìfìkìdì nwènu biine munda to.” Nudi bavùlùke nè Yòzefù wàkamba nàнку awu anyi? Yèyè kwamba nè: “Kanùdìfìkìdì nwènu biine munda to. Maalu wònsò àdì mu wòwò mpindyewu. Byònsò byàmanyì kujìka. Nzambì ngudi muntùme mùnwemu, bwà kunùdyànjidìla.”

261 Nudi bamanyè’s, Bible mmwàmbè nè bwòbò nebàMwambìlè, pààMumònàbo ùlwa, bamba nè: “Ambàbì tǔng, Wèwè’s udi Maasiyà, tudì bamanyè. Kàdì, kàdì, abi bibangu mbyà bìshì?” Nwamònu anyi?

262 Yèyè kwamba nè: “Kaa, s’Ndi mubìpetèle mu nzùbu wa balundà Bàànyì.” Balundà?

263 Nènku díbà adi pààcimanyàbo, bwòbò bàdi bashààle abu, binunu lukàmà nè makùmi ànaayi nè binaayi abu, Bible mmwàmbe nè nebàdyàbànyè, ewu nzùbu pa bule nè mukwàbò pa bule. Nè nebyàngatè matùkù, ànu bwà kudila myadi, nè kutwà mikèmù, bènda panshì apu bàtwa eku bàtwa eku; bàmba nè: “Tudi benzè ebu bwalu bishi’s? Tudi benzè ebu bwalu bishi’s? Mòna’s, twètù’s tudi bapoopèle Maasiyà wetù sungasunga pa nkùrusè.” Mmwàmbe nè, bàdila mùdi díkù difwànyine kudila mwànaàbò umwèpelè mulela nè: “Tudi benzè ebu bwalu bishi’s?”

264 Beena Yudà abu, bwòbò’s ke—bwòbò’s ke bantu bàdi batàmbe kwikala batèndeledi pa buloba apa; basungula bàà Nzambi. Kàdi Wàkabàfomija, bwà kutwàngata twètù, kàdi twètù kuCidyombola. Ndilumbulwisha kaayi díikalà bwà èkèleeziyà wa bàà Bisàmbà byà bendè’s wè! Ki bwalu mbwòbù abu’s. Nwamònu anyi? Bafomija ku bukolè, kùdi Nzambi, bwà Wàmòna mwà kutùpeta twètù, Mukàji-musèla bwà Yesù. Kubàngata munkaci mwà... Nwamònu anyi? Nè badyànjlile kucileja mu cifwànyikijilu, nè kantu nè kantu.

265 Nudi numòna mpindyewu nè misùùkà ayi mbanganyi anyi? Kí mbasantu bàakasheyàbo bwà diitabuuja nànsha. Abu mbamanè kuya. Ncyà bushùwà. Mònaayi nè, abu bàvwa, bàkaavwa bamanè kuya. Nwamònu anyi?

266 Pa nàнку, aba nùнку bábàpèèshi mìzàbì, yònsò wa kùdìbo. Nènku mpindyewu ndi muswè bwà nwènu kumòna. Kàdi mpindyewu ngàsà wa Nzambi ùdi winama panshì ùya kùdìbo. Yesù ùdi ùbàpèèsha muntu nè muntu mùzàbì mutòòke, mwàkafilà Yòzefù, ngàsà wendè kùdi bàna bààbò amu.

267 Mpindyewu tàngilàayi. Bwòbò pààbò, nànsha mwàkateetàbo bwà kukòsoloka nè Yòzefù amu, kàdi ngàsà wendè wàkadinana kufika too nè kùdìbo. Nwamònu anyi? “Kaa, abi’s bìdi ànu bìmpè. S’bìdi ànu bìmpè. Kanùvwa nè meeji à kwenza cyòci aci to. Kàdi, nwamònu’s, cìvwa n’Nzambi uvwa wenza aci awu. Nwamònu anyi? Nzambi ngudi munùlekèle nwènu bwònsò nwenza cyòci aci bwà Wàmòna mwà kunguumusha, nè kumfikisha too nè mùnwemu emu bwà ngaamòna mwà kusungila myoyi yà bantu, bàà Bisàmbà byà bendè aba, mùndì mupètèle mukàjàanyi emu. Nùнку ncyèna mupètèku mukàji mwìnè to bu—bu nè mvwa mushààle kuntwaku. Mpindyewu, ndi munange mukàjàanyi. Nyèyè ewu mundelèlekù bàna aba.” Ki yèyè kwamba nè: “Ndi—ndi... Nènku mpindyewu—mpindyewu ndi muswè kulwa bwà kunwàngata bwònsò. Mpindyewu nwènu bwònsò pèènu, nenùpetè nsòmbelu mulenga. Nèngìikalè mwà kunùfikisha mùnwemu. Netwikalè mwà kusòmba bwònsò kaaba kàmwè, bu díkù dinène òmwèpelè.” Nwamònu anyi? Nwamònu anyi? Nwamònu anyi? Yèyè kwamba nè: “Cintu cimwèpelè

cîndiku muswè kunùkonka. Taatù wanyì mukùlàkàji awu ùcìcidi nè mwoyi anyì?” Kaa!

268 Kàdi mutàngilaayi nùmonè, cyàkenzelàye Benyàmìnà mwànà awu, yèyè udi cifwànyikijilu cyà binunu lukàmà nè makùmi ànaayi nè binaayi awu, mutwàfikàku pashiishe. Nudi bamòne cyàkenzàye anyì? Wàkaasa ànu lubilu kuya buludì mutàngile kùdì Benyàmìnà, kumuupukila kunshìngù nè kubangayè kumwela kàpà. Mwakùnyèèndè wa balùme uvwa mulediibwe mu dîkù adi pàkaavwàye yèyè muumùke, nwamònu’s; wa ku luseke lwà mamwèndè, èkèleeziyà wa kumpàla, èkèleeziyà wa Orthodoxe awu. Binunu lukàmà nè makùmi ànaayi nè binaayi bàvwa balela Yèyè kàyipù to abu, pàvwàYe muumùke muyè bwà kapeta Mukàj’Èndè-musèla wa bàà Bisàmbà byà bendè apu. Kaa, ekèlekèle! Aci kaciyènakù ànu cînwenza cintu kampànda anyì? Ki cyòci aci’s. Pa nàнку nudi bamòne nè mbanganyì anyì? S’ki bwòbò abu.

269 Mònaayi mpindyewu nè, nànsha mwàkateetàbo bwà kukòsoloka nè Yòzefù, ngàsà wendè wàkafika too nè kùdìbo.

270 Nànsha mwàkateetàbo bwà kukòsoloka nè Yesù, Yèyè ùcidi ànu wàlukila kùdìbo, bwalu bàvwa mpofò, nè ùbàpèèsha, muntu nè muntu, mùzàbì mutòòke. Neikalè mwà kuya naabò, buludì too, nè kumbèlu, nànsha bìshi. Kabyèna nè cidìbi bìshintulula to nànsha cikesè, bwalu Yèyè ùkaadi mumanè kwamba nè: “Nèmbàsungilè bwònsò, nànsha bìshi.” Nwamònu anyì?

Mpindyewu mvensà wa 10. Mònaayi nè, bàvwa bàlòmba “disombwela.” Nwamònu anyì?

271 Mpindyewu, bu nè bàvwa m’Mukàjì-musèla, nùnkù mbyenzè bu byà Stèfanè nè: “Taatù, bàfwilè luse,” nudi bamanyè’s. Nwamònu anyì?

272 Kàdi aba mbeena Yudà bàcidi bàbwelelakù, nwamònu’s. Bwòbò bàvwa bàlòmba disombwela. Mònaayi cyàkàbìdì, nwamònu’s, Wàkamba cyàkàbìdì nè. . . Mònaayi nè, kabyèna. . . Wàkamba nè: “Mbànà bèènù,” beena Yudà’s. Lukàmà. . . Mpindyewu bwòbò bàvwa baswè disombwela. Bààkamba nè: “Kaa, twètù’s netwikalè mwà. . . Tudi, tudi twètù baswè bwà ùtùsombwèlè panshi pààpa.”

273 KwambaYe nè: “Anjì indilaayi bwà kataanci kakesè, mpindyewu, anjì indilaayi bwà kataanci kakesè.” Bwalu, mònaayi nè, ngànji ncibalèbi kaaba aka. Cìdi mu mvensà wa—wa 10. Èyo.

*Nè bààkela lubilà lwà dîyi dikolè, bàmba nè: Ntoo nè ku dîbà kaayi, Èyi Mukalenge, wa cijila nè mulelèlà, kuwàlumbulwisha nè kusombwela bwà mashi ètù kùdì aba bàdì basòmbèle pa buloba?*

*Nè mizàbì mitòòke yàkafidiibwa kùdì yònsò wa kùdìbo; nè bààkabàmbila nè, bìvwa bìkèngela bwà*

*kwanji kwikishabò . . . cikondo cîpî, nwamònu's, (cinyi?)  
cikondo cîpî, too nè pàvwà basadidi naabò . . .*

274 Nwamònu anyi? Mpindyewu ncinyi aci? Bapròfetà abu mpindyewu bàdi bàyiisha Izalèlèlà. Nwamònu anyi?

*. . . too nè pàvwà basadidi naabò kàbìdì. . . basadidi  
naabò kàbìdì nè bânà bààbò, bàvwà bàkèngelà  
kushebeyiibwabò . . .*

275 Nwamònu's, aba bàvwà badyànjila kulongolola bwà kwenjiibwabò nàнку awu. Nudi numòna anyi?

*. . . bàkèngelà kushebeyiibwabò bu bwòbò abu,  
bàkèngelà kushebeyiibwabò.*

276 Nwamònu's, mu ngaakwilù mukwàbò, ncidyànjila kubàlongolwela. M'Mifùndu, bwà nè bìdì bikèngelà bwà kucyènzabò. "Nènku anjàayi ànu kwikisha bwà tataanci kakesè. Mpindyewu nyawù nwàpeci mìzàbì yènu; nudi nwalukila kwènu; nènku anjì sòmbaayi ànu mwaba awu bwà kataanci kakesè, nwamònu's, indilaayi ànu bwà kataanci kakesè cyanààna."

277 Mpindyewu mònaayi. Mpindyewu mònaayi nè: "Bânà bèènu." "Bânà bèènu bàcivwà bàkèngelà kusheyiibwabò," mbwena kwamba nè binunu lukàmà nè makùmi ànaayi nè binaayi bàcivwà bàkèngelà kubiikidiibwabò mu Dikènga dinène. Nènku binunu lukàmà nè makùmi ànaayi nè binaayi bàdi babiikidiibwe abu's.

278 Mvw'a kujinga twìkalakù nè díbà's. Tudi bafwànyine kucyàngata màalabà dilòlò, bu Mukalenge mwà kwanyisha, tudì . . . kumpàla menemene kwà twètù kwangata cikwàbò Cítampì aci. Nwamònu anyi?

279 Kàbìdì, mpindyewu tàngilàayi, bikèngelà bàshebeyiibwè bwà diitabuuja kùdì mufwilakanyi nè Kilistò. Tudi bafùme ku dicikenketa; nènku mònaayi, mu dibàndà dyà pa kàbalù dyà ndekeelu, pàdiye ùshipa—ùshipa cipungidi aci nè beena Yudà abu kuntwaku. Nènku's ke yèyè uyàaya awu. Nwamònu anyi?

280 Beena Yudà aba, binunu lukàmà nè makùmi ànaayi nè binaayi aba, bàdi nè cyà kubiikidiibwa bwà kupàtukabò kùdì bantèmù bàbìdì bàà mu Bwàkabuulwibwà 11 abu. Mpindyewu, nudi bavùlùke's, bìvwa bikèngelà bwà kwenzabò cipròfetà.

281 Nudi babalè aci. Mbanganyi bàdi babalè aci? [Disangisha didi dyàmbe nè: "Amen."—Muf.] Bushùwà, twètù bwònsò tudì bamanyè aci mu kubala kwà Mifùndu.

282 Nènku bàdi bèza cipròfetà, bantèmù bàbìdì aba mbàdì bèza cipròfetà, mu cikondo cyà citùpà ciibìdì cyà lumingu lwà makùmi mwandamutèkètè lwà Danyèlè. Ayi's ke bidimu bisàtù nè citùpà byà ndekeelu.

283 Nudi bavùlùke mutwàkangatà lumingu lwà makùmi mwandamutèkètè lwà Danyèlè alu anyi? Ngàkamba nè tuvwa

mwà kwikala naaci dijinga patúvwà mwà kubwela mu eci nùnkú. Ncivwa mumanyè nè bìvwa mbwà cinyi to, kàdi mvwa ànu... Cintu kampànda ncyàkangambilà nè tuvwa mwà kwikala naaci dijinga, nènku's ki twètù bàdìpu aba. Èyowà. Nwamònu anyi?

<sup>284</sup> Mònaayi, mu cikondo cyà Danyèlè. Mpindyewu vùlukàayi nè, Danyèlè bàakamwambila nè: “Maasiyà úvwa mwà kulwa,” mfùmù awu, “Maasiyà awu,” èyowà's wè, “nè Úvwa mwà kwamba cipròfetà. Izàlèlèlà ùcìcìvwa nè mbingu makùmi mwandamutekètè mishààle. Nè munkaci mwà mbingu makùmi mwandamutekètè ayi, Maasiyà úvwa mwà kuumushiibwa, nè mulàmbù wà bwàcyà bwilà wùmushiibwa.” Mmwómò anyi? “Kàdi nekwikalè kàbìdi kushààle mbingu yisàtù nè citùpà, mbingu mikòsa.”

<sup>285</sup> Mu cikondo eci, Yèyè ùdi wàngata Mukàji-musèla wa bàà Bisàmbà byà bendè, mpindyewu, Yèyè ewu ùdi ùbànda, nè pàdìYe ùbànda, bapròfetà bàbìdi bàdi bàjuuka mu Izàlèlèlà. Nwamònu anyi?

<sup>286</sup> Nè misùukà yà bàakashebeyiibwà bwà diitabuuja abu ayi, mpindyewu, pànwapa bwónsò aba, beena Yudà bàà cyà bushùwà, balelèlè myaba yónsò ayi, bàvwà nè mènà àbò mu Mukànda, bàvwà biikàle nè nsòmbelu mujaalàme nè benzè cintu cijaalàme, benzè ntèndeleele wa cyena-Yudà mu katòba nè mu katòba abu. Bwòbò, bwòbò nè bakwàbò bààbùngì bàakashebeyiibwa bwà diitabuuja kùdì Eichmann. Bantu bàà kweyemena, miliyò nè miliyò kuntwaku! Nè beena Allemagne bàakabààsa bingoma kubàshebeya, nè kubàshipa nè cikisu, nè kubàshebeyabò, nè kubòowabò ku mpangu, nè kubòòshabò mu midilu kubàshidisha, nè kubòòsha kushiya ànu butù, nè bikwàbò byónsò. Hitler, nè Staline, nè Mussolini, bantu bàvwà kabàyi mashi, anyi bàà mwoyi wà mashi nè nyòòtà yà mashi abu, nè bwónsò bàvwà bakine beena Yudà abu abu!

<sup>287</sup> Ngèela meeji nè cyòci aci ke cimwè cyà ku—cimwè cyà ku bintu bìdi bilamè ditunga edi didyènzè cimùkù, mbwalu bàtu misangu yónsò ànu bàneemeka mwena Yudà, ncyà bushùwà, bamupèèshe kaaba kampànda. Panùdì nutwà mwena Yudà mushinga, nè Nzambi neànùtwè pèenù mushinga.

<sup>288</sup> Mpindyewu, kùdi musùmbà wà beena Yudà bàdi bantu bapidye diitabuuja, ànu mùdì bàà Bisàmbà byà bendè mùshindù wùmwe wùmwe awu amu.

<sup>289</sup> Kàdi mwena Yudà wa cyà bushùwà, Nzambi mmufunde dìnà dyèndè mu Mukànda kumpàlà kwà difùkà dyà dyulu nè buloba. Kàdi ki yèyè ewu, mushipa nè cikisu cyónsò mu cikondo eci. Nènku vùlukàayi, elèngànaayipù meeji mpindyewu, mùdì eci cipwàngàne. Dyàkàmwè paanyimà pàà miliyò yà beena Yudà bàakashipàbo bu nyama abu, bantu bàvwà kabàyi nè bubì bwenza, kùdi matùngà à pa buloba; s'ki Mufundù ngwòwò ewu

wàmba apa, ànu mu cikondo eci mene nè, bàdi yònsò wa kùdìbo mwinshi mwà cyoshelu, bamanyè cyàkenzekà, nè bàbàpèèsha mìzàbì mitòòke.

<sup>290</sup> Ki kwambabò nè: “Èè, bwà cinyi? Tudi mwà kwalukila ku bukalenge mpindyewu mene anyi?” Bukalenge bwà beena Yudà bùdi nè cyà kujaadikiibwa pa buloba, nudi bamanyè’s. Yone wàkamba nè bukalenge abu bùvwaku, nwamònu’s, nè bùvwa nè cyà kujaadikiibwa.

Mpindyewu, ebu m’Bukalenge bwà Èvànjeeliyò, nudi numòna’s.

<sup>291</sup> Kàdi bukalenge bwà beena Yudà bwòbù nebùyiishiibwè kùdì bapròfetà bàbìdì aba—aba, pa nàнку mònaayi bukalenge bwà—bwà—bwà pa buloba kaaba aka.

<sup>292</sup> “Bukalenge bwà mu Dyulu bùdi bùyiishiibwa,” . . .kùdì beena Yudà, anyi kùdì. . .ndi njinga kwamba nè, “bàbùyiisha bàà Bisàmbà byà bendè.”

<sup>293</sup> Bukalenge bwà pànu pa buloba, bùdi nè cyà kujaadikiibwa mu Bukalenge bwà bidimu cinunu, pashiishe, Bukalenge bwà bidimu cinunu kùdì beena Yudà.

<sup>294</sup> Mpindyewu mònaayi. Mònaayi eci nùнку mpindyewu, kaaba aka, pàcìdìbo—pàcìdìbo bàyiisha apu, nwamònu’s.

<sup>295</sup> Kumpàlà kwà bapròfetà aba—aba kujuukabò mu cyalu; beena Yudà aba bàvwà nè cyà kufwà mu cikondo cyà Eichmann nè bakwàbò abu aba bàdi, yònsò wa kùdìbo uvwa mudyànjila kulongolola awu, mmupèèshiibwe (ku ngàsà) mùzàbì mutòòke. Yònsò wa kùdìbo mmupèèshiibwe mùzàbì mutòòke. Mònaayi.

Mpindyewu ncinyi cìdì cyènzekà? Pàdi ànu aci cyènzeka . . .

<sup>296</sup> Ndi munkaci mwà kutàngila ntankù wàwa paanyimà pààpa, nè ndi mumanyè nè tukààdi—tukààdi dìbà diyè. Kàdi mèmè ncyèna muswè bwà nè. . .Nwamònu’s, ndi—ndi. . .Bwòbò. . . pàndi mmòna bantu bàdi bakwàte nè byà luse biimàne kuulu bàba. Nzambì ànùkwàcishèku, nwènù bàna bèètù. Ndi ntèkemena nè yònsò wa kunùdì neàpeeshiibwè mùzàbì mutòòke mu ditùkù adi, nwamònu’s. Biimàne kuulu, nushintulula nutwà kumpàla nutwà paanyimà, mikòlò yìnùsaama. Nè bàmwè bàà kunùdì benzè mudimu ditùkù dijimà. Ndi mumanyè cyòci aci nè ncinganyi. Nènu tàngilàayi kùneeku eku. . .Nè bàmwè bàà ku bakàjì bakesè bakùlàkàjì bakwàte nè byà luse biimàne kuulu. Ndi mmòna bàmwè bàà ku bantu balùme aba bàshìlla bantu bakàjì myaba yàbò yà kusòmba; nè muntu mukwàbò kampànda ùshìlla, mukàjì mukèsè mukwàte nè byà luse mwikàle nè mwànà wa mu dibòko. Nè mèmè—mèmè—mèmè—mèmè ndi mmòna cyòci aci, nwamònu’s, nè ndi mutwishìibwe nè Yèyè ùdi ùmòna. Mònaayi. Kàdi ncyèna muswè kunùlama ntàntà mupitèpite bule nànsha. Ngìkalakù nànsha mwà kunùfikisha ku

dimòna Mukenji, ke cyònsò cìndiku muswè bwà nwênù kwenza, nwamònu's.

297 Mpindyewu mònaayi beena Yudà aba. Bikèngela ngènzè cyôci eci, bwà kunùfikishakù ku dimòna dibuulula dyà Cìtampì eci; kumòna cidici, misùukà yidi mwinshì mwà cyoshelu eyi, nè yidi mbanganyì. Mpindyewu mònaayaaku.

298 Mu kicondo cyà Danyèlè, mpindyewu, citùpà ciibìdi cyà lumingu lwà makùmi mwandamutekètè. Mpindyewu vùlukàayi nè: “Maasiyà ùvwa nè cyà kuumushiibwa munkacìnkacì.” Mmunkacì. Èè, cyàbìbìdi cimwè cyà mwandamutekètè nyìngà? [Disangisha didi dyàmba nè: “Ìsàtù nè citùpà.”—Muf.] Ìsàtù nè citùpà. Nntàntà bule munyì uvwa Yesù muyishè? [“Bisàtù nè citùpà.”] Acì's mmwòmò. Mpindyewu: “Kùcìdi kàbìdi kukòsa, bwà cisàmbà,” (cinyì?) “bikwàbò bidimu bisàtù nè citùpà.”

299 Èè, munda mwà cyôci kicondo eci, mòna's, nwamònu's, cìdi cyènzekà, cìdi nè, Mukàjì-musèla wa bàà Bisàmbà byà bendè ùdi ùsòbodiibwa munda mwà bikondo mwandamutekètè byà èkèleeziyà, nè ùbànda.

300 Nè pàdibi byènzeka mùshindù awu apu, beena Yudà bwònsò bàvwà bashebèyiibwe bwà diitabuujà mu ntàntà yònsò awu bwà difofomijiibwa aba, bateèkiibwe mwinshì mwà cyoshelu, Nzambi ùdi ùlwa wàmba nè: “Nudi numòna ciwà bwalu abu anyì? Mpindyewu Ndi mpèèsha muntu nè muntu wa kunùdi mùzàbì.”

Bàvwa bàmba nè: “Ntoo nè ku dìbà kaayi, Mukalenge? Tudi tubwela mpindyewu anyì?”

301 Yèyè kwamba nè: “To, to, to, to. Bakwènù, beena Yudà, bikèngela bànjì kukèngakù ndambù, kàbìdi. Bikèngela bàshebeyiibwè bwà diitabuujà munùvwà nwênù bashebèyiibwe amu. Bikèngela bwà nyama wa lwonji àbàbàkùlè pìikalàye mushipè cipungidi cyèndè aci apu.”

302 Mpindyewu mònaayi's. Nènku mpindyewu mònaayi nè, pàdì ànu... Anjàayi kuvùluka mpindyewu nè, bikèngela bwà bapròfetà aba bènzè cipròfetà cyàbò bilondèshile Bwàkabuulwibwà 11. Nwènù, s'nwedi byanza byènù muulu, nè nuvwa bacibalè. Nwamònu anyì? Nè bwòbò mbapèèshiiibwe bukolè.

303 Nènku netwikalè mwà kujandula nè mbanganyì biinè abu, ànu mu katanci kakesè emu, bu Mukalenge mwà kwanyisha. Mpindyewu mònaayi nè bapròfetà aba mbanganyì. Nènku mpindyewu Bible ùdi ùcyàmba kaaba aka. Bushùwà, Yèyè ngudi ucyàmba. Bushùwà! Nwamònu anyì?

304 Mpindyewu, mònaayi nè, munkacì mwà cyôci eci, mbingu yisàtù nè citùpà mpindyewu, mmùdìbò bènza cipròfetà pànwapa nè—nè Bwàkabuulwibwà kaaba aka mmwàmbè... Nènku bàà—

bàakenza cipròfetà munda mwà matùkù cinunu nè nkàmà yisàtù nè makùmi àsambòmbò. Bu . . .

<sup>305</sup> Mpindyewu, kabala-matùkù kàà ciibidilu kàà beena Yudà, cikondo cyà ciibidilu cyà kabala-matùkù kàà Nzambi, cidi ànu matùkù makùmi àsàtù bulubulu mu ngondo umwe. Kabala-matùkù kàà beena Loomò, ke kàdi kabibwejàkàje. Kabala-matùkù kàà ciibidilu kàdi nè matùkù makùmi àsàtù mu ngondo umwe.

<sup>306</sup> Mpindyewu, wêwè muswè kwangata matùkù makùmi àsàtù, nè wêwè musàkìdilekù bidimu bisàtù nè citùpà, nè umòna ku matùkù makùmi àsàtù, nè, èè, udi upeta cinyi? Matùkù cinunu nè nkàmà yisàtù nè . . . anyi nè nkàmà yibidi nè makùmi àsambòmbò. “Matùkù cinunu nè nkàmà yibidi nè makùmi àsambòmbò (matùkù makùmi àsambòmbò),” ànu menemene bidimu bisàtù nè citùpà.

<sup>307</sup> Mpindyewu, nudi numòna’s, kakwèna ntùpàkànyì mu cyôci aci to. Ke cyôci aci, cikùmbanangana ànu mùdi di—dinwàngana dyà bipese bibidi bidibo bàtwàngaja. Mònaayi nè, bapròfetà bàbidi abu bàakayiisha munda mwà bidimu bisàtù nè citùpà, bàyiisha beena Yudà. Mu cyôci aci, ke mùdi mùbìikidiibwà, binunu lukàmà nè makùmi ànaayi nè binaayi.

<sup>308</sup> Nènku díbà adi, mònaayi nè, bapròfetà bàbidi aba bàdi menemene ànu Mòsà nè Eliyà. Nwamònu anyi? Nwamònu anyi? Mpindyewu, tàngilàayi, tàngilàayi, wàbò . . . Tàngilàayi mudimu wàbò wà bwambi. Mpindyewu tàngilàayi cidi bapròfetà aba bènza. “Bàdi nè bukolè bwà kutuuta buloba nè cipùpù, misangu yònsò yidibo baswè.” Wàkacyènta ùvwa nganyi? Mòsà. “Bàdi nè bukolè bwà kwinjila mauulu, bwà mvùla kàyi mwà kulòkakù mu ditùkù dyà mudimu wàbò wà bwambi awu to.” Wàkinjila mauulu munda mwà bidimu bisàtù nè citùpà nganyi? [Disangisha didi dyàmba nè: “Eliyà.”—Muf.] S’ki bwòbò abu. Ke bwòbò abu’s. Nwamònu’s, bidi . . .

<sup>309</sup> Nwamònu’s, muntu, pàdiye ùfwa, kèna ùshintulula cipidi cyèndè to. Kèna ùshintulula mwèndè mùtùye mwenjìbwe to, nwamònu’s. Tàngilàayi, Pàvwà—pàvwà, kumpalà kwà . . .

<sup>310</sup> Pàvwà Shawùlà mutwè cìmpingà, nè kakùyì bapròfetà mu ditùnga to, kàvwa nè mùshindù wà kuumvwa cyà dyenza—cyà dyenza to. Bwalu bùvwa bumutondèle mu dikoshi’s. Ùvwa ùya ku mvità. Wàkaya kùdi mwamulopò wa mu Enè-Dò.

<sup>311</sup> Mpindyewu, kùvwa ànu mashi à bimpàngà byà ngombe nè à mbùjì, ùvwa nè mùshindù wà kwenza cyôci aci. Nènku kusòkayè nyumà wa Samwèlè.

<sup>312</sup> Nè pàakabàndà Samwèlè, s’ki yèyè uvwa mwimàne mwaba awu awu, mu mùzàbì wèndè wà bupròfetà awu pambidi. Kí ng’ànù aci nkàayaci to, kàdi ùcìcìvwa ànu mupròfetà. Kwambayè nè: “Bwà cinyi udi mumbìikile mumpàtùle mu diikisha dyànyì,” nwamònu’s, kwàkambàye, “pèèbè mumane kulwa



mwena lukunà wa Nzambi?” Yéyè kwamba nè: “Patwàmbà kufika pa díbà edi, mààlabà dilòòlò, newikalè mwà kufwà mu mvità. Nènku pa díbà edi, mààlaba dilòòlò, newikalè pàmwè naanyi.” Nè cyòci aci menemene’s ke cyàkenzekà. Nwamònu anyi? Kabiyi ànu. . . Ùcìwà ànu mupròfetà. Nwamònu anyi?

<sup>313</sup> Nènku bantu aba bàcìdi ànu bapròfetà. Mpindyewu netwikalè mwà kubwelakù mu ndòndò ndambù mu cyòci aci, ànu mu katanci kakesè cyanààna, bu Mukalenge mwà kwanyisha. Nwamònu anyi?

<sup>314</sup> Kaa, ekèlekèle, mùshindù mwinè wùndìpu munangè Díyi adi’s wè! Kabyèna bikèmesha to ne: “Muntu kèna nè mwoyi bwà dyàmpà nkààyaadi to. Díyi dyònsò didi dipàtukà mukana mwà Nzambi!”

<sup>315</sup> Bapròfetà bàbìdi abu bàdi m’Mòsà nè Eliyà, bilondèshile byenzedi byàbò biikàle byenzùlùdiibwe cyàkàbìdi. Aci, aci ke cìtù misangu yònsò ànu mudimu wàbò wà bwambi. Mpindyewu mònaayi nè, ànu mwàkenzàbo bwòbò’s. Aci kacyakabàshintulula nànsha. Vùlukàayi nè, bantu aba kabààkafwàku to. Tàngilàayi ànu. . .

<sup>316</sup> Mpindyewu, kanùbwejakajikù to, kumpàlà kwà twètù kuumuka ku cyòci eci. Kanùbwejakaji mudimu wà bwambi wà musangu mwitànù wà Eliyà nè mudimu wèndè wà bwambi wà musangu mwinàyi to. Ntu ngenza kunwàmbila nè, Èkèleeziyà wa bàà Bisàmbà byà bendè mmwindile Eliyà. Cyà bushùwà.

<sup>317</sup> Nènku’s ki yéyè ewu kaaba aka nè beena Yudà. Vùlukàayi nè, kèna mwà kulwa misangu yinaayi nànsha; awu’s—awu’s nnombà wa mwena lukunà. Bikèngela kwikalayè ìtaanu.

<sup>318</sup> Musangu wà kumpàlà wàkalwàye, ùvwa Eliyà, yéyè mwinè. Musangu wàkalondà wàkalwàye, ùvwa Elishà. Musangu wàkalondà wàkalwàye, ùvwa (cinyi?) Yone Mubàtiji. Musangu wùdi wùlondà wùdiye ùlwa, mbwà mwanjèlò wa mwandamutekètè. Nè musangu mwitànù wùdiye ùlwa, ùdi pàmwè nè Mòsà kuntwaku, ùbàyiisha. Bushùwà. Èyowà’s, mukalenge. Kanùmubwejàkàjiku nànsha. Uh-huh.

<sup>319</sup> Ìtaanu, nwènù bamanyè nombà yènù—yènù yà Bible, ìtaanu nnombà wà ngàsà wa mudimu mukolè. Nè aci ncidiYe mwenzè. Mpindyewu, tàngilàayi, panùdi baswè kumanya mwaba wùdici. Yesù ùvwa mudimu mukolè wà ngàsà anyi? J-é-s-u-s [Yesu—Muk.], ìtaanu, l-a-b-o-r [mudimu]. Ncyà bushùwà anyi? Mudimu, bwà—bwà dinanga bwènù nwènù. Nè paùdi ufika kùdiYe, udi ulwa bishi, ku cinyi? D-i-i-t-a-b-u-u-j-a mu m-u-d-i-m-u. Ncyà bushùwà anyi? Mudimu mukolè wùdi nombà wa ngàsà, èyo, bwà beena kwitabuujà.

<sup>320</sup> Mònaayi nè, Eliyà wa kumpàla, ùvwa nyéyè. Mwibìdi ùvwa ng’Elisha. Mwisàtù ùvwa n’Yone. Mwinàyi ùvwa mmwanjèlò wa mwandamutekètè, anyi mùsànjeelà wa ndekeelu wa Èkèleeziyà, bilondèshile Maalàki 4 nè Bwàkabuulwibwà 10.7. Mpindyewu,

musangu mwitânù, mmùsànjeelà kùdì beena Yudà, binunu lukàmà nè makùmi ànaayi nè binaayi, kùdì beena Yudà, paanyimà pàà Èkèleeziyà mumanè kuya.

321 Ndi—ndi—ndi ndyùmvwà ànu mu mùshindù wà pabwàwù, nwamònu's. Nwamònu anyi? Tàngilàayi, piikalà bàmwè bèela meeji. . . Ndi muswè bwà nuumvwè eci mpindyewu, nwamònu's. Piikalà bàmwè bacikàle beela meeji nè Maalàkì 4, “kwalujulula” bantu, ncintu cìmwècìmwè ciikalàye mwà kwenza kwàka ku beena Yuda, nè bàdyàmbidila nè byònsò bìdi cintu cìmwècìmwè aci, lekèlaayi ngànji nnòlwèlè cyòci aci, bwà katanci kakesè cyanààna. Nwamònu's, ncifwànyine kwikala cifila ndambù wa cibwejàkàji. Bwalu, nudi bavùlùke's, mu Maalàkì 4, bàdi bàmba nè: “Kwaluja Diitabuuja dyà baataatù. . . anyi bàna kùdì taatù.” Nwamònu's, kubààluja kùdì taatù!

322 Mpindyewu lekèlaayi nnùleejè dishiilangana dyà mudimu wà bwambi awu. Yèyè ùlwa bwà kwaluja Diitabuuja dyà bàna kùdì baataatù, apu yèyè's mmufwànyine kuvila Kilistò. S'mmufwànyine kwalukila ku mikenji. Mmwômò anyi? Baataatù bàvwa bàtùmikila mikenji. Nwacyümvù anyi?

323 Mònaayi nè, pàdi Elishà, pàdiye ùlwa bwà kuuja mudimu wèndè wà bwambi mu Maalàkì 4, nwamònu's, bu Maalàkì 4, Eliyà ùvwa nkààyèndè.

324 Kàdi pààlwàye bwà kwenza mudimu wà bwambi kùdì beena Yuda, wà mu Bwàkabuulwibwà 11 awu, ùdi nè Mòsà pàmwe nendè. Pa nànkù, kakwènakù cibwejàkàji to, nànsha cikesè. Nwamònu anyi? Nwacyümvù anyi?

325 Pààlwà Elishà, wa Maalàkì 4 awu, ùdi nkààyèndè. Eliyà neàkumbajè mudimu awu; kaciyi Eliyà nè Mòsà to. “Eliyà” ngwàjuuka. Kàdi disonsodiibwa òmwèdòmwè adi, dyà nè, didi dyambè nè Eliyà neàlwe bwà citùpà cyà ndekeelu cyà cikondo cyà èkèleeziyà, “bwà kwalujulula Diitabuuja dyà bàna kudyàluja ku Diitabuuja dyà ku cibangidilu dyà baataatù,” Diitabuuja dyà bàpostòlò, kùdibi nè ke kunùdi nè cyà kwalukila aku. Kàdi mufwilakanyi nè Kilistò mmubàlamùnùnekù bwònsò. “Kwalujulula,” mùdi Mifundu mikwàbò yònsò misambàkànàngàne pàmwe amu. Nwamònu's, yèyè ùdi ùlwa nkààyèndè. Nwamònu anyi?

326 Kàdi pààlwàye kùdì Èkèleeziyà, Bible. . . anyi pààlwàye kùdì binunu lukàmà nè makùmi ànaayi nè binaayi, Bible ùdi wàmba patòoke nè bwònsò bàbìdi yèyè. . . Bàdikù bàbìdi bajimà, kí ng'umwèpelè nànsha. Bàbìdi bajimà! Nè mudimu wèndè wà kumpàlà wà bwambi kawùvwakù mwà kwikala wà kwangata beena Yuda kubààluja ku mikenji nànsha, ùdi ùlwa. . . bwalu ùdi ùlwa, ùyiisha Kilistò kùdì binunu lukàmà nè makùmi ànaayi nè binaayi abu, amen: “S'ki Yèyè wàwa, Maasiyà wàkuumushiibwa awu.” Amen! Kì cyòci aci, pa nànkù kanùcibwejàkàjiku to. Kì

ncyà dibwejakaja nànsha. Mifundu kayitu yishima to, nànsha kakesè.

<sup>327</sup> Butùmbi's wè! Kaa, pângàmònu cyôci aci, mvwa ntùpika muulu! Mémè kwamba nè: "Twasàkidila, Mukalenge," pâmvwà munkaci mwà kucibandila cyènzeka mwaba awu apu. Mémè kumòna Eliyà awu ùpàtuka mwaba awu bwà cikondo cyà kumpàlà aci, ànu nkàâyendè, nè ùvwa ànu yêyè nkàâyendè. Pashiishe pângààmumònu ùlwa cyàkàbìdì, kule menemene ùya ku mwaba kampànda mukwàbò, bàvwakù bàbìdì mwaba awu pààkenzekàci. Mémè kwamba nè: "S'ki cyôci aci. Aci, kwàjiki, Mukalenge. Amen! Ngàcimònu mpindyewu! Alèluuyah!" Ncyôci menemene.

<sup>328</sup> Bu nè ncivwa mucyàmbè to, civwa cifwànyine kwikala cibwejàkàjì ndambù kùdì muntu kampànda. Kàdi Yéyè—Yéyè kungambila bwà kucyàmba, ki mémè kucyàmba.

<sup>329</sup> Mònaayi nè, bantu aba mbalamiibwe nè mwoyi kùdì Nzambi, kacya ànu ku mudimu wàbò wà bwambi wà ku cibangidilu awu, bwà mudimu wà matùkù àcilwalwà; bàakawènzà bilenga be. Nwamònu anyi? Anjì elàayi ànu meeji, nyumà wà Eliyà awu wènzà mudimu wà bwambi awu misangu yitaanu; Mòsà, yìbìdì. Ncinyi aci? Kubàlama nè mwoyi bwà mudimu wùcìdì kule, kumpàla.

<sup>330</sup> Nànsha umwe wa kùdìbò kàvwa mufwè to mpindyewu; kanwitabuujikù aci nànsha. Bàakabàmòna bwònsò bàbìdì, nè mwoyi, biikàlè bàyiikilangana nè Yesù pa Mukùnà wà Dikùdimuka dyà mpàla. Kàdi, vùlukàayi nè, bàdi nè cyà kufwà.

<sup>331</sup> Mpindyewu, mpindyewu, mu bushùwà bwà bwalu Mòsà wàkafwà. Kàdi wàkabiika ku lufù, bwalu yêyè ùvwa cifwànyikijilu cipwàngàne cyà Kilistò. Nwamònu anyi? Kacya muntu kàakamanyakù mwaba wàkajiikiibwàye to. Banjèlò bàakalwa kumwangata. Nwamònu anyi? Wàkapeta Banjèlò bu bamwambudi bàà mu mushèètè wà bafwè. Uh-huh. Bwà cinyi? Muntu wa cifwàkà nànsha umwe kàvwakù mwà kumwambula kuya nendè kùvwàye ùya aku nànsha. Yéyè wàkākumbaja ànu cyenzedi kampànda, kwàjiki. Wàkapeta Banjèlò, bamwambudi bàà mu mushèètè wà bafwè, nwamònu's, bwalu Bwòbò ke bàakayà nendè ku mwaba wùvwàye nè cyà kwikala. Muntu nànsha umwe kí mmumanyè to.

<sup>332</sup> Too nè Sàtaanà mene, kàvwakù nànsha mumanyè to. Wàkakòkangana nè Mwarkanjèlò. Ncyà bushùwà. Kàvwakù mwà kuumvwa nè civwà cyenzèkèlè Mòsà ncinyi to. "Ngààmumònu ùzakalalangana mwaba wàwa. Nè ùvwa ùkènzakana eku nè eku pa buloba apu, nè ùtàngila paanyimà kùdì bânà, nè bikwàbò, mémè kumumòna ùzakalalangana. Kàdi mmubànde ànu pa Lubwebwe, ki ùvwà musangu wà ndekeelu wùngààmumònu's."

333 Ke lwòlò Lubwebwe alu's! Ke lwòlò Lubwebwe alu's! Ngiiimanèku pa lwòlò Lubwebwe alu's, ku ndekeelu kwà njila wanyì! Èyowà's, mukalenge! Mpindyewu, kùdì. . . Kale wàwa bânà bèètù bàà bafiike bàvwa bàlwa kaaba aka bimba kasambu aka nè: "Bu nè mvwakù nè mùshindù, mvwa mwà kwimana pa Lubwebwe pààkiimanà Mòsà apu." Èyowà's, mukalenge! Kaa, s'ke Lubwebwe ndwòlò alu, lùndì muswè pàànyì kwimanapù. Ku diitabuuja ndi mwimanepù.

334 Kàdi vùlukàayi nè, Eliyà, yèyè ùvwa ànu mucyòke cyanààna, bwalu ùvwa nè mudimu búngì cyanààna kumpàlà kwèndè. [Mwanèètù Branham ùdi ùshàala mupùwe. Disangisha didi ditudika nè tuseku—Muf.] Pa nànkù ùvwa mucyòke bikolè, ke Nzambi kumutùminayè cyà kumwambula bwà kumwaluja Kumbèlu, ncyà bushùwà, kutùma dikalù dyà mvità. Ncyà bushùwà anyì? Kumwambulabò. Kààkafwàku to, bwalu Yèyè wàkamulama nè mwoyi. Ùvwa nendè nè mudimu mu matùkù àcìlwalwà. Kumulekela bwà yèyè kwela muntu maanyì, yèyè pèndè, nwamònu's, bwà kupàtukilayè ku Nyumà wendè awu.

335 Kàdi bàdi nè cyà kulabula lufù. Mpindyewu Bwàkabuulwibwà, nshapità wa 11. Mpindyewu, tuyaayaaku, ndi ànu kaaba aka mene, nànsha byà munyì. Twànjàayi ànu kucilenga, Bwàkabuulwibwà 11. Tàngilàayi nùmonè ní bwònsò bàbidi kî mbashebèyìbwe. Èyowà's, mukalenge. Bikèngela bwà bwònsò bàbidi bàlabulè lufù. Èyowà's, mukalenge. Paanyimà pàà mudimu wàbò wà bwambi mumanè kujika, bàdi bàlabula lufù. Bwàkabuulwibwà 11, nènku túbangilàayi ku 7.

*Nè bwòbò. . . pààkajikijàbo bujaadiki bwàbò, nyama wa luonji wàkabànda mupàtùke mu ciinà cidi kaciyi nè ndekeelu awu aci. . . ùdi ùbènza mvità, . . .*

336 Kaa, ekèlekèle, kèna mwà kucitwàlakù to; bansantu babunguluki bàà mu malaba abu mbaalùkile cyàkàbidi, nwamònu's. Èyo. Èyo.

*. . . mupàtùke mu ciinà cidi kaciyi nè ndekeelu awu aci. . . ùdi ùbènza mvità, nè neàbàtambè bukolè, nè neàbàshebèyè.*

337 Kàdi tàngilàayi cidi cyènzekà. Mbileejìbwe mu bifwànyikijilu mu mùshindù mupwàngàne mpindyewu.

*Nè mibidi yàbò mifwè neyùkalè milàadika mu mùsèèsù—mu mùsèèsù wà cimenga cinène aci. . . mu nyumà. . . cibùkidiibwa nè n'Sodomà nè Èjipitù, mùvwà kabidi Mukalenge wetù mupoopèdibwe pa nkùlusè amu, (Yelusàlèmà, nwamònu's).*

338 Mpindyewu bikèngela bwà kulabulabò lufù, (kî mmwòmò anyì?), ncyà bushùwà, paanyimà pàà mudimu wàbò wà bwambi mumanè kujika.

339 Bwà cinyi? Mudimu wà bwambi wà mwanjèlò wa mwandamutekètè, mudimu wà bwambi wà mwanjèlò wa mwandamutekètè, mudimu wà bwambi wà Eliyà kùdì mwanjèlò wa mwandamutekètè, kawùyi. . . Bwà cinyi kàwùyi, bwà cinyi kàwùvwakù, èyowà's wè, mùndì nteeta kwamba, mudimu wà bwambi wà mwanjèlò wa mwandamutekètè dîbà adi bwà cinyi kàwùvwakù mwà kwenjiibwa kùdì Mòsà, pìikalàbi nè yéyè ngwa kàyì ùfwa, mùdìbi bifwànyine kwikala byà mwomùmwè nè byà Eliyà amu? Bwà cinyi kabàyikù. . . Bwà cinyi Nzambi kàvwaku ànu mutùme, mwambè nè: “Eliyà, wèwè—wèwè ukàadi mumanè kwenza mudimu mukolè, Ndi. . . nè bikwàbò byònsò, myaba yònsò mishìlèshìlàngàne eyi. Ndi—Ndi ngèèla meeji nè Nèntumè ànu Mòsà panshì apu”? Bwà cinyi?

340 Tàngilàayi mudimu wà bwambi wà Mòsà. Eliyà ùvwa mupròfetà bwà matùnga wònsò; kàdì Mòsà yéyè ùvwa mufidi wa mikenji ànu kùdì beena Yudà nkààyaabò. Amen. Mòsà ùdikù mbwà kwamba. . . Cidì cyenzè nè ikalè mulwè pàmwè nè Eliyà. . . Beena Yudà abu bàmba nè: “Indilà, twètù's tucidi ànu tutùmikila mikenji kaaba aka.” Kàdì's ke Mòsà ewu yéyè mwinè mwimàne; nènku ke Eliyà ewu mwimàne pàmwè nendè. Kaa! Nwamònu anyi? Ùdì ùlwa ànu kùdì beena Yudà nkààyaabò. Nwamònu anyi? Mòsà yéyè wàkalwa kùdì beena Yuda; mupròfetà Eliyà ùvwa bwà matùnga wònsò. Kàdì Mòsà yéyè wàkalwa mupròfetà bwà beena Yudà, nè mufidi wa mikenji. Nwamònu anyi? Ke civwà wèndè mukenji ncyòci aci, mikenji ayi.

341 Kàdì mukenji wà Eliyà wùvwa cinyi? Kùdì bakàjì bàà nsukì mibebula abu; màngumba. Èyowà's, mukalenge. Nè yéyè mwinè's wàkabàsùnsulwila panshì. Bàà kwísù kulaaba bilaabu abu; kubàmbilayè nè: “Nebìikalè mwà kunwèlela mbwà bwà kunùdyayi.” Bwà kwamba kwìmpè yéyè ùvwa ànu ùbàbùndula byà kàyì ùdyakù cibàngà to.

342 Nè pashìshe pàakalwà Nyumà wèndè pambidi pàà Yone, wàkapátuka mu cipèèlà wènda ùtwa mikùmà nè wàkenza cintu ànu cyòci cimwècimwè aci. Cyà bushùwà's. Wàkamba nè: “Kanùdyàm̀bididì nè tudi beena *cikampàndà* anyi *cikansanga* nànsha. Nzambi ùdì nè bukolè bwà ku mabwe aa kujuudilakù Abraham bàna.”

343 Kuyayè tàmakàtàmakà too nè kùdì Helòdyàsà, kwambayè nè: “Nè wèwè udi muswè kungambila mùdì musèdìibwe kùdì bukwèndè bwèbè. . .” Yéyè nè: “Kì mbikùmbànàngàne nè mikenji bwà wèwè kacýenza nànsha!” Kaa, mwanèètù! Yoyòyò! Hum! S'wàkamwambila. Bushùwà's.

344 Mònaayi nè, bikèngela bwà misùukà eyi yìndilè cikondo cikesè, bwà binunu lukàmà nè makùmi ànaayi nè bìnaayi. . . bishipiibwè bwà diitabuuja. Kaa, aci kacýenakù, kacýenaku. . . ? Aci's cidì ànu citwàngaja Bible pàmwè.

345 Mpindyewu díbà dyànyì dyàjìkì ànu menemene, bu mèmè mwà kunùpátula kumpàlà kwà díbà. Kàdi nciçidìkù ànu nè ndambù mukwàbò wa tuntu tukesè twà kwamba, bu nwènú mwà kucitwàlakù. [Disangisha didi dyàmba nè: “Tùngunukà!”—Muf.] Ndi mumanyè nè kùdi luuyà lukolè. Nè mèmè ndi munkaci mwà kukòpakana.

346 Kàdi, tèèlejàayi, nyewù mfùma ku dipeta cintu kampàndà cyà kunwàmbila. Ncìmpè be, cidi ànu cilàkuka kapyà munda mwà mwoyi wànyì emu. Ndi ntèkemena nè nwènú kanwèna bacìpwe mwoyi to, nwamònu’s. Ngǎnji ngǎmbè eci nùнку, mu bwikadi Bwèndè. Ku ngàsà Wèndè, Yéyè útukù mundeeyè beena díkù dyànyì, àbidì àdi panshi aa, bavwàle mizàbi mitòoke. Nudi bacìvùlùke anyì? Nudi bavùlùke anyì? Nudi bavùlùke bwalu abu, àbidì àdi panshi aa anyì? Mukàji-musèla wa bàà Bisàmbà byà bendè, bàkaadìkù patùdi twakulangana apa. Bwònsò bàvwa bavwàle mizàbi mitòoke.

347 Mvwa mutàbùlùke. Mvwa mwenzè disangisha. Kùkaadi bu cidimu cijimà nàнку awu, anyì bipite kakesè apu. Mèmè kutàbuluka dindà kampànda, nè kujuuka. Nè mèmè kwamba nè: “Munanga wanyì?” ngàmbila mukàjàanyi. Kàyì ùnyungakù to. Bàna kwenza bu bàdi. . . Bìvwa bikèngela bwà mèmè kujuuka kuya naabò mu kàlaasà, kuntweku mu mwaba wà kale ewu. Èè, mèmè—mèmè kujuuka mu bulààlù amu, nudi bamanyè’s, nè kushààla mweyèmène. S’nutu bamanyè mùtùbi amu; kwikala ànu musòmbe kàdi kweyemeja mutù ku dibaya dyà bulààlù. Tudi nè bùmwe bwà ku malààlù à cyena-kale awu. Nè pa nàнку ki mèmè kwikala mweyèmène paanyimà mùshindù *ewu*.

348 Ki mèmè kudyàmbidila nè: “Mulùmýànà, wèwè’s ukàadi nè bidimu makùmi àtaanu nè bisàtù. Pawikalà muswè kwenzela Nzambì cintu kanà cyònsò, s’mbipìcìbwe nè wèwè mucyènzè, bwalu newikalè mutàmbe—mutàmbe kukola, paanyimà pàà cikondo kampànda.” Nwamònu’s.

349 Ki mèmè kudyàmbidila nè: “Udi mumanyè’s, ncyà bushùwà, mpindyewu.” Mèmè kudyàmbidila nè: “Mulùmýànà, udi mumanyè’s, ncyèna kule menemene to. Nebikengelè bwà nye àbidì àdi panshi aa.” Mèmè kwamba nè: “Abi’s—abi’s mbitàmbe bìvwa naabi tààtù wanyì nè cidimu cimwè.” Nwamònu anyì? Mèmè kudyàmbidila nè: “Nebikengelè bwà ngùumukè nye àbidì àdi panshi aa. Nkàadi mucimòne. Nèнку, kaaba aka, ncyèna mwanji kwenza cintu nànsha cimwè to, bwà Nzambì, too nè mpindyewu.” Mèmè kudyàmbidila nè: “Mèmè misangu yònsò’s mvwa ànu muswè kwenza cintu kampàndà bwèndè Yéyè.” Mèmè kudyàmbidila nè: “Bikèngela ndwijakajè bwà kucyènzà, byòbì nè ndi muswè bwà kucyènzà. Nè ncyèna mumanyè mwà kucyènzà to, ki cyònsò cìdìku aci’s.”

350 Mèmè kudyàmbidila nè: “Mulùmýànà, mèmè’s ndi ntèkemena bwà kwikala ne mwoyi bwà kuMumòna ùlwa.

Ncyèna muswè kwikala mukishi, anyi nyumà to.”

<sup>351</sup> Nwamònu’s, mvwa ànu misangu yònsò nè bwòwà bwà mukishi. Nènkù mpindyewu, nudi bamanyè’s, mùshindù awu wà. . . Mvwa ànu misangu yònsò ndyàmbidila, byenzè mündi mufwànyine kutwilangana nè Mwanèètù Neville nè yèyè mufwànyine kwikala kaaditutu kakesè katòòke kènda kèndakana, nudi bamanyè’s. Nè mèmè mufwànyine kwamba nè: “Wetwàwu, Mwanèètù Neville.” Nè yèyè mufwànyine kwamba nè: “Wetwàwu, Mwanèètù Branham,” ku cyumvwilu cikwàbò kampànda; kàvwa mufwànyine kwakula to. Kàdi ndi ànu mufwànyine kumanya nè m’Mwanèètù Neville. Èyowà. Ndi mufwànyine kuswa bwà kumulabula ku cyanza muntu mmulabula misangu yònsò amu. Bwalu, ke cyònsò cindi mumanyè, mbantu. Nwamònu’s, ndi mufwànyine kuswa bwà kumulabula ku cyanza, kàdi yèyè kàyi nè cyanza to. Cidi mu lukità mwàmwa, cimanè kubola. Nwamònu anyi?

<sup>352</sup> Mèmè kudyàmbidila nè: “Ekèlekèle, ndi ntèkemena nè kabyàkukèngela bwà mèmè kupicila ku cyòci aku nànsha.” Mpindyewu, mvwa. . . Mpindyewu nèngiikalè mwà kunwàmbila bulelèlè. Mvwa—mvwa nè bwòwà bwà kufwà; nciyi nè bwòwà bwà nè ndi mufwànyine kujimina to, kàdi ncivwa muswè kwikala mukishi to. Ndi mèmè muswè kushààla ànu muntu. Mvwa muswè kwikala mwindile Dyambwibwa, nwamònu’s. Mvwa mèmè muswè ànu kushààla mùshindù awu. Nciwva muswèku kwikala mukishi nànsha umwe to, ngenda ndalakana. Mvwa mulàadile panshi mwaba awu, munkaci mwà kwela meeji ku cyòci aci.

<sup>353</sup> Nènkù, dyàkàmwè, cintu kampànda kwenzekaci. [Mwanèètù Branham ùdi ùtuuta cishòntò—Muf.]

<sup>354</sup> Mpindyewu, nudi bamanyè’s, nè nwènù bwònsò, nudi bamanyè bwalu bwà bikèènà-kumòna abi. Piikalàbi nè eci cìwva ncikèènà-kumòna, kacya ncitukù mwanji kupeta cyà mùshindù wàwa to, nwamònu’s. Nè nkàadi mubipetèpète kacya ànu pàncivwà mwànà mukesè menemene.

<sup>355</sup> Nènkù, dyàkàmwè, cintu kampànda kwenzekaci. Ki mèmè kudyumvwa ngenda nguumuka. Mèmè kudyàmbidila nè: “Uh kaa.” Ki mèmè—mèmè kudyàmbidila nè: “Nkàadi—nkàadi mumanè kufwà, wamònu’s, nè nkàadi—nkàadi muyè.” Nwamònu anyi?

<sup>356</sup> Ki mèmè kufika mwaba kampànda, ki mèmè kudyàmbidila nè: “Ngèela meeji nè nèntangileku paanyimà.” Cìwva ànu cyà bushùwà, nwènù balundà bàanyi, ànu mündi mwimàne kaaba aka mene emu. Nwamònu anyi? Ki mèmè kukùdimuka, bwà kutàngila paanyimà. Kàdi ki mèmè uvwa mwaba awu awu, mudyàdije pa bulàalù apu. Nè mvwa mudyòlòle, mulàadile ku luseke lwà mukàjàanyi.

357 Mémè kudyàmbidila nè: “Èè, pàmwăpa cívwa ndisaamà dyà mwoyi mwimàne.” Nwamònu anyi? Mémè kudyàmbidila nè: “Èè, wamònu’s, ndi mfùma ku difwà cikàdi,” cívwàku cifwànyine kwikala mùshindù mulenga wà kuya’s. Pa nàunku, mémè kudyàmbidila nè: “Cintu’s ndisaamà dyà mwoyi mwimàne. Kabívwa bikèngèle bwà nsaamè to.” Mémè kutàngila, nè mémè kudyàmbidila nè: “Èè, mpindyewu, aci’s ncyà pabwàci. S’mmémè udi mudyădije wàwa, mwaba wàwa; nènku s’ki mémè udi mwimàne ewu, apa nùnku.”

358 Pa nàunku, mémè kukùdimuka. Cívwa cyenzè bu budimi bunène—bu budimi bunène, bu, anyi cintu kampànda, ciikàle ànu budimi bwalàbàle bwà mashinda mabishi. Ki—ki mémè kwamba nè: “Èè, ndi ndikonka nè ncinyi ciinè eci’s?”

359 Ki, dyàkàmwè, pàmvwà mutàngile apu, ke kulwakù binunu kuvudija ku binunu byà nsongààkàji, bwònsò bavwàle mìzàbì mitòòke, nsuki mìbàpwekè too nè mu cifùka, ku makàsà kutupù, nè bàvwa bàlwa lubilu batàngile kùndi. Mémè kudyàmbidila nè: “Mpindyewu ke cinyi eci’s?”

360 Mémè kukùdimuka, kutàngila paanyimà pààpa, nènku ke mémè uvwapù wàwa; nè mbànduluka mùshindù ewu, ki bwòbò bàlwalwà bàba. Mémè kudisùma mēnu ku munu. “Ncyēna—ncyēna—ncyēna—mulààle tulù to, cyà bushùwà.” Kàdi, mvwa mwà kuumvwa mémè mulengè cintu. Mémè kwamba nè: “Èè, nènku, cintu kampànda, kaaba aka, cyà pabwàci.”

361 Nènku bakàji bwònsò aba bàvwa bènda bàlwa, lubilu. Nè mémè kacya ncitukù mwanji kumòna bakàji balenga nàka to! Nènku bàvwa bwònsò bènda bàlwa, lubilu batàngile kùndi. Nènku pàvwàbo bàlwa lubilu kùndi apu . . .

362 Nwēnù’s nudi ànu bamanyè muntù amu, mu mùshindù kampànda . . . Bātu bangiinyike nè ndi mukinyi wa bānà bakàji, kàdi kí ncīndi to, nwamònu’s. Kàdi, ntu mémè—mémè ànu ngèela meeji nè, mukàji mwimpè ng’umwe wa . . . ncilengà. Kàdi, ewu udi kàyikù mwimpè awu, ùdi, mùdi Solòmò wamba nè, “mmâyì mu mashi èbè.” Pa nàunku ncyà bushùwà nè ncyēnàku nè cyà dyanza nè—nè mukàji wa lumù lubi anyi baacimanya-byònsò abu nànsha.

363 Nè pa nàunku bakàji bwònsò aba kulwabò. Kubangabò kungeela mabòko kunshingù. Mpindyewu, aci’s ncyà pabwàci. S’nudi bamanyè nè mémè ncitu mufwànyine kutwàla aci to. Pa nàunku, nènku bàvwa . . . Mpindyewu, nebikengelè bwà mémè kwamba bwalu ebu mu mùshindù kampànda, wà nè, ndi—ndi nsanganyibwa mu musumbà wà bantu musambàkàne. Kàdi, bwòbò bàvwa, bàvwa bantu bakàji. Bàvwa mbantu bakàji. Nè bàvwa—bàvwa banguupukila, yònsò wa kùdìbo, bamba nè: “Mwa—mwanèètù wa mushinga mukolè!” Nènku umwe ùvwa ùnguupukila, nè pashiishe mukwabò ùvwa ùnguupukila.



364 Mémè mvwa mwimàne mwaba awu, ntàngila. Mvwa ndyàmbedila nè: “Èè, mpindyewu, eci ke cinyi’s?” Nwamònu anyi? Nè bwòbò bàvwa biimàne mwaba awu. Mémè kudyàmbedila nè: “Mbwalu kaayi bùdi bwenzèke ebu?” Mémè kutàngija mèsù paanyimà panshì apu. Ki mémè awu, mudyàdije mwaba mene wàwa; nènku ki mémè awu, mwimàne apa. Mémè kudyàmbedila nè: “Mpindyewu, aci’s ncyà pabwàci’s. Ncyèna—ncyèna ncyùmvwà to.”

365 Nè bakàji abu bèèla lubilà nè: “Kaa, mwanèètù wa musinga mukolè,” biikàle banguupukila. Mpindyewu, mu kantu nè kantu kwònsò, mu kumvwà patùdi tulengangana, bàvwa ànu bakàji bèètù aba.

366 Mpindyewu mfwilaayikù luse, nwènu bàna bèètù bàà bakàji, pàndi ngàmba cyòci eci apa, bwalu...Kàdi’s uyaakutèèleja ngàngàbukà webè; nè twètù katùyì nè meeji makezùke to, dîbà adi katwèna beena Kilistò nànsha. Nànsha byòbi nè . . .

367 Mémè ntu misangu yònsò ànu ne nsòmbelu mukezùke. Nzambì mmumanyè aci. Pàncìvwà mwànà mukesè, Mwanjèlò wa Mukalenge wàkangambila bwà ncikooyishi mubidi wànyì nànsha, ncìnu mfwankà, anyi maalà to. Nè aci citu mbulelèlè. Ku ngàsà wa Nzambì, ntu mutùmikile cyòci aci. Pàmvwà ngènzàmpèkààtù, ncìvwakù ngenda nè bakàji nànsha. Nè pa nànkù . . .

368 Kàdi mulùme kanà yònsò udikù ùlekela muntu mukàji ùmuupukila mu mabòkò èndè, yèyè mwikàle mwenza nè tubùlù twà mashi twà bulùme, nè yèyè mukàji, twà bukàji, kùdi masansakata. Nànsha wèwè mwikàle nganyì, mpindyewu, kùngambidìkù nè kwèna umvwà nànsha, wèwè mwikàle muntu wetù wa mujimà ewu.

369 Kàdi, kî m’Mwàmwà nànsha; bwalu kùcyèna kàbìdi, nè wòwò awu to, tubùlù twà mashi tushilàngàne atu. Kwàdyàkwenzakù mpèkaatù Mwàmwà to. Mùvwà dishintuluka. Kamùvwà cingà cintu to ànu dinanga dyà bwànà bwètù kùdi bakàji abu.

370 Nànsha mùvwàbi nè, bàvwa mu mmwènekèlu wa ngàsà uvwàbò awu, mémè ndi ngèèla meeji nè, mu—mukàji, mukàji mwimpè maalu udi udilama mu mùshindù mujaalàme, nè wènda mùdi inàbànza ewu, ùdi—ùdi cileejilu cyà cilengà pa buloba apa. Mémè ntu—ntu muswè cintu kanà cyònsò cyà ngiikàdilù wa bukàlàngà eci. Ntu ngèèla meeji nè, mu—mukàji udi ulama kaaba kèndè, nè ùditàcishakù bwà kwikala inàbànza awu, ùdi—ùdi cipidì kampàndà cyà buneemè. Ntu cyà bushùwà ngiitabuuja nànkù. Nè ntu ngèèla meeji nè, ewu udi kàyì nànkù awu awu, bìdi ànu mùdi Kilistò nè—nè mufwilakanyi nè Kilistò, cintu ànu cimwècimwè aci.

371 Mémè ntu muswè cintu kanà cyònsò cidi nè mmwènekèlu wa cifùkìlu. Bu mùdi kàbalù kalenga kumòna, anyì ní ncinyì

cyònsò, kiikàle nè cipidi cyà kàbalù ànu kalenga kèètù kàà cyà bushùwà aka. Anyì, cintu kanà cyònsò cyà mùshindù awu, mukùnà mulenga, bakàjì balenga, balùme balenga, cintu kanà cyònsò cidi mu mùshindù wùtù Nzambì mucyènzè aci, ntu mèmè misangu yònsò ànu ncyànyisha.

<sup>372</sup> Kàdi aba bwòbò bàvwa bapwàngàne. Kàdi nànsha mùvwàbo mwà kunguupukila mu mabòkò àbò amu, nè mùvwàbo bakàjì amu, nudi bumvwè's, kàdi kakùvwakù mpèkaatù nànsha mukese to. Tujilujilu twà bulùme nè tujilujilu twà bukàjì, twà bwònsò, katùcìvwakù to. Twasàkidila kùdì Mukalenge! Bwòbò bàvwa bàna bèètù bàà bakàjì, mu byònsò.

<sup>373</sup> Mèmè kutàngila. Ki mèmè kubanga. . . Mèmè—mèmè kuditàngila ku byanza; mèmè kumòna nè bivwa byònsò ànu byà nsongà. Ki mèmè kutàngila; mvwa nsongà, pàànyì. Ki mèmè. . .

<sup>374</sup> Ngàkajìmija nsukì yàànyì, pàncìvwà nsongàalùmè; mwelèmu acide wa kushipa nendè twishì, mukòshi wa nsukì ngwàkacyènza, nè kuyitùùla yònsò pàncìvwà ànu mwànà. Nènku citu misangu yònsò ànu ci—cintu cyà mùshindù kampàndà kùndì, mu mùshindù wà nè ndi—ndi—ndi mpeta cimpumpu nè lùkàsà lwònsò, bwalu cisèbà cyànyì cyà nsukì cìcidi ànu citekètàngàne, nudi bamanyè's. Kàdi miji yà nsukì yìcidi ànukù, kàdi bivwa byosha kùdì acide awu, nè nsukì kayèènakù mwà kutòloka to, nwamònu's.

<sup>375</sup> Nè ngàkaya, mukàjàànyì, pàmvwà. . . kùkaadi bidimu byàbùngì, wàkampetela kafulu kàà nsukì kàà kwikala kuvwàla, kapese kakesè kàà nsukì, kwasa, kubwikila ku mutù. Kàdi mvwa misangu yònsò ànu ngumvwa bundù bwà kukàvwàla, bwalu kàvwa nè mwènekèlu wa cintu kampàndà cyà mafi. Pàànyì ncìyì muswèku cintu kampàndà cyà mafi to.

<sup>376</sup> Ki pa nàнку mèmè kudyàmbidila nè: “Nèngàsè ànu kafulu kàà cijèngù.” Dìbà adi, mèmè kwenza nàнку, munda mwà cikondo kampànda. Nudi bamanyè cyàkenzàbo anyì? Bàvwa baswè kumbiikila ne “mwèpiskòpò” dìbà adi, kwambabò nè mvwa muswè kwikala. . . Nwamònu anyì? Mèmè kwamba ànu pàtupù nè: “Ndi nkàlekela.”

<sup>377</sup> Pa nàнку ndi ànu ntwàla cimpumpu cyànyì cyà cibi aci, nè ndekela bwà kwikalaci. . . Kàdi, mèmè ndi. . . wèwè ànu. . . ànu kubàndishakù kwà màdidiishi awu, anyì ní ncinyì cyònsò, bwà kupicishilakù ndambù wa kapeepà mùshindu ewu, balùmyànà, ngàpeci cimpumpu.

<sup>378</sup> Mpindyewu mèmè kuya kwà ngàngàbukà bwà kumukonka, cìvwàye pèndè wèla meeji. Kwambayè nè: “Èè, wamònu's, twèbè—twèbè tusòsò twà dikòba ntunzùlùke, wèwè's udi ukòpakeena ku kuyiisha, pàdì kapeepà aku kàlwa, kàdi—kàdi kèèla kìshì kàà cimpumpu mu tuminu, nè aka pààkù kàpwèka too nè pa muminu, pàdìbu bùcya mu dindà ke dīyì pààdi dikupàta, s'ki bwalu abu.”

379 Nè—nè pa nàнку, kaa, ekèlekèle, nwènú balùmýàná bàdi nè nsukì abu, kanwèna bamanyè nè mmùshindù kaayi wùvwàbi bìkèngela bwà nwènú kwikala nè kusàkidila kùdi Nzambì to, bwà diikala naayi. Ncyà bushùwà's. Nwamònu anyi?

380 Èè, mpindyewu, ndi musangàne díbà adi, nè, nè—nèngiikalè mwà. . . Dìmwè dyà matùkù aa, mèmè nciçiyi nè mènù àànyì aa to, nebikèngelè bwà kupeta à cyanààná, nè, pa nàнку, anyì kushààla nciyi naawù to.

381 Pa nàнку muntu yèyè—muntu yèyè. . . Èè, ncyèna mufwànyine kwela meeji nè mbifwànyine kwikala bwalu bubì bu muntu mulùme kampàndà, bu yèyè mwà kuswà, bwà kuvwàla kafulu kàà nsuki, anyì muntu mukàji bwà kuvwàla kàmwè kàà tufulu twà nsuki mile anyì twà tukesè, cyònsò cìdìbo bàpàyika mu nsuki yàbò aci mùshindù awu, bwà kuyìvwija mitùntàmàne. Nwamònu anyi? Kàdi—kàdi, mu bushùwà bwà bwalu, wèwè ucyèenza, mbilondèshìle ànu ku cyùdi ucyènzela. Nwamònu anyi? Mbilondèshìle ànu ku cyùdi ucyènzela. Nè pa nàнку. . .

382 Kàdi, nànsha nàнку, mwimàne mwaba awu, mèmè kulenga ku mutù aku, mvwa cyàkàbìdì nè nsukì yànyì ayi. Ekèlekèle! Mvwa nsongà. Nè aba nùнку, bwònsò aba, bàvwa bansongà! Kì mèmè kudyàmbidila nè: “Èè, eci kí ncyà pabwàcì anyi! S'mbwòbò aba.” Nè bwònsò bàvwa bàlwa lubilu. . .

383 Kì mèmè kutàngila, ku bàvwa bàlwa abu, kì mèmè—mèmè kumòna Hope ùlwa. Ùvwa ùmwèka. . . Nudi bamanyè's, ùvwa mufwè nè bidimu makùmi àbìdì nè bibìdì. Ùcìvwà mulenga ànu mwèndè nè kale. Bààbùngì bàà kunùdì's mbamuvùlùke; mèsù manène mafiike awu's. Ùvwa mwena Allemagne. Nsukì yèndè mifiike ayi yìvwa mimupwekéle paanyimà. Mèmè kudyàmbidila nè: “Mpindyewu, pààfikàye kaaba aka, neàmbè—neàmbè nè: 'Bill.' Ndi mumanyè nè ke mwàmbàye. Ndi mumanyè nè yèyè neàmbè nè: 'Bill,' pààfikàye kaaba aka.”

384 Mvwa munkaci mwà kubàndila. Nèнку yònsò wa ku bakàji aba ùvwa ùlwa ùnguupukila, wàmba nè: “Kaa, mwanèètù wa mushinga mukolè, tudì nè disànkà dyàbùngì dyà kukumòna!” Kì mèmè kudyàmbidila. . . Yònsò wa kùdìbo ùvwa muvwàle ànu mùshindù wà mwomùmwè, kàdi bàvwa nè nsukì yàbò mishìilàngàne, nudi bamanyè's, nsukì mikùnze, nè nsukì mifiike, nè nsukì mitòòkòlòke. Nèнку—nèнку bàvwa bàlwa mwaba awu, kàdi bwònsò bàvwa bansongà.

385 Kàdi mmwenzè ànu ùfika pàmvwà apu, mèmè kudyàmbidila nè: “Nèngiikalè ànu mwà kumòna cidiye yèyè wàmba.”

386 È kwambulayè mèsù kuntàngila, ke kwambayè nè: “Kaa, mwanèètù wa mushinga mukolè!” Kunguupukilayè, nè kumbà kuyayè ànu cyanààná nàнку. Mukàji mukwàbò kampànda kulwayè, kunguupukilayè, uvwa mulondèle.

387 Ki mèmè kuumvwa mutooyi kampàndà. Nè mèmè kutàngila lwà *eku* nùnkù, ke musumbà wà bantu balùmè wùlwalwà ewu, nsongàalùmè, bwónsò nè bidimu byà bitwè ku makùmi àbìdì. Bàvwa nè nsuki mifiike, nè nsuki mitòòkòlòke. Nè bàvwa bwónsò bàvwàle mizàbì mitòòke, nè ku makàsà kutupù. Nè kulwabò kùndi lubilu nè kubanga bànguupukila, bèèla lubilà nè: “Mwanèètù wa mushinga mukolè!”

388 Mèmè kwela meeji. Ki mèmè kukùdimuka paanyimà, kàdi's ki mèmè wàwa, kaçya ànu ngaadyàdija mwaba awu. Ki mèmè kudyàmbidila nè: “Èè, mpindyewu, eci's ncyà pabwàci.”

389 Ànu pa díbà adi Díyì kampànda kubangadi kwakula naanyi. Ncyàkamònakù Díyì adi to. Dyàkamba nè: “Wàsangishiibù, wèwè—wèwè wàsangishiibù pàmwè nè bàà kwènù.” Ke díbà adi bantu kampànda kungambulabò è kumbàndishabò, kuntèekabò kuulu menemene, pa cintu cinène nè citùmbùke mùshindù *ewu*.

Mèmè kwamba nè: “Nwenji nànkù bwà cinyi?”

Bwòbò kwamba nè: “Pa buloba wèwè's uvwa mulombodi.”

Ki mèmè kwamba nè: “Èè, bwà eci mèmè—mèmè ncyèna ncyùvwakù to.”

390 Nènku Díyì adi diikàle dyàkula naanyi. Nciwvakù nè mùshindù wà kumòna Díyì adi to. Mpindyewu, Dìvwa ànu kumutù kwànyì menemene aku, diikàle dyàkula naanyi.

391 Mèmè kwamba nè: “Èè, pùikalàbì nè ndi—pùikalàbì nè ndi mufwè, ndi muswè kumòna Yèsù.” Mèmè kwamba nè: “Ndi. . . Yèyè ùvwa menemene. . . Yèyè ùvwa mwoyi wànyì wónsò. Ndi muswè kuMumòna.”

Ki pa nànkù Yèyè kwamba nè: “Kwèna mwà kuMumòna mpindyewu to. Yèyè ùcidi ànu kuulu menemene.”

392 Nwamònu's, mùvwa mmwinshì mwà cyoshelu, too nè díbà adi, nwamònu's, mwaba mwisambòmbò, wùdì bantu bàya, nwamònu's; kí ngwà mwandamutekètè, wùdì Nzambì ùsanganyibwa awu, mu cipaapu cyà mwandamutekète amu to. Mwisambòmbò's!

393 Nènku bàvwa—nènku bàvwa bàsanganyibwa bwónsò muntwamu, nè bàvwa munkaci mwà kupìcila mwaba awu. Ki mèmè kwamba. . . Bìvwa bìmwèka mu bushùwà bwà bwalu ànu bu nè bàvwamù miliyò nè miliyò. Kacyà nciwvakù mubàmòne to. . . Kàdi, pàmvwà musòmbe mwaba awu apu, bantu bakàjì nè bantu balùme aba bàcìvwa ànu bàpìcila mwaba awu bànguupukila, bàmbiikila nè “mwanèètù.” Nènku mèmè mwà musòmbe mwaba awu.

394 Ke pashiishe Díyì adi kwambadi nè: “Wàsangishiibù pàmwè nè bàà kwènù, mwàkasangishiibwà Yakòbò pàmwè nè bàà kwàbò amu.”

Mémè kwamba ne: “Bwónsò aba, mbàà kwètù anyi? Bwónsò aba mba-Branhams anyi?”

Yèyè kwamba nè: “To. Mbaùdi wèwè mukùdimwíshe mucimà kùdi Kilistò.”

<sup>395</sup> Mémè kùkènzakana. Nè kùlwakù muntu mukàjì mulenga wa dikèma nè lubilu. Ùvwa ànu ùmwènèka mùshindù wùmwè awu’s. Kungeelayè mabòko kunshingù, kwambayè nè: “Kaa, mwanèètù wanyì wa mushinga mukolè!” Kuntàngilayè.

<sup>396</sup> Mémè kudyàmbidila nè: “Ekèlekèlè! Ùmwènèka ànu bu Mwanjèlò’s.” Ki kupita kuyayè.

Ke Dîyi adi kwambadi nè: “Kwèna mumujingùlùle anyi?”

Mémè kwamba nè: “To, ncyèna mumujingùlùle to.”

<sup>397</sup> Yèyè kwamba nè: “Wàkamufikisha kùdi Kilistò pàkaavwàye nè bidimu bipite pa makùmi citèèmà.” Yèyè kwamba nè: “Udi mumanyè nè mbwà cinyi ùdi ùtamba kukutwà mushinga anyi?”

Mémè kwamba nè: “Nsongààkàjì mulenga wàwa ùvwa nè bidimu bipite pa makùmi citèèmà?”

<sup>398</sup> “Èyowà.” Yèyè kwamba nè: “Bwà mpindyewu kènàku mwà kushintuluka kàbìdi to.” Yèyè kwamba nè: “Ke bwà cinyi ùdi wàmba nè: ‘Mwanèètù wa mushinga mukolè.’”

<sup>399</sup> Mémè kudyàmbidila nè: “Kaa, ekèlekèlè! Kàdi pàànyì mvwa nè bwòwà bwà cyòci eci? Mòna’s, bantu aba’s mbàà cyà bushùwà.” Bòbò, bòbò kabàvwa nè kùvwàbo bàya to. Kabàvwa bàcyòke, pàvwàbo Muntwamu apu.

Ki mémè kwamba nè: “Èè, mbwà cinyi bùndi nciyi mwà kumwènena Yesù?”

<sup>400</sup> Yèyè kwamba nè: “Èè, mpindyewu, Yèyè—Yèyè nealwe dîngà ditùkù. Nè neÀnjì kulwa kùdi wèwè, dyàmbedi, nè dîbà adi wèwè neùlumbulwishiibwè.” Yèyè kwamba nè: “Bantu aba mbaùdi wèwè mukùdimwíshe mucimà nè mulombòle.”

<sup>401</sup> Ki mémè kwamba nè: “Udi uswa kwamba nè, mu kwikala mulombodi, nè ndi . . . nè Yèyè neàndumbùlwishè anyi?”

Yèyè kwamba nè: “Èyowà’s.”

<sup>402</sup> Ki mémè kwamba nè: “Bìdi bìkèngela bwà mulombodi yònsò àlumbulwishiibwè mùshindù awu anyi?”

Yèyè kwamba nè: “Èyowà’s.”

Mémè kwamba nè: “Kàdi Pòlò pèndè?”

Yèyè nè: “Nebikèngelè bwà kulumbulwishiibwayè pàmwè nè bèndè yèyè.”

<sup>403</sup> “Èè,” mungàakambà, “kèndè kasumbù kwòkò kabwelè, kàànyì pàànyì nekàbwelè, bwalu ndi muyiishè Dîyi ànu òmwèdimwè adi menemene.” Ki cyòci aci’s. Mémè kwamba nè: “Mwaba wàkabàtiizàye mu Dîna dyà Yesù, nànsha mémè pàànyì, ki mùndi mwenzè. Ndi muyiishè . . .”

404 Ke mìliyô kwelayi lubilà lukolè, bwônsò cyàpàmwè, kwambabò nè: “Pa Cyôci aci ke patùdi biikishile!”

405 Ki mémè kudyàmbidila nè: “Ekèlekèle! Ngikalapù nànsha mumanyè cyôci eci kumpàla kwà mémè kulwa kaaba aka, nùnkù’s ndi mwambile bantu bwà kulwabò kaaba aka. Kabyèna bikèngela bwà kupangilabò eci to. Mòna’s, tàngilà kuneeku’s!” Ke díbà adi . . .

406 Ki Yèyè kwamba nè: “Mpindyewu, dínghà ditùkù Yèyè neàlwe, nè díbà adi . . . Mpindyewu, mwaba ewu, katwèna nànsha tudyà, tunwà, anyi tulààla tulù to. Tudi bwônsò ànu umwe.”

407 Èè, kí ncipwàngàne to; nciàmbe cipwàngàne kule nè kule. Kí ncyà dikèma nè dyanyina to; nciàmbe cyà dikèma nè dyanyina kule nè kule. Kakwèna dínà dídiku mwà . . . Kwèna mwà kudìcinkila . . . Kakwèna myákù mu nkòngamyákù bwà kucyàmbe to. Udi ànu mufikè, kwàjiki.

408 Ki mémè kudyàmbidila nè: “Èè, eci, eci’s ncifwànyine kwikala cipwàngàne. Kàdi díbà adi citwikalà mwà kwenza pashìshe ncinyi?”

409 Yèyè kwamba nè: “Díbà adi, pààlwà Yesù, nè twètù biikàle . . . nè Yèyè mukulumbùlwishe wèwè, anyi bwà mudimu wèbè wà bwambi, díbà adi netwàlukilè pa buloba bwà kwangatulula mibidi.” Èè, mémè—mémè kacya ncìvwakù mukwèlèlee meeji díbà adi to. Aci’s ke menemene cìdi Mifùndù’s. Yèyè kwamba nè: “Díbà adi netwàlukilè pa buloba bwà kwangatulula mibidi, díbà adi netùdye. Apa katwèna tudyà, anyi tulààla tulù to.” Bwóbò kwamba nè: “Panshi apu mpatwàdyà, kàdi netwàlukilè pa buloba.”

410 Mémè kudyàmbidila nè: “Ekèlekèle, abi’s mbilenga bilayà’s! Kaa, ekèlekèle! Pàànyì’s mvwa naaci bwôwà. Bùvwa mbwà cinyi bùmvwà mémè nè bwôwà bwà kufwà, bwà kufika ku eci nùnkù? Èè, eci’s ke bupwàngàne, kusàkidila bupwàngàne, kusàkidila bupwàngàne. Kaa, ebi’s mbilenga bilayà’s!”

411 Nwamònu’s, tuvwa ànu mwinshì mene mwà cyoshelu amu. Nwamònu ani? Cìvwa ncyôci aci, nwamònu’s, ànu mwinshì mwà cyoshelu menemene amu, bindile Dilwa, nwamònu’s, bwà kuyaYè kangata aba bàdi balààle tulù mu . . . mi—mibidi yìdi milààle mu lupwishi, bwà kutùbiisha ku lufù kàbìdi; ùlwa, bwà kutùbiisha ku lufù.

412 Mwàkalwà Yesù nè kwendakana mu mpalàdiizò, nè kubiisha ku lufù Abraham, Izàkà, nè bwônsò abu, nudi bamanyè’s, bàvwà bindile dibìikà dyà ku lufù dyà kumpàla abu. Bààkabwela mu cimenga nè kumwènekela bààbùngi.

413 Ncyà mu Mifùndù ànu menemene. Cìkèèna—kumòna aci cìvwa nànkù awu, anyi ní ncinyi cyònsò cìvwàci aci, cìvwa menemene cyà mu Mifùndu.

414 Ki mèmè kwamba nè: “Èè, ebi’s mbilenga bilaya’s!” Ke dîbà adi mèmè kudyàmbidila nè: “Aci kî ncilenga cilay- . . .?”

415 Mèmè kuumvwa cintu kampàndà cidila mwadi, bu wà kàbalù. Ki mèmè kutàngila. Nènku kàbalù kàànyì kakesè kàà dibànda kâmvwà kale wàwa nè ciibidilu cyà kubànda, Prince wanyì mukesè awu, mvwa mutàmbe kukànanga bikolè. Kì kwôkò kàvwà mwab’awu aku, kiimàne mwab’awu ku luseke lwànyì, nè kantèeke mutù pa dikaaya, bwà kunguupukila. Bu mûmvwà nè ciibidilu cyà kukàlakisha nsùkaadi, nudi bamanyè’s, ki kuntèekakù mutù pa . . . Mèmè kukèela dibòko kunshìngù. Mèmè kwamba nè: “Prince, mvwa mumanyè nè wèwè newikalè kaaba aka.”

Mèmè kuumvwa cintu cindàka ku cyanza. Ke mbwa wanyì wa kale wa dilemba nendè nshìmbà awu mwaba awu’s.

416 Mukalenge Short, kwìnshì eku, pàà—pààkamwelelaye mulungù, ngâkacîpa ngamba nè ànu mèmè mushebèye Mukalenge Short awu bwà bwalu abu. Mvwa nè bidimu bitwè ku dikùmi nè bisambòmbò. Úvwa mumwelèle mulungù, mumupèeshe dihùndà dyà munyìinyi dyela mulungù. Kì tààtù kunjikila nè cingoma, pâmvwà nya bwà kamwasa ku cingoma apu, ànu mu birò byà bampùlushì amu. Kì mèmè kwamba nè: “Mèmè’s nêmmushebèyè.” Mèmè nè: “Èè. . .” Mèmè kuya ku lukità lwà mbwa awu. Mèmè—mèmè kumujiika. Mèmè kwamba nè: “Fritz, wèwè uvwa kùndi ànu bu nyàànaanyi. Utu mumvwàdike bilàmbà nè mumfucile kàlaasà. Pawàlu kukola, mvwa muswè kukukùba. Kàdi nyèwù bààkushebèyì.” Mèmè kwamba nè: “Nyawù nkulaya’s, Fritz, yèyè kààkushàalakù nè mwoyi to.” Mèmè kwamba nè: “Ndi nkulaya nè, yèyè kààkushàalakù nè mwoyi to. Nêmmujikilè mu mùsèèsù musangu kampàndà, wènda wèndakana, dîbà adi nêmmudyatè ku kàshinyì, wamònu’s.” Kì mèmè kwamba nè: “Mèmè’s nênkusombwèlèye.”

417 Kàdi nudi bamanyè mùdi bwalu anyi? S’ngâkafikisha muntu awu kùdi Kilistò, kumubàtiiza mu Dîna dyà Yesù, nè kumujiika pààkafwàye. Èyowà’s, mukalenge. Ngâkakùdimuna mucìma bidimu bìbidi paanyimà pàà cyôci aci. Mèmè kumòna maalu mùshindù mushiilàngàne dîbà adi, nwamònu’s. Mèmè kumunanga pamutù pàà kumukìna’s.

418 Nànku dîbà adi, kàdi, nànsha nànku, s’ki Fritz awu mwimàne mwaba awu, munkacì mwà kundàka ku cyanza. Nè mèmè mvwa . . . Mèmè kutàngila.

419 Ncivwa mwà kudila nànsha. Muntu nànsha umwe kàvwakù mwà kudila to. Byònsò bìvwà ànu disànka pa dyòdi. Kùvwà mwà kwikala mubungàme to, bwalu byònsò bìvwà ànu musàngèelu pa wòwò. Kùvwà mwà kufwà to, bwalu civwa ànu Mwoyi pa wòwò. Nwamònu anyi? Nwamònu anyi? Kùvwà mwà kukùlakaja to, bwalu bìvwà ànu bunsongà pa bwòbù. Nènku ke cidì. . . Bìdi

ànu bipwàngàne. Mémè kudyàmbidila nè: “Kaa, ebi’s mbilenga bilayà’s!” Nènku mìliyò ayi. . . Kaa, ekèlekèle! Mvwa ndyùm vwa ànu kwànyì kumbèlu menemene, nwamònu’s.

420 Ke—ke dîbà adi mene mémè kuumvwa Díyì kampànda. Nè kwelaDì lubilà lukolè, dyàmba nè: “Byònsò byúkaadiku munangè abi. . .” difutu bwà mudimu wànyì. Mémè ncyèna nè dijinga dyà difutu to. Yèyè kwamba nè: “Bwònsò bawúkaadiku munangè abu, nè bwònsò bàkaadiku bàkunangè abu, Nzambi wàkupèeshibu.”

Mémè kwamba nè: “Mukalenge àtumbishiibwè!”

421 Mémè kudyùm vwa mùshindù wà pabwàwù. Mémè kudyàmbidila nè: “Mbwalu kaayì ebu? Ndi ndyùm vwa mùshindù wà pabwàwù.” Mémè kukùdimuka nè kutàngila. Nènku pa bulààlu apu, mubidi wànyì munkaci mwà kunyunga. Mémè kwamba nè: “Kaa, kabyèna bikèngela bwà mémè kwalukila nànsha, cyà bushùwà’s. To, kùndekèdiku nya to.”

422 Kàdi bìvwa bikèngela bwà Èvànjeeliyò àyiishiibwè. Mu kasùnsukila kàà kasunsa cyanaàna, nkààvwa cyàkàbidì pa bulààlù, nwamònu’s, mùshindù ewu.

423 Kì nkwanjì kwenza ngondo yìbidì to, yìdì. . . Nutu bacyùm vwe mu—mu cikàndàkàndà cyà *Díyì* dyà Beena kantu-ku-Byanza. Nciyè pa buloba bujimà, nwamònu’s. Nè Mwanèètù Norman, udi kaaba aka ewu, ndi ncinka nè ùdi ùsanganyibwa kaaba aka mwaba kampànda dilòlò edi. Wàkacitentulula kucyùm sha amu nànkù, nè kucitùm ayè mu tukàndà tukesè. Nciyè myaba yònsò. Nè bambi mbamfùndile mikàndà, bàabúngi, bambè. . .

424 Umwe kaaba aka, nêngàmbè ànu eci nùnkù. Mbayimfùndile nkàmà nè nkàmà mijimà, mu bushùwà bwà bwalu. Ewu nùnkù, ùvwa wàmba nè: “Mwanèètù Branham, cikèenà-kumònà cyèbè cyà mu cikàndàkàndà cyà *Díyì* dyà Beena kantu-ku-Byanza aci. . .”

425 Nè mémè ndi ngaanyisha Tommy Nickels, nànsha mùdiye kàciyi kàbidì nè Beena kantu-ku-Byanza amu, yèyè awu. Ncyèna mumanyè nè mbwà cinyì to, kàdi kàcyèna naabò to. Kàdi mmucyèlè muntwamu mu mùshindù mwímpè be, mwaba wùndì mémè mwambè awu. Ànu mwòmò mu cikàndàkàndà cyà beena búsàtù aci, yèyè mwambè nè: “Mwaba wùndì. . . Mwaba wùvwà Pólò mubàtiize mu Dìna dyà Yesù, nè mutùme diyè bwà bantu kwenzabò cintu cimwècimwè aci, mémè ndi mwenze cintu cimwècimwè aci.” Nwamònu’s, mucifunde ànu menemene mùshindù wùvwàci. Nwamònu anyi? Ke pa nànkù dîbà adi mémè—mémè—mémè kudyàmbidila nè: “Ekèlekèle!”

426 Mwambi ewu kumfùndila, kwamba nè: “Mwanèètù Branham, cikèenà-kumònà cyèbè. . .”



427 Cyôci ciinè, cìvwa mwà kwikala cikèènà-kumòna's. Yèyè kwamba nè...Mpindyewu, ncyèna muswè kwamba nè "ditentemunyibwa" to. Piikalàbi nè Pòlò...Piikalàbi nè mèmè mvwa mwambwibwe mu dyulu dyà kumpàla edi nè mumòne cyôci aci, netwàmbè bishi bwà Pòlò wàkambwibwa kuya kabwela too nè mu dyulu diisàtu awu? Aci cìvwa cinyi? Mmwambè nè kàvwa nànsha nè mùshindù wà kucyàmbakù to, nwamònu's, piikalàbi nè ùvwa mwambwibwe. Ní cìvwa dyambwibwa, ncyèna mumanyè. Kakwèna mùshindu wà kucyàmba to. Ncyèna mufwànyine kunwàmbila to.

428 Kàdi mwambi ewu wàkamba nè: "Mwanèètù Branham, cikèènà-kumòna cyèbè aci cìvwa cyùmvwika cyà mu Mifundu menemene pa kuumusha ànu pawàlu kwakula bwà kàbalù kiikàlèmu." Yèyè kwamba nè: "Kàbalù mu Dyulu?" Yèyè nè... Mpindyewu, nudi numòna meeji à muntu wa bukwántèleleelu awu, nè lungènyi's? Nwamònu anyi? Yèyè nè: "Dyulu's ditu dyanzela bantu, kî ntubalù to."

429 Èè, mèmè kutwà nyimà panshi. Billy, mwanàanyi wa balume ewu, wàkatèeka mukànda mumfùndila awu kaaba aka mene mu biró byà èkèlezziyà wa kale emu, kùkaadi ngondo bu yisàtu anyi yinaayi nànkù.

430 Mèmè kwamba nè: "Mwanèètù wa mushinga mukolè, lungènyi lwèbè ndumpapùle's, kàdi, nè dimanya dyèbè dyà Mifundu. Mèmè ncìvwa mwambè nè mvwa mu Dyulu to. Mvwa mwambè nè mùvwa mmu mwaba mufwànàngàne nè mpaladiizò, bwalu Kilstò ùcìvwa ànu kuulu, wamònu's. Kàdi," mungàakambà, "bu cyôci mwà kukusànkisha, anji buulùlàbi mu Bwàkabuulwibwà 19 tũng. Nènku pàdi Yesù ùlwa mwikàle ùpàtuka mu maulu à Dyulu, Yèyè mmubànde pa kàbalù katòòke, nè bansantu bwònsò bàdi Nendè mbabànde pa tùbalù tutòòke." Cyà bushùwà. Kakùyì mpatà to. Èyowà's, cyà bushùwà.

431 Nènku kuulu aku mu wòwò Mwaba wùmwèwùmwè awu, kùvwa umwe uvwa mufwànàngàne nè nyuunyi wa mukankù, nè umwe uvwa mufwànàngàne nè ngombe, nè umwe...Èè, ekèlekèle, tùbalù twàkalwà kwangata Eliyà atu tùdi mwaba kaayi? Bidi ànu bileeja, nudi numòna's, nè meeji à buntu àdi àkèba ànu katàmbà kàà kwapuka naakù. Aci kaayi ncyà bushùwà.

432 Mpindyewu mònaayi. Kàdi mvwa ànu ngèèla meeji nè, pàvwà mwanèètù wa mushinga mukolè, wa difwanà dyà Nzambi ewu, Yone... Mèmè kwela meeji nè ncìfwànyine kwikala mwaba mwimpè wà kufunyikakù cyôci aci, ànu kumpàlàn menemene kwà kujikija, nwamònu's. Piikalàbi nè Yone wàkatàngila Mwòmò amu, nè bwòbò abu bàvwa bàà ku bàna bààbò, nwamònu's, bàna bààbò bàvwà nè cyà kukèngakù kakesè; díbà adi, nwamònu's, Mukalenge Nzambi nguvwa mungaanyishile bwà kumònakù bàna bèètù nè bansantu bàvwà bindile Dilwa dyà Mukalenge

abu. Mõnaayi nè, bwòbò kabàvwa mwinshì mwà cyoshelu cyà milàmbù to; bàanyi mémè kabàvwa amu nànsha. Kàdi, aba bwòbò bàvwamù, bàvwa bashebèyìibwe bwà diitabuuja. Nwamònu anyì? Bàanyi mémè kabàvwa mwinshì mwà cyoshelu cyà bafwile diitabuuja nànsha.

<sup>433</sup> Mpindyewu ndi muswè bwà nùteelejè nè ntèmà yònsò. Nènku nènjikijè, bwà kwamba menemene, ànu mu tusunsa tutwè ku dikùmi cyanààná, pa díbà diikùmi jaajaaja wa dilòòlò ewu, byòbì bikèngela bwà mémè ànu kucikòsòloja bwà ngaacìjikija mààlabà.

<sup>434</sup> Tàngilàayi. Bwòbò, bwòbò kabàvwa bàanyi...bàvwa Mukalenge mundeejè abu, Mukàji-musèla awu nànsha, Awu Yèyè kàvwa mwinshì mwà musùmbà wà bafwile diitabuuja abu to; bwàlà, cyoshelu cyà milàmbù cyà bafwile diitabuuja abu to; kàdi bwòbò bàakapeta mizàbì mitòòke, ku diitaba dyà ngàsà udi ùfwilangana luse wa Dîyi dìdì nè mwoyi adi awu. Kilistò ùkaavwa mubàpèeshe mùzàbì mutòòke. Ncyèna ngèèla meeji nè, ku dikàngula . . .

<sup>435</sup> Anyì, ndi ngèèla meeji, èyowà's wè, nè ku dikàngula dyà Citampì Ciiitànù eci, mùndì ngiitabuuja, nè mbatùkàngwileCì. Ndi mucyènzè nè kondò kàà mwoyi katòòke, nè dibuulula ditòòke kumpàlà kwà Nzambì. Kí nnè ndi nteeta ànu cyanààná bwà kucyènzà nànsha, ngèèla meeji nè, bwalu ntu misangu yònsò ànu mbèngangana nè bulongolodi, kacya ncutukù muswè kwikala wa mwómò nànsha. Kàdi nCinkàngwila mpindyewu.

<sup>436</sup> Nè ndi cyà bushùwà ngèèla meeji ku cikwàbò cintu. Ku dikàngula dyà Citampì Ciiitànù eci, mu ditùkù edì, cidì cilongolola dilongesha kampànda kaaba aka mene, dindì mufwànyine kwakulapù, dyà dilààlà dyà musùukà. Mpindyewu, ndi mumanyè nè kùdi bantu kaaba aka bàdì cyà bushùwà biitabuuja cyòci aci, nwamònu's, mu dilààlà dyà musùukà adi. Ndi ngèèla meeji nè Eci cidì cijaadika nè cyòci aci ncyà mafi. Kí mmilààle nànsha. Yidi nè mwoyi. Mibidi yàbò, nyidì milààle. Kàdi, misùukà, kayèna mu lukità to, yidi mu Bwikadi bwà Nzambì, nwamònu's, mwinshì mwà cyoshelu.

<sup>437</sup> Mwaba ewu ke wùndì mpangakanangana nè mwanèètù kampànda wa mushinga mukolè, mulongeshi. Nènku, ndi mmòna nè, ndi mumanyè nè ndi mmòna bàmwè bàà ku bayiidi bèndè mbasòmbe kaaba aka. Bidi nè, ndi mumanyè nè yèyè mmulongeshi munène. Yèyè m'mulongeshi munène, nè— nè m'Mulongeshi wa mu Bunzambì, nè ùdi Ph., LL.D. Nè yèyè ùdi—yèyè ùdi muntu mwìmpè menemene, yèyè pèndè. Ngèèla meeji nè ùkaadi mumanè kuya, patùdi twakulangana apa. Kàdi yèyè's ùvwa mmuntu mwìmpè, nè mufùndì wa dilambu. Nè mwinè awu's m'Mwanèètù Uriah Smith, mufùndì wa mùkàndà wà *Danyèlè nè Mabuwulula*. Mpindyewu, nwènù bàtù balondi bàà malongesha èndè, nwamònu's, mpindyewu kí mbwena kwamba

nè ndi . . . Ncyêna ànu . . . ncyêna muswè kwamba eci bwà kwela mukana nànsha, kàdi ndi ànu . . . Nwamònu anyi?

438 Kàdi, Mwanèètù Smith awu, mwikàle ùteeta kutwà nyama ku mikòlò, nwamònu's, mwikàle ùteeta kutwà nyama ku mikòlò dilààlà dya misùùkà, mwaba awu yêyè ùdi wàmba nè: “Musùùkà wùdi wùlààla. Nè kakwènakù cikwàbò cyoshelu cyà milàmbù mu Dyulu nànsha. Ne, cyoshelu cimwèpelè cìdìbokù bàmba aci,” cìdiye yêyè—yêyè wìtabuuja nè ke cìdi mu Dyulu, “ncyoshelu cyà musenga wà kamonya.” Kàdi bwènù nwènù bananga . . . Ne kî mbwà kupangakanangana nè mwanèètù to. Mémè nêngiikalè pàmwáp- . . . ndi ntékemena mémè nè nènkatwilàngànè nendè dyàmwàmwa, nwamònu's. Kî mbwà kupangakanangana nè mulongeshi munène awu to.

439 Kàdi bìdi ànu bwà kunùleeja mùdi Eci cijaadika nè cyòci aci ncyà mafi, nwamònu's. Cìdi cijaadika nè ncyà mafi. Dikàngula dya eci Cìtampì, mu ditùkù dya ndekeelu edi, cìdi cyùmusha dilààlà dya musùùkà adi cìdiimansha ànu kwàka. Nwamònu anyi? Yidi nè mwoyi. Kî mmifwè nànsha. Nwamònu anyi? Mònaayi's.

440 Mònaayaaku eci mpindyewu. Mpindyewu, kwòkò kakùyì cyoshelu cyà milàmbù mu Dyulu to, Mulàmbù bwà mpèkaatù wùdi wùsanganyiibwa mwaba kaayi díbà adi, Mwànà wa mùkòòkò? S'kùdi nè cyà kwikala mwaba wùdi Mwànà wa mùkòòkò mushebeya, udi ùmata mashi awu, ùsanganyiibwapù, mwaba wùdi Mashi . . . cyòci aci.

441 Mpindyewu, musenga wa kamònya wùvwa mmipùùyà, bintu byà mupùùyà mukolè bìwàbò bòòsha, bìdi Bible mwambè nè “mmasambila à bansantu abi.” Kwòkò kakùyì mulàmbù pa cyoshelu aci to, díbà adi masambila kaèna mwà kwanyishiibwa nànsha. Cìdi ànu ku Mashi, pa cyoshelu cyà milàmbù, wòwò ngàdi àpìcisha masambila àya kùdi Nzambi.

442 Mwanèètù Smith ùvwa mu ntùpàkànyì, nwamònu's. Kî mbwà kupangakanangana nendè to; ngèèla meeji nè ndi mwambè bwalu abu mubùtòokèshe, nè dinanga dya bwànà bwètù nè kaneemu kwònsò bwà mudimu wèndè munène awu, nwamònu's. Kàdi ùvwa mu ntùpàkànyì.

443 Cìtampì Cìitànù cyàkàngulu cyòci aci, nwamònu's, nwamònu's; nè bikwàbò bintu byàbùngì, panwikalà babyümvwè bìmpè. Nwamònu anyi? Nêngiikalè mwindìle nkonko yànyì ayi, nwamònu's, pìikalàbì nè ndi . . . Èyo.

444 Mpindyewu, mushèètè wà cipungidi wùvwa wùsanganyiibwa mwaba kaayi; Mwànà wa mùkòòkò mushebeya, mutàpa mpùtà, ùzònta mashi, bwà difuta dya cibawu, bwà masambila à dipembu aa?

445 Mònaayi nè, Bible ùdi wàmba nè: “Ntentà wa pa buloba wa cisòmbedi cyètù ewu yêyè munyangùke, tukàadi nè mukwàbò

munkaci mwà kwindila.” Mwômò amu ke mûngààkamònà bansantu abu amu. Nwamònu anyi?

446 Tàngilàayi pàdi mwànà wa mu dibòkò...Mfwilaayikù cyàkàbidi luse, nwènù bânà bèètù bàà bakàji, bwà muyiiki wà pa bùtookà ewu kumpalà kwà bansongààkàji. Kàdi, tàngilàayi. Pàdi maamù mwimite difù, nè mushiki wà misunya awu wùdìnyònda nè wùtùpika apu, s'nudi nuumvwa nè, cidi mmubidi wà mu bufùki. Nè ànu mùdi bufùki bwàkaja mubidi wà mu bufùki amu . . .

447 Ukààdikù mutàngile mukàjèèbè kumpalà kwà bânà bèèbè bakesè abu kulediibwabò anyi? Misangu yònsò mukàji ùdi, dîbà dyònsò adi, lwà ku ndekeelu aku, ùdi ùlwa nè musàngeeelu wà menemene, mupòle. Nànsha yéyè kàyi nàнку, kacya bààmulela, ke mwikalàye dîbà adi. Nukààdikù bamòne mùdiye ùlwa munsantu, anyi njiyà yà mùshindù kampànda, yinùdi numòna kùdi maamù anyi?

448 Kàdi umòna ngènzàmpèkààtù wetù ewu pambèlù pààpa, ùseka maamù udi—udi mukàji udi nè difù. Mèmè's ndi ngèèla meeji nè aci ncyà macimbu. Awu's mmwoyi wùdi munkaci mwà kulwa pa buloba.

449 Kàdi nukààdikù bamòne nè, mu nyùngulukilu wa maamù awu mùdi mùmwèka bu mùdi njiyà kampànda yà bupòle anyi? Ncinyi aci's? Nkaamubidi kakesè kàà nyumà, mwoyi wà nyumà, mwindile bwà kubwela mu kaamubidi kakesè aku pàdiku ànu nè kàledìibù. Mpindyewu nkimiciibwe ànu; kàdi, pàdiku kàlediibwa, nkaledìibwe's. Mubidi wà nyumà ùdi udìsanga ne mubidi wà mu bufùki's.

450 Nènku, dîbà adi, Bible ùdi ùlongesha nè twètù tudi mpindyewu biimita kùdi Nzambì. Tudi biimita kùdi Nyumà Mwimpè, mmùmwe nè, munda mwètù mùdi Kilstò, mwànà wa Nzambì munkaci mwà kudifwimba munda mwètù. Nè pàdi mubidi wà pa buloba ewu wùnyanguka, mubidi wà nyumà ewu wùdi wùmukila mu myoyi yà buloba, kùdi mubidi mukwàbò mwindile bwà kuwàkidila. “Ntentà wa pa buloba ewu yéyè mulekèlèdiibwe panshi, kùdi mubidi mukwàbò mwindile bwà kuwàkidila.” Mubidi wà cifwàkà ewu wùdi wùvwàla dibèngakufwà. Cyà pa buloba eci cidi cìvwàla cyà mu dyulu. Eci, nudi numòna cìndi njinga kwamba aci anyi? Kùdi mubidi wà mu bufùki wùdi mubidi wà mpèkaatù; kàdi, mu dyenjiibwa dyàwù, mwikàle ànu mufwànàngàne naawù, kùdi mubidi mukwàbò kutùyaayà.

451 Nènku mèmè ndi nè kusàkidila kùdi Nzambì mùndiku mwà kwamba, mèmè bu mpaasàtà wenù nè mwanèènù, ndi mumòne bantù abu, ndi ngambilamù, mu mubidi awu, nè mubàlengè nè byanza byànyì ebi. Ncyà bushùwà. Mònaayi.

452 Tàngilàayi bimpè. Tàngilàayi Mòsà, Eliyà. Paanyimà pàà Mòsà mumanè kufwà, nè Eliyà mwangàciibwe mu Dyulu,

wàkiimana kaaba aka pa Mukùnà wà Dikùdimuka dyà mpàla ne byumvwilu byèndè byà dyakula, byà ditèèleja, byà dyumvwa, nè wàkayikila nè Yesù kumpàlà kwà kupoopediibwa pa nkùrusè. Mpindyewu, mmubidi wà mùshindù kaayi wùvwàye naawù awu?

<sup>453</sup> Tàngilàayi Samwèlè, paanyimà pàà yèyè mumanè kufwà kùkaavwa bidimu bitwè ku bibidi. Bàakamubiikidisha mu—mu nyòngòlò amu dilòlò adi bwà kwalukilayè, kùdi mwamùlopò wa mu Enè-Dô, nè wàkaakula nè Shawùlà mu mwakulu; kuumvwayè Shawùlà, kumwandamunayè, nè wàkadyànjila kumanya bintu bìvwà mwà kwenzeka. Bicivwa ànu ne, nyumà wendè kàvwa mushintùlùke nànsha. Yèyè ùvwa mupròfetà.

<sup>454</sup> Pààlwà nyumà wa Eliyà pa muntu awu, neàmulombòlè ànu bu Eliyà. Yèyè neàye mu cipèèlà. Neikalè munangè cipèèlà. Neikalè mukinyi wa bakàji bàà nsòmbelu wa masandi. Neikalè ùbèngangana nè malongolodi. Kàakudya cibàngà bwà muntu nànsha umwe to. Nè aci cidi ànu . . . Aci cidi, aci ke ciikalà wendè nyumà. Ke civwàye, musangu wònsò wùvwàye ùlwa, nwamònu's.

Mòsà neikalè ànu muntu yèyè umwèumwè awu.

Mpindyewu, nè tudi tusangana, mu Bwàkabuulwibwà 22:8, cintu ànu cyòci cimwècimwè aci.

<sup>455</sup> Mpindyewu, anyi bwà kukòsa bwalu abu, bwà aba bàdi . . . Misùukà ayi (mpindyewu tàngilàayaaku eci) mwinshì mwà cyoshelu, ku dikàngula dyà Cítampì eci, aba bàakashebeyàbo mu cikondo cyà pankaci pàà lufù lwà Kilstò nè dibàndà dyà Èkèleeziyà; kasùmbù kàà Eichmann, nè cyònsò aci, beena Yudà balelèlà beena ménà àvwà mafùnda mu Mukàndà abu. Bu wèwè mwà kutàngila bìmpè, mwanèètù wanyi, bilondèshile Mifùndu, bàvwa mwà kuyiikila, kwela mbilà, kwakula, kuumvwa, nè bàvwa nè byumvwilu byònsò bitaanu abi. Kabàvwa balààle mu lukità, kabàyiì bapangè kumanya bìvwà bipitakanà to. Bàvwa batàbàle ànu menemene, nè bàvwa mwà kuyiikila, kwakula, kuumvwa, nè cintu cikwàbò kanà cyònsò. Mmwòmò anyi? Kaa, tükwàcishèku!

<sup>456</sup> Tusunsa túbidi. Amen. Ndi . . .mfwilaayikù luse mùndi munùlamè citùpà cijimà cyà díbà. To, ncyèna mwà, kabìvwa bìkèngela bwà ngiikalè mwambè aci to, nwamònu's. Nwamònu anyi? Ncyà bushùwà, nwamònu's.

<sup>457</sup> Kàdi, tàngilàayi, dyànyì pàànyì dyumvwa dyà ditàmbe bwìmpè ndyòdi edi, dyà ditàmbe bwìmpè. Nè bilondèshile dibuulula divwà dimpèèshùbwe mu dindà emu kumpàlà menemene kwà bufùkù kucyàbo, kùdi Mukalenge Yesù Kilstò, ke Cítampì Ciitànù dikàngula ncyòci aci, bwà kuyaci pàmwè nè bikwàbò binaayi abi. Ku ngàsà Wendè, nkùdiYe mucimpèeshe, ngàsà Wendè kunùdi nwènu nè kùndi mèmè. Tudi tuMwela twasàkidila bwà Cyòci aci. Nènku, ku dikwàcisha Dyèndè, ndi nè meeji à kwikala nè nsòmbelu wa sheemàsheemà . . . ne mwànyì mwònsò, ndongesha bakwàbò bwà kwenzabò cintu

cimwècimwè aci, too nè pângàatwilanganà Nendè, pàmwe neenù, mu Butumbi, piikalà bintu byònsò bijikè. Mémè ndi muMunangè bwà cyôci eci, nè ndyànyì pàànyì dimanya dyà ditambe bwîmpè bwà Cyôci aci.

<sup>458</sup> Nè ndi ngiitabuuja bulelèlè, nè mwoyi wànyì wònsò nè, mabuulula malelèlè à mabuulula à Cítampì cyà Kumpàla, Ciibìdi, Ciisâtù, Ciinâyì, nè Ciitànù, mbitükàngwila mpindyewu.

Ndi muMunangè, ndi muMunangè  
Bwalu Yèyè wàkannanga kumpàla

...?...

Pa mucì wà Kàlvaryò.

[Mwanèètù Branham ùdi wimbila mu matàma *Ndi MuMunangè*—Muf.]

<sup>459</sup> Mpindyewu, bitùùlùbitùùlù, nè kaneemu kwònsò, kumpàla kwà Nzambi! Bu mutwámònu Cítampì eci citükàngwila, mùvwà Nzambì ne cyà kwangata bânà Bèndè nè kubàfomija mèsù, nè kubâtùma, bwalu bwakànè—bwakànè Bwèndè Sungasunga bùdi bùlòmba dilumbulwisha dyà mpèkaatù. Anjì elààyibi meeji pa bwalu abu. Bwakànè Bwèndè, nè cijila Cyèndè cidi cìlòmba bwakàne. Mukenji wùdi kawùyì nè cibawu kí mmukenji nànsha. Nè Mikenji Yèndè Sungasunga, Yèyè mwinè, Kèna mwà kubènga kuyitùmikila kàdi kushààla Nzambì nànsha.

<sup>460</sup> Ke cyàkenzà nè Nzambì àlwe muntu. Kàvwa mwà kwangata mupinganyi nànsha, mwànà uvwa kàyì. . . ànu mwànà wa pàtupù ewu kùdiYè, anyì cintu kampànda. Nzambì wàkalwa byònsò bibìdi, Yesù wàkalwa byònsò bibìdi Mwànà nè Taatù, mùshindù wùmwèpelè wùvwà Yekù mwà kucyènza mu bwakàne. Bìvwa bikèngela bwà Nzambì àmbulè cibawu aci, Yèyè mwinè. Kacìvwa cifwànyine kwikala cyakàne, bwà kucyàmbwisha muntu kampànda mukwàbò to, muntu wa cyanààna. Pa nànkù, Mupèsonà wa Yesù ùvwa Nzambì, mumwènèshìibwe mu mubidi, ùbìikidiibwa nè ng’Emanùwèlè.

<sup>461</sup> Nènku bwà kwenza aci, nè kwangata Mukàjì-musèla, nè kusungila musùmbà mujimà wa bampàngaanù bàà Bisàmbà byà bendè bajimine, byàkakèngela bwà àfomijè bânà Bèndè Sungasunga. Nè pashùishe kubànyooka bwà cyôci aci, mu mubidi, bwà dibènga adi. Kàdi ngàsà Wèndè kubàpetela mìzàbì. Kàdi, Mwoyi, mònaayi cyàkenzekà.

<sup>462</sup> Kàdi piikalàbì nè Yèyè wàkenza cyôci aci, bwà twètù twamòna mwà kupeta mpùngà, mmunyì mutùdìku mwà kubènga mpùngà wa mu dinanga awu ku maditàmbishi? Kwòkò muntu awu, mu nzùbu emu, dilòòlò edi, mwànà anyì mukolè, udi too nè pa dìbà edi mubènge ku maditàmbishi mpùngà wàkalòmba Nzambì mushinga wà mùshindù awu, nè mwikàle muswè kwitaba cyùdi ulàmbula Nzambì aci,

dilòòlò edi; nè kabyèna bikèngela bwà wèwè, bwà mutùdiku pèètu bamanyè, kwikala mufwile diitabuuja, nànsha mùdibi nè udi ànu mufwànyine kuciikala. Kàdi mùzàbì mutòòke mmukulongolwela. Nènku Nzambì yéyè mukookòle ku mwoyi wèbè mpindyewu, bwà cinyì kubènga kuciitaba! [Mwanèètù Branham ùdi ùtuuta bintu pa cyambilu—Muf.]

Mpindyewu twinyikààyaaku mitù yètù cyàkàbìdì.

<sup>463</sup> Muntu awu, anyì bantu abu, bwòbò kaaba aka, bàdi bàjinga cyòci aci, anyì muswè kuciitaba mwimànyine pa diitabuuja dyèbè mu Mashi meela panshi àkakèngelàbi bwà Nzambì kwela panshi bwèbè wèwè, mukènge kutàmba kule nè kule cintu kanà cyònsò cikaadiku muntu wa cifwàkà kanà yònsò ewu mukènge. Kakùvwakù muntu wa cifwàkà nànsha umwe uvwa mwà kukènga mùshindù awu to. Mu mùshindù wà nè, dibungama Dyèndè dikolè Sungasunga dyàkatàpulula mâyi Èndè nè Mashi Èndè, mu mijilu Yèndè. Kumpalà kwà kuyaYè ku Kàlvariyo, mamata à Mashi àvwa àpàtuka mu mubidi Wèndè, ku dibungama dikolè dyà dikèma nè mwoyi mucibùlùke bwà civwà cikèngelà bwà kwenzaYè. Kàdi, Yéyè pèndè, s'ùvwa ànu mufwànyine kucibènga. Kàdi, wàkacyènzà ku budiswìlè ciinè aci bwèbè wèwè nè bwànyì mèmè. Udikù wèwè mwà kubenga dinanga dyà kadiyì difwànyikija dyà mùshindù awu adi anyi?

<sup>464</sup> Nènku udi umòna aci mpindyewu, ku dikanguka dyà Bitampì ebi; nè cyùdì wèwè mwenzè, nè cidì Nzambì mwenzè bwèbè wèwè. Nè wèwè udi mudilongòlòle bwà kulekelela mwoyi wèbè kùdì Nzambì, nè Yéyè muswè kukubàkula mu byanza byà mufwilakanyi nè Kilistò mùdì usanganyibwa mpindyewu amu, udikù mwà kwitaba cidìYe ùkupèèsha eci, ànu ku dyela dyà cyanza cyèbè muulu kùdìYe cyanààna, wamba nè: “Nzambì, ku cyòci eci, ndi nswa kwamba nè, ndi mwitàbe ngàsà udi mumpèèsha ewu anyì”?

<sup>465</sup> “Kàbìdì, Mwanèètù Branham, ndi njinga masambila èbè, bwà ngaashàalakù kashidi nè lulamatu.”

<sup>466</sup> Ela cyanza cyèbè muulu, nènku nènsembilè. Nzambì àkubènèshè. Nzambì àkubènèshè. Ikàlà nè meeji à kucyàmba mpindyewu. Kwè—kwèdi cyanza muulu to, pawikalà kùyì wambilamù. Nè ànu mwaba wùdì musòmbèle awu, citàbilè ànu mwaba awu. Bwalu, vùlukà nè, kùvwa mwà kwikala mwelè cyanza cyèbè muulu bu Cintu kampànda kaciyì cikwambile bwà kucyènzà nànsha. Nè cintu cikwàbò nànsha cimwè kacivwa cifwànyine kukwambila to pa kuumusha Nzambì.

<sup>467</sup> Pa nànkù, mpindyewu, paùdì umòna Mifundu misokolola mu mùshindù mupwàngàne nùnkù! Udi umòna bivwà munkaci mwà kwenzeka, munda mwà bikondo, bidimu bikesè bishààle ebi, bidimu makùmi àbìdì anyì makùmi àsàtù. Paùdì ubimòna bishindikìibwe mu mùshindù mupwàngàne. Umòna Mifundù yàmba ànu menemene bìdì byenzèke, nè bìdì pabwìpi nè

kwenzeka. Dìbà adi, mwimànyìne pa diitabuuja mu mudimu wà Kilistò, mwaba wùdi musòmbe mpindyewu mene awu, nè wùdi mwelèle byanza byèbè muulu awu, ambà nè: “Kubangila ànu mu kasunsa aka, kwàjiki. Ndi ngàngata Kilistò mpindyewu bu Musungidi wanyì. Nè nèngìikalè nè mwoyi Bwendè, matùkù àànyì wònsò à mwoyi. Nè ndi njinga bwà Nzambi ànguuje nè Nyumà Mwímpè.” Nènku pawikalà kùyì mubàtìijìibwe mu Dìna dyà Yesù Kilistò, ciinà cyà màyi necikale cikwindile.

Tùsambilàayi.

<sup>468</sup> Mukalenge Nzambi, kùvwa búngì bunène kampànda bwà byanza munkaci mwà bantu aba, bivwà byela muulu. Ndi mutwishiiibwe nè Wèwè udi Mukalenge Yesù ànu umwèumwè wàkenza difuta dyà cibawu bwètù twètù awu, kùkaadi bidimu byàbúngì. Nè pa kumòna Bítampi abi bibuulula, nè bintu binène bidì byenzèke kaaba aka mene mu bidimu bikesè bishààle ebi, ndi ngùitabuuja nè mwoyi wànyì wònsò nè ciibi cyà ngàsà ncibangè kwenda kwinjidika, nè Wèwè ukàadi pabwìpì nè kwasa lwendu Lwèbè mpindyewu bwà kupikula cisàmbà Cyèbè. Pàcidiku mwaba apa, nè ciibi cyunzulula, mwàkadìbi mu matùkù à Noà, swàkù bwà misùukà yà mushinga mukolè yìdì misòmbèle mu mubidi wà ntentà ewu wìkalà mwà kunyanguka dìngà ditùkù eyi, yìdì myelè cyanza cyà cifwàkà aci muulu, munda mwàbò amu; bwà ditwishiiibwa dyàbò—dyàbò nè dijikula dyàbò nè, mbiitabùuje nè mbaswè bwà kwitaba dibàsungwila Dyèbè, bwà lupàndu, mu Mukàndà mutwà citampì mubuulula wùdi mutùbuulwila ewu. Bàpèeshèku, dilòlò edì, Mukalenge, mùzàbì wà bwakànè bwà Yesù Kilistò, nè vwàdikàku musùukà wàbò naawù, bwà bààmònakù mwà kwimana kumpàlà Kwèbè mu Ditùkù dikaadi pabwìpì menemene adi, bapwàngàne, ku Mashi à Kilistò.

<sup>469</sup> Mukalenge Nzambi, pìikalàbo kabàyi babàtìijìibwe mu Dìna dyà Yesù Kilistò to! Nè mwimanyìne pa dibuulula dyùdi Wèwè mumpèeshe pa bidì bicitàngilà; nè pa kumòna nè Pòlò wàkatùma dìyì bwà bantu bàkaavwà mene bamana kubàtiiza kùdì Yone Mubàtìiji, bwà bôbò kubàtìijìibwa cyàkàbìdì mu Dìna dyà Yesù Kilistò, bwà kupetabò Nyumà Mwímpè, mu Byenzedi 19. Ndi ndòmba bwà Wèwè kubàtwisha, Mukalenge, bwà Bulelèlè, nè swàkù bwà bàKutùmikilè.

<sup>470</sup> Nènku dìbà adi ku ditùmikila dyà diitaba dyàbò, nè ditùmikila dyà dijikula dyàbò, nè ku màyi; swàkù bwà Wèwè, pèèbè, ùbùjè nè Nyumà Mwímpè, bwà bukolè bwà mudimu, matùkù àbò wònsò à mwoyi. Ndi nKwomekelabù mpindyewu, mu Dìna dyà Mwàna wa mùkòòkò wà Nzambi wàkalàmbudiibwa awu, Yesù Kilistò. Amen. Amen.

Ndi muMunangè, ndi muMunangè  
Bwalu Yèyè wàkannanga kumpàla  
Nè wàkampetela lupàndu



Pa mucì wà Kàlvaryìò.


<sup>471</sup> Mpindyewu bwènù nwènù bàvwà beelè byanza byènù muulu abu. Tùmikilàayi díyi ditùma dyà Nyumà, didì difwànyine kulonda mèyi ma—makùlù à Díyi, bwà ngènzàmpèkààtù udi munyingàlálè. Nùdilondàayi, mu cyenzi cyònsò. Nè Nzambì wa mu Dyulu ànùfutèku bwà diMutwà dyènu dyà nyama ku mikòlò. Mukalenge ànùbènèshè.

<sup>472</sup> Maaalabà dilòòlò, nùlwayi nè crayons yènù nè mabèji, mpindyewu, munùtù nwenza amu. Tudi tutèkemena nè netwikalè kaaba aka pa díbà òmwèòmwè adi, pa díbà mwandamutèkètè nè citùpà, jaajaja, bu Mukalenge mwà kwanyisha. Nèku lwà pa . . . nwànsambidilaayikù, bwàNzambì kunkàngwilaYè Cítampì Ciisambòmbò, maaalabà, mu mùshindù wà ngàkùmbana mwà kunùtwàdilaCì mùdìYe ùCìmpèèsha amu. Mu kwindila amu, twìmbàayi cyàkàbidì. Kabìyi ànu nè misambu to, kàdi ku ditùmbisha dyà Ewu wàkafwà pa kaaba kèètù nè kutùpikula awu. *Ndi muMunangè.*

Ndi . . .

Mpaasàtà wenù nyèyè ewu mpindyewu.

. . . muMunangè, ndi muMunangè

Bwalu Yèyè wàkannanga kumpàla. 

63-0322 Citampi Ciitânù  
Branham Tabernacle  
Jeffersonville, Indiana États-Unis

CILUBA

©2025 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)